

APOLOGIE
DE P. PAVL
DOCTEUR EN
THEOLOGIE A VENISE,
& Religieus de l'ordre de' Serui.

Pour les traictez de I. Gerson, sur la
validité des censures.

Contre les obiექtions faictes par l'Ilustrissi-
me & Reuerendissime Cardinal
Belarmin.

Traduicte d'Italien en François.

Regnum meum non est de hoc mundo.



M. DCVI.

THE NEWBERRY
LIBRARY

Case

F

39

.326

16062



APOLOGIE DE P. PAVL
DOCTEUR EN THEOLOGIE
à Venise, & Religieus de l'ordre
de' Serui.

ESTANT expedient & nécessaire de
répondre aux objections faictes
contre deux traictez de Iean Gerson tres-
excellent Docteur en Theologie, sur
la validité des Censures, non tant pour
la defense de l'honneur de ce grand personnage,
que pour la vraye & parfaicte intelligence d'un tel
œuure, & pour maintenir la puissance legitime que
Dieu a donnée aux Princes Souuerains: Ce que ie
feray avec toute modestie & reuerence sans vser
d'aucune parole tant soit peu piquante, ou iniurieu-
se, reiectant toutes mesdisances comme mal-seantés
en la bouche des Chrestiens, mesme Religieus, &
principalement és choses qui concernent nostre sa-
lut. Ie ne me mettrai en peine de repoulser quelques
iniures faites à ce grand Docteur, vœu que s'il viuoit,
il se conformeroit au dire de nostre Sauueur, *Cui
cum malediceretur, non maledicebat*. Or ie n'apporterai
autre doctrine que celle des Apostres, & successiue-
ment des saincts Peres, & des autres Docteurs Ca-
tholiques, qui ont iusques à present interpreté la
saincte Escriture, & enseigné les fideles Chrestiens,
me soubmettant tousiours au iugement de nostre

saincte mere l'Eglise, qui ne peut errer: estimant certainemēt qu'en ceste sorte ie pourray satisfaire non seulemēt à ma conscience, qui m'a sur tout meū à ce faire, ains aussi à tous ceuls qui verront ceste mienne Apologie; estant certain que les iniures & calomnies leur desplairont autant comme ils auront pour agreable la candeur & sincerité de mes paroles & du zele dont ie suis porté à entreprendre ceste defense pour la gloire de Dieu, & édification du prochain. Et pour eūiter à vne redicte ennuyeuse que souuent ie serois contrainct de faire, ie traicteray simplement la matiere sans nommer celuy contre qui ie parle, avec les qualitez & tiltres d'honneur qui luy appartiennent continuant le progres de mon discours sous ce nom d'AVTEVR, au surplus rendant à sa dignité & à son merite tout le respect & humble reuerence qui luy est deuë, comme i'ay tousiours fait, mesmes en traittant familierement avec luy auant qu'il fust Cardinal.

PROEME DE L'AVTEVR.

Combien est veritable ce que dit nostre Seigneur Iesus-Christ en S. Ican 3. chap. Qui malè agit, odit lucem, se voit manifestement en celuy qui a traduit en langue vulgaire, & fait imprimer deux petits traittez de Ican Gerson, pource que sçachant luy-mesme combien il y auoit de faulsetez seulement en la briefue preface qu'il a faite, & combien aussi d'erreurs en ces deux traittez qu'il a traduits, & comme ils ne venoient pas à propos de ce qu'il pretendoit, il a eu honte de publier son nom, comme

aussi celui de l'imprimeur: & pour tenir le tout plus secret, a voulu feindre qu'il escriuoit de Paris, bien qu'il soit assez notoire qu'il a esté escrit & imprimé à Venise. Or afin que cestuy-cy avec son hypocrisie n'aille decevoir les simples lecteurs, nous examinerons mot à mot sa preface, ensemble les paroles de Iean Gerson par luy fidelement traduiçtes, comme il dict.

Certainement l'interprete n'a aucun subject de rougir pour auoir faict imprimer les deux traittez de Gerson, cōme seruans grandement au fait dont est questiō: car si on ne trouuoit toutes les œuures entieres de Gerson imprimées depuis cent ans, ie croirois facilement que ces deux traittez seroient tout nouuellement composez, tant ils touchent particulièrement & proprement tous les poinçts appartenans à nostre subject, de sorte qu'aussi tost qu'ils furent veus en ce pays, chacun estimoit qu'ils fussent supposez, iusques à ce que plusieurs les eurent conferez avec les anciens exemplaires imprimez à Paris l'an 1494. qui ont plustost faict croire que Gerson estoit poulzé de quelque esprit Prophetique pour la pieté, & grande doctrine dont il estoit douié, & n'y a persone qui le lisant attentiuement ne le iuge ainsi. Or si ces traittez ne sont à propos, pourquoy est-ce que L'AUTEUR s'en formalise tant? pourquoy s'efforce-il de les refuter? pourquoy reiette-il ceste doctrine, sans môstrer toutesfois qu'elle ne sert au fait dont il s'agit? On cognoistra si le discours de Gerson contient des erreurs, lors que les raisons de L'AUTEUR seront examinées, par toutes lesquelles on il suppose des choses qui

en les debattant apparoissent faulſes, comme que Gerſon a eſcrit ces traittez en temps de ſchiſme, ou poſe pour maxime veritable ce qui eſt auiourd'huy en controuerſe, ſçauoir que le commandemēt faiēt par noſtre ſainēt Pere à la Republique de Veniſe eſt iuſte; ou vſe de termes ambigus qu'il tire en bon ſens, pour les imprimer en l'entendement du lecteur, & en fin il fait touſiours ſuiure vne mauuaiſe conſclusion.

La preface de l'interprete ne contient aucune Doctrine qui ne ſoit comprise aux traittez de Gerſon, & par tant ie ne voy pas qu'il ſoit beſoin d'y mettre ſon nom, ſi ce n'eſt qu'on veuille preſuppoſer que tout interprete ſoit tenu de ſe nommer: mais il ne ſe trouue aucun commandement de cela au ſainēt Concilē, ny ailleurs, & eſt choſe qui n'eſt en vſage, car on ne priſe point ceux, qui pour auoir fait vne preface, ou vne table, ou la traductiō de quelque petit liuret, penſent pour cela meriter beaucoup. On void vne infinite d'opuscules des peres Grecs traduits en Latin ſans qu'on y voye le nom du traducteur, bien qu'il ſe voye en d'autres. Noſtre Seigneur Ieſus-Chriſt n'approuoit le conſeil de ſes parens, *Transi hinc, & vade in Iudæam, vt discipuli tui videant opera quæ tu facis; nemo quippe in occulto quicquam facit, ſed querit ipſe palam eſſe, manifeſta te ipſum mundo:* Mais il reſpondit ce que ſes ſeruiteurs auiourd'huy peuuent reſpondre en pluſieurs demandes, *Tempus meum nondum aduenit, tempus autem veſtrum ſemper eſt paratum.* Il ya (gracēs à Dieu) quelque temps que le monde eſt ſorty d'enfance, & commence à prendre gouſt ſans faire iugement des viandes par celuy qui

les met sur table, ains par leur propre faueur. Et certainement il ne faut point craindre que l'excellence des tiltres de L'AVTEVR face perdre la cause à celui qui l'a intentée sans se faire cognoistre, suivant la coustume qui s'obseruoit és iugemens des Areopagites. Quant à ce que l'imprimeur n'y a pas mis son nom, ie n'en diray rien, pour n'auoir entrepris sa defense : mais ie diray bien qu'il est fort y puis n'agueres de Milan vn certain escrit touchant ce different, sans nommer l'Autheur, ny l'imprimeur, ny le lieu, ny le temps, & cest escrit contient vne doctrine qui se trouuera avec le temps fort dommageable, à quoy on ne peut respondre autre chose, sinon que nous voulons vne loy pour nous, & vne pour les autres. Pour la traduction nous prendrons garde si elle est bien & fidelement faicte lors qu'au progres du discours se trouuera quelque objection à l'encontre: Mais voyons ce que dit L'AVTEVR, premierement contre la preface de ces deux traitez.

Commencement de la Preface de Gerson.

Ayant couru le bruit en ceste Cité que le iour de la tres-saincte Natiuité de nostre Seigneur ont esté iectées quelques censures fulminatoires contre la Serenissime, & tres-religieuse Republique de Venise, pour n'auoir voulu soubmettre à la volonté d'autrui la liberté que Dieu luy a donnée.

Si nous recherchons toutes les sortes de liberté que peut auoir vne personne, ou vne Republique, nous n'en trouuons que six, à sçauoir la liberté d'arbitre contraire à la nécessité naturelle : la liberté Chrestienne, qui est opposée à la seruitude du peché : la liberté Civile, contre la seruitude des

esclaves : la liberté de la République, qui est contraire à la domination d'un Monarque: la liberté d'un Prince Souverain, qui ne reconnoit aucun supérieur aux choses temporelles, opposée à la subiection d'un Prince moindre à un plus grand: & finalement la liberté de faire mal, qui est contraire à la seruitude du peché, aux Romains 6. chap. cum serui essetis peccati, liberi fuistis iustitiæ. Je ne croy pas que l'Auteur de ceste preface parle de la liberté de l'arbitre, qui est naturelle, laquelle on ne peut perdre en façon quelconque, bien que les Lutheriens, & les autres semblables heretiques soient de contraire opinion: ny aussi de la liberté Chrestienne, qui est opposée au peché, parce que celle-cy ne se perd point pour obeir au Vicaire de Iesus-Christ, ains plustost en luy desobeissant. Je ne peus croire pareillement qu'il vueille entendre la liberté civile, de laquelle les esclaves sont entièrement priuez, & moins encore la liberté des Républiques, des Aristocraties, & des Democracies, en laquelle ne sont compris les peuples subiects à la puissance Royale ou Monarchie, d'autant que ny les Papes de nostre temps, ny leurs predecesseurs n'ont iamais attenté contre le gouvernement de la Cité de Venise, sçachans fort bien qu'il n'y a aucun gouvernement legitime soit de Roy, ou des Principaux, ou d'un peuple, qui soit repugnant à la religion Chrestienne, de laquelle nostre saint Pere a principalement soing, ains ceste diuersité n'est pas de moindre ornement à la cité de Dieu, que l'Eglise vniuerselle.

Mais ie ne sçay à quel propos, ny pourquoy L'AUTEUR fait distinction de six especes de liberté, estant assez notoire de quelle liberté il est parlé en ce lieu. Et puis qu'il vouloit mettre en auant toutes les sortes de liberté que peut auoir vne per-

fone, ou vne Republique, pourquoy a-il oublié la
 liberté ecclesiastique, & ne l'a declarée quāt & quāt,
 veu le grand differend qui est entre les Canonistes
 non encore decidé? La Hierarchie Ecclesiastique
 est vrayement vne Republique, on ne sçait soubs
 quelle de ces six on mettra la liberté dont elle iouit:
 d'autant qu'il dit qu'il ne se trouuera autre espece de
 liberté que les six par luy alleguées, ce qui nous fait
 esmerueiller, comme s'il vouloit reietter celle-ci, de
 laquelle c'estoit le vray lieu d'en discourir ample-
 ment. Mais parçe que L'AVTEVR en sa diuision
 des six libertez met vne proposition fort ambigue,
 il est necessaire auant que passer outre l'interpreter
 en son vray sens, afin qu'aucun n'y demeure trompé.
 Parlant donc de la liberté Chrestienne, il dit, *qu'elle*
ne se perd pour obeïr au Vicair de Iesus-Christ, mais bien
pour luy desobeïr: Surquoy il faut distinguer, sçauoir
 quand le Vicair de Iesus-Christ commande quel-
 que chose conformément aux preceptes & instru-
 ction de nostre Sauueur, ou quand il cōmande selon
 son opinion, ou par passions particulieres, ausquel-
 les comme homme il est subject, mesmes ainsi que
 dit Caietan 22. quest. 39. article 1. autant ou plus
 que les autres hommes, car en ce cas ceste liberté ne
 se perd point en luy desobeïssant, mais plustost en
 luy obeïssant. Comme par exemple ce seroit auoir
 perdu la liberté d'auoir obey à Honorius I. quand il
 commanda qu'on ne dist y auoir ny vne, ny deux
 volonteiz en Iesus-Christ, ou à Gregoire III. quand
 il ordonna que celuy qui auoit vne femme, laquel-
 le par maladie seroit inhabile au mariage, en pour-
 roit prēdre vne autre avec celle là: & semblablemēt

d'auoir obey à tant de censures iettées par Estienne VI. contre Formosus, par Iean IX. contre Estienne, & par Sergius III. contre Iean IX. comme aussi à Celestin III. quand il disoit que le mariage se pouuoit dissoudre pour cause d'heresie: & auroit en outre griefuemēt peché qui auroit obey à Iean XXII. qui croyoit que les ames des deffuncts ne voyoient point la face de Dieu. Or i'ay rapporté en bref tous ces exemples, pour faire entendre au Lecteur combien est plausible & specieux de dire que la liberté Chrestienne ne se peut perdre pour obeir au Pape, mais bien pour luy desobeir, car il est dangereux de le dire ainsi generalement sans distinction, estant necessaire d'y adiouster, quand il commande selon la Loy de Dieu.

En la quatriesme où il dit, qu'aucun Pape n'a iamais attenté contre le gouuernement de la Cité de Venise, ie diray à L'AVTEVR que c'est trop d'asseurer vne negatiue en l'histoire Ecclesiastique de neuf cens ans, où il y a eu enuiron cent quarante Papes depuis qu'ils se sont meslez du temporel, lesquels pour la pluspart ont bien fauorisé la Republique: mais non pas tous sans exception, si bien que la seule Prouidence diuine a miraculeusement conserué ceste liberté, lors qu'il y auoit plus d'apparence qu'õ la voulust entierement abbatre. Et diray d'auantage qu'on trouue d'autant plus estrange que n'ayant iamais aucun Pape, comme dit L'AVTEVR, attenté contre le gouuernement de la Republique, celuy d'aujourd'huy aye entrepris de le faire, voulāt cognoistre de ses loix & constitutions, qui sont vrayement & proprement l'ame du gouuernement Ciuil.

Finalemēt L' A V T E V R laissant cela pour n'estre à propos, il conclud que l'interprete entend parler de la liberté du Prince Souuerain, qui consiste entre autres à establir des loix necessaires à la police, & à punir les crimes, & dit ce qui s'ensuit.

C'est donc de la liberté du Prince Souuerain qui ne reconnoist aucun superieur aux choses temporelles, que parle l'Auteur en sa preface : mais il se trompe sans doute de dire que nostre saint Pere fulmine des excommunications contre la Republique de Venise, parce qu'elle n'a voulu soubsmettre à la volonté d'autruy la liberté que Dieu luy a donnée, & allegue que faire loix, & punir les delinquans est le propre d'un Prince Souuerain : & que de fait nostre saint Pere Paul V. a excommunié les Principaux de la Republique, parce qu'ils ne veulent abolir, & reuoquer certaines loix faittes touchant les choses temporelles, & eslargir certains criminels qu'ils detiennent prisonniers. On respond à cela que le Pape Paul V. excommunie les chefs de la Republique de Venise, non pour n'auoir voulu obeir & reuoquer quelques loix faittes pour le gouvernement des choses temporelles, mais bien pour certaines loix tres-iniques & impies, qui vont au preiudice de l'Eglise, à l'offence de Dieu & du prochain. Et qui est celuy qui puisse nier s'il est Catholique, qu'il n'appartienne au Pape comme pasteur vniuersel de reprendre quelque Prince ou Republique que ce soit pour les fautes qu'ils commettent, & s'ils n'obeissent, de les y contraindre par censures Ecclesiastiques? Nous voyons que le Pape saint Gregoire reprist ainsi asprement l'Empercur Maurice à raison d'une Loy par luy faitte au preiudice du culte & service diuin: & Innocent III. dict expressément au chap. nouit de iudiciis que la censure des pechez de tous les Princes du

monde appartient au Pape, Non intendimus, dict-il, iudicare de feudo, cuius ad ipsum Regem videlicet spectat iudicium, sed decernere de peccato, cuius ad nos pertinet sine dubitatione censura, quam in quemlibet exercere possumus, & debemus, & plus bas, cum non humanæ constitutioni, sed diuinæ potius innitatur, quia potestas nostra non est ex homine, sed ex Deo, nullus qui sit sanæ mētis ignorat, quin ad officium nostrum spectet de quocumque mortali peccato corripere quemlibet Christianum: & si correptionem contempserit, per distinctionem Ecclesiasticam coërcere. Sed forsitan dicetur quod aliter cum Regibus, & aliter cum aliis est agendum. Cæterum scriptum legimus in lege diuinâ, ita magnum iudicabis, vt paruum, nec erit apud te acceptio personarum. *Iusques icy sont les paroles du Pape Innocent. Et le Pape Boniface en l'extravagante, vnam sanctam, de maiorit. & obed. dict fort bien que quand la puissance temporele vient à faillir elle doibt estre redressée par la spirituelle. Car encor que le Prince temporel Souuerain ne recognoisse pour superieur aucun autre Prince temporel, toutesfoss s'il est Chrestien, il faut qu'il recognoisse pour superieur le Chef de la Chrestienté, qui est le Pape, Vicair de Iesus-Christ en terre, lequel pour n'auoir autre but que le bien spirituel des ames, il ne se mesle point du gouuernement des Princes temporels pendant qu'ils n'abusent point de leur puissance à la damnation de leurs ames, à la foule de leurs subjects, ou generalement au detrimment de la Chrestienté: mais quand ils le font, il y doibt lors mettre la main, & les redresser; & qui ne croit cela n'est pas Catholique. Et si on me disoit que ces loix ne vont point au preiudice de l'Eglise, & ne portēt*

aucun peché: Je respondray que iuger si vne loy est perni-
 cieuse ou mal faicte, appartient aussi au Pape, qui est le iu-
 ge Souuerain, comme pareillement de iuger si vn contract
 civil contient vsure, c'est le fait du mesme iuge Ecclesiasti-
 que, auquel appartient la cognoissance des pechez. Sembla-
 blement nostre saint Pere le Pape Paul V. ne reprint pas
 les Venitiens de ce qu'ils punissent les crimes de leurs sub-
 jets, mais biẽ de ce qu'ils osent encores mettre la main sur
 les personnes Ecclesiastiques, (qui ne recognoissent autre su-
 perieur que le spirituel) & de ce qu'ils mesprisent les sa-
 crez Canons portans tres-griefues censures contre ceuls
 qui violentent les personnes consacrées à Dieu. Parquoy
 qui voudra tout considerer exactement sans passion, trou-
 uera que le Pape ne veut oster à la Republique de Venise
 autre liberté que celle de mal faire, liberté qui ne vient pas
 de Dieu, ains du maling esprit, & d'une propre malice,
 estant vne mesme chose que la seruitude du peché directe-
 mēt opposée à la vraye liberté Chrestienne. Et ainsi que les
 Princes temporels ne permettent à leurs subjects le larre-
 cin, le meurtre, ou autres semblables crimes, parce qu'ils
 sont preiudiciables au repos & bien public; ainsi le Pape,
 qui est le chef de la Chrestienté, ne doit permettre à aucun
 Prince Chrestien de faire des loix dommageables à l'Egli-
 se, & au salut des ames. Et comme vn bon Pasteur ne doit
 laisser aller son troupeau vaguer où bon luy semble, paistre
 des herbes venimeuses, & boire des eaux corrompues; &
 vn marinier ne doit laisser emporter son nauire par la
 violence des vents contre les escucils & rochers; sembla-
 blement nostre saint Pere qui est le Souuerain Pasteur du
 troupeau de Iesus-Christ, & le principal Pilote de la nef
 de saint Pierre, ne doit donner liberté aux Chrestiens de
 se perdre, & avec euls faire perdre les autres. Finalement

ainsi qu'à bon droit la République de Venise reiecte la liberté de conscience que demandent tous les Heretiques d'aujourd'hui, parce qu'elle void bien que ceste liberté n'est qu'un moyen pour tresbucher en vne infinité d'erreurs: & partant elle fauorise, & donne main-forte à la sainte Inquisition; pareillement aussi elle ne doit se plaindre à faire des loix contre l'honneur de Dieu & de sa Merè spirituelle, qui est la sainte Eglise, & sur ce deuroit trouuer bonnes les admonitions & la correction de son Pere spirituel, qui est le Vicaire de Dieu en terre.

Tout ce discours merite d'estre particulièrement examiné, parce qu'il n'est en tout & par tout veritable, & qu'oultre ce L'AVTEVR en tire vne cōclusion, laquelle ne se peut en façon quelconque induire. Premierement les paroles de l'interprete sont telles, que sa sainteté excommunie la République de Venise, parce qu'elle refuse de soubsmettre à la volonté d'autruy la liberté que Dieu luy a donnée. Il le tourne, & dict qu'elle excommunie les chefs, & principauls de la République: mais s'il y veut prendre garde, il trouuera que l'interprete a bien dit, & luy avec artifice change les perſones, pour excuser dextremement vne faute notable. Le Breuet de nostre S. Père presenté le iour de Noël porte ceste adresse & inscription, **MARIANO GRIMANO DVCI, ET REIPUBLICÆ VENETORVM**: Il commande par iceluy à ceuls auxquels il escrit, que sur peine d'excommunication *lata sententia*, ils ayent à reuoquer & casser deux loix. Or l'interprete a dict, *il excommunie la République*: & L'AVTEVR pour couvrir vne faute si grande d'auoir excommunié tout vn corps en general contre l'opinion de tous les Theologiens & Cano-

nistes, & mesme contre les constitutions des Papes, dict accortement, qu'il excommunie les chefs & principauls, demeurant tousiours en cest artifice, encor que le Pape excommunie toute la Republique. Par vn autre Breuet presenté le 25. de Feburier, & par le dernier qui fut le 17. d'Auril, il excommunie le Duc, & le Senat, qui est toutesfois vn College. Priôs L'AUTEUR qu'il parle franchement & die, le Pape excommunie la Republique: Il excommunie le Senat, sans dire seulement les chefs, parce qu'en cecy n'y a aucune excuse legitime. La faute est faicte d'auoir excommunié tout vn corps en general, qu'il l'a defende par autre voye plustost que d'alleguer qu'elle soit commise par inaduertēce. On doit encores aduiser avec quelle modestie il parle d'vne Republique, à laquelle le saint Siege Apostolique a tant d'obligations: ie ne dy pas seulement pour le merite de ceuls dont elle est à present composée, mais aussi des autres qui ont vescu depuis CCC. ans iusques icy tenant leurs loix pour iniques & meschantes, ce qui est contre sa propre doctrine, parce qu'il dict par après qu'il n'appartient qu'au Pape de cognoistre des loix des Princes: & toutesfois le Pape ne les a iamais declaré telles: d'ou dirons-nous que L'AUTEUR a tiré ces mots? La modestie est bien-seante à toutes persones, & nul pour grand qu'il soit ne s'en doibt esloigner. Il propose deux poincts, l'vn que les loix de la Republique sont iniques & meschantes, l'autre qu'il appartient au Pape de les reprendre, & en cas de desobeyssance contraindre par censures: Il laisse le premier qui est le principal fondement, & où il falloit insister le plus, & le prouuer.

parce que peut estre il ne scauroit par quel moyen y paruenir ; & l'ayant quicté il se met à traitter bien amplement le second qui est de peu d'importance, le premier n'estant verifié, & ameine trois autoritez avec autant de raisons. Mais suiuous son ordre, & voyons comme il a bien confirmé son intention, & premierement par l'authorite de saint Gregoire, lequel il dict auoir si aigrement reprins l'Empereur Maurice.

On trouue en l'Epistre 61. du second liure vne fort humble remonstrance de S. Gregoire à l'Empereur Maurice sur vne Loy qu'il auoit faicte, contenant *que nul enrôlé en la gendarmerie, ou ayant charge publique, ne peust entrer en religion, sinon apres la guerre finie, ou apres auoir rendu compte de son office.* Saint Gregoire montre que le compte en peut bien estre rendu par le Monastere, & que le soldat conuert y aide plus la Republique par ses prieres & oraisons, qu'en portant les armes, & que ceste loy empesche le seruice de Dieu: or voyons combien est aigre ceste reprehension, il dict premierement, *Ego autem indignus pietatis vestrae famulus in hac suggestionem, neque ut Episcopus, neque ut seruus iure reipublica, sed iure privato loquor,* & puis il continué ainsi, *Ego vero hac dominis meis loquens quis sum nisi puluis & vermis? Sed tamen quia contra auctorem omnium Deum hanc intendere constitutionem sentio, Dominis tacere non possum,* & plus bas il parle à l'Empereur comme en la persone & par la bouche de Dieu, disant, *Sacerdotes meos tuae manus commisi, & tu à meo seruitio milites tuos substrabis,* & oultre ce il adiouste, *Requirat ergo Dominus meus quis prior Imperatorum talem legem dederit, & subtilius esti-*

met si deubuit dari, & en fin priant l'Empereur de luy accorder ce qu'il desire, il conclud en ces mots, *Vnde per eundem tremendum iudicem deprecor, ne illa tanta lachryma, tanta orationes, tanta ieiunia, tamque elemosina Domini mei ex qualibet occasione apud omnipotentis Dei oculos suscentur: Sed aut temperando pietas vestra, aut mutando vigorem eiusdem legis inflectat.*

Ceste humble admonition est digne certainemēt de ce saint Pere, & mal qualifiée par L'AVTEVR vne rigoureuse reprehension: mais les paroles qui suiuent sont encores plus dignes de consideration: *Ego quidem iussioni subiectus eandem legem per diuersas terrarum partes transmittito, & quia lex ipsa omnipotenti Deo minime concordat, ecce per suggestionis meae paginam Dominis nuntiaui, utrobique ergo qua debui exsolui, qui & Imperatori obedientiam praeui, & pro Deo quod sensi minime tacui.* I'ay rapporté icy expressément les parolles de saint Gregoire y estant contrainct par L'AVTEVR, pour môstrer que ce ne fut vne aigre reprehension dont il vfa à l'endroict de l'Empereur, ains plustost vne douce remonstrance. Or puis qu'il m'a tiré iusques icy, il faut que ie le prie de me respondre, si saint Gregoire se nommāt tant de fois indigne seruiteur de l'Empereur, si en disant, que comme subiect à ses commandemens, il a enuoyé en diuerses Prouincés vn Edict, lequel en sa conscience il ne trouuoit estre equitable, & qu'en ce faisant il rend l'obeyssance deuë à l'Empereur, si dis-ie en ces parolles & actions pleines de tant d'humilité, ce saint Pere se conforme à la doctrine que l'on publie aujourd'huy pour rendre le Pape Souuerain Monarque du temporel, & tous les autres

Princes inferieurs & moindres que les vassaux, comme ie luy monstreray auant que nous sortions de ce propos que tout son discours ne tend à autre fin, encores qu'à present il ne l'ose apertement declarer: mais premieremēt ie luy veulx faire entēdre quelle fut la Chancellerie Apostolique, ou le champ de Fleur, & en quel lieu S. Gregoire fit afficher cette sienne rigoureuse reprehension. Il escrit à Theodore medecin de Maurice en l'Epistre 64. qu'il a fait à l'Empereur vne remonstrance, (i'interpreteray ainsi ce mot, *suggestionem*, avec la permission de L'AVTEVR, de crainte qu'il ne me reprenne comme il a fait l'interprete) mais qu'il ne veut pas que son messager la luy donne en public, ains secretemēt & en temps & lieu à ce qu'elle ne le destourne de ses plus grandes affaires. Je le prieray de me vouloir excuser si en traittant la premiere proposition, forcé par les parolles de saint Gregoire, ie viēs à toucher incidemment vn petit poinct de la seconde, pour monstrer l'iniustice de la Loy. Saint Gregoire dict à Maurice, qu'il recherche s'il y a aucun Empercur qui ait fait vne loy semblable à celle-la. Je voudrois en mesme façon que nostre saint Pere le Pape dist à la Republique de Venise qu'elle regardast si le Roy de Portugal, de Castille, d'Arragon, de Pologne, de France, de Sicile, Conte de Bourgongne, ou Republique de Genes, ont iamais fait des loix pareilles aux siennes, en quoy vrayement il imiteroit le bon saint Gregoire. Au surplus ie m'esmerueille grandement de la prudence de L'AVTEVR, en ce qu'il n'a cotté le lieu de saint Gregoire, veu qu'il allegue si exactement tous les autres en son traitté. Passons

maintenant à la seconde preuue tirée du chapitre
Nouit, du Pape Innocent III.

Après plusieurs grandes & longues guerres entre
 Philippes Auguste Roy de France, & Richard Roy
 d'Angleterre en l'an 1199. Richard mourut, & Iean
 sans terre son frere luy succeda, pour auoir, comme
 aucuns disent, esté nommé heritier du Royaume
 par Richard, ou parce qu'il l'vsurpa sur Artus fils
 d'un sien frere aîné. Mais les Estats que les Roys
 d'Angleterre tenoient lors en France, recogneurent
 Artus pour seigneur, & y eust de grandes guerres
 entre Philippe & Iean, ausquelles Artus suiuit tou-
 iours le party du Roy de France. Finalement en
 l'an mil deux cens la paix fut moyennée entre Phi-
 lippe & Iean par le moyen du mariage d'entre
 Louys fils de Philippe heritier de la couronne, &
 Blanche de Castille niepce de Iean, duquel mariage
 issit saint Louys, & au traité de paix fut compris
 Artus, le tout à condition que Iean feroit les foy &
 hommage à Philippe pour les Prouinces de Bréta-
 gne & Normandie, & Artus les feroit à Iean. Depuis
 par vn mal-heureux accident il aduint qu'Artus fut
 mené prisonnier par son oncle le Roy d'Angleterre
 & mourut en l'an 1203. non sans soupçon d'un cha-
 cun qu'il auoit esté tué par commandement de son
 oncle, pour raison dequoy attédu que le delit auoit
 esté commis en France & en la persone d'un vassal
 & parent du Roy, Philippe Auguste fist donner ad-
 iournement personel en la Cour de Parlement à Pa-
 ris à Iean Roy d'Angleterre comme estant pareille-
 ment son vassal à cause des terres qu'il tenoit en
 France mouuâtes en souueraineté de la courone, &

iceluy adiourné (nō comparāt) fut cōdamné par cōtumace, & toutes les terres qu'il possédoit en Frāce cōfisquées au Roy Philippe, qui les prist & s'en saisist par force. Sur ce, Iean pretédant que c'estoit cōtreuenir & violer la paix iurée entr'eux, eut recours au Pape Innocent III. lequel commāda à tous deux sur peine d'excommunication qu'ils eussent à garder & entretenir la paix, & en outre enuoya son Legat à ces fins. Iean Roy d'Angleterre, en faueur duquel ce commandement estoit fait, en fut fort cōtent, mais Philippe ne le trouua pas bō, ni aussi tous les Prelats de France, ausquels Innocent III. respōd au chap. *Nouit* : Et nonobstant ce commandement Philippe ne laissant de poursuiure son entreprinse s'empara de toutes les Prouinces que les Anglois auoient iusques alors possédées en France, & par ainsi le Pape n'aduança rien avec ses censures. L'an 1208. Innocent III. excommunia iceluy Iean d'Angleterre, & mist son Rōyaume en interdict, qui dura six ans & trois mois, mais pour cela Iean n'accorda pas ce que le Pape demandoit, à raison dequoy l'an 1212. le Pape enuoya Pandolfe Legat en France pour induire Philippe à luy faire la guerre, comme de fait il s'y prepara, & avec luy se ioignirent plusieurs grands seigneurs Anglois. Mais sur ces entrefaictes ayant le Legat passé en Angleterre, & remōstré à Iean le grand peril qui le menaçoit, luy conseilla de se rendre vassal du Pape. Iean intimidé à cause du danger éminent, acquiesça au conseil du Legat, & rendit son Royaume tributaire au Pape de mille marcs d'or tous les ans. Le Legat Pandolfe retourné en France commāda à Philippe sur pei-

ne d'excommunication de ne faire la guerre à Iean qui estoit vassal de l'Eglise : mais Philippe ne luy voulât obeir cōtinua la guerre commēcée : A cause dequoy en l'an 1215. Innocent fulmina au Cōcile de Latran vne excommunication cōtre tous ceux qui trauailleroient & molesteroient le Roy d'Angleterre, & en suite de ce l'an 1216. enuoya à Paris vn autre Legat nommé Gallus, pour denoncer au Roy Philippe, & à Louys son fils, sur peine d'excommunication, qu'ils n'eussent à passer avec armée en Angleterre, comme desia ils entreprenoient de faire: Louys ne voulant pour cela se desister entra dans le Royaume de Iean avec vne puissante armée, & bien que Gallus passé en Angleterre ne cessast de ietter force excommunications, la guerre neantmoins continua tousiours, iusques à ce que Iean mourut, & ayant Louys Roy de Frāce conquis en son Royaume plusieurs places, il fit trefues pour cinq ans avec Henry fils de Iean successeur à la couronne.

Or pour appliquer ceste histoire à nostre subject, les Iurisconsultes tiennent que nul ne peut pretendre ny s'attribuer aucune iurisdiction, pour auoir ysé de commandemens s'il n'y a esté obey; partant ie laisseray au iugement de L'AUTEUR à tirer les conséquences necessaires de ce que tant de commandemens & tant de censures n'empescherēt ces deux Rois Philippe & Louys de poursuiure leurs entreprises qu'ils estimoient iustes, encores que le Pape en iugeast au cōtraire. I'adiousteray seulement que le Cardinal Hostiensis, qui fut vn peu apres, escriuant sur ce chap. *Novit*, se trauaille grandement pour le iustifier, & propose plusieurs siennes coniectures,

comme il fust de befoin que l'affaire se passast en ceste façon, afin que le commandement du Pape cõtenu au chapitre sus-allegué se peüst dire iuste, & raisonnable: mais il suffit qu'on ne l'a pas ainsi approuué en Frãce, & qu'on n'y a point obey: Partant l'autorité de ce chapitre ne fait rien à l'intention de nostre AVTEVR.

La proposition du Pape Innocent III. qu'il allegue, *Intendimus decernere de peccato, cuius ad nos pertinet sine dubitatione censura*, comme aussi l'autre qui suit, *Nullus qui sit sanæ mentis ignorat, quin ad officium nostrum spectet de quocumque peccato mortali corripere quemlibet Christianum*, ne s'entend pas generalement pour y comprendre toutes sortes de pechez, comme aucuns ont voulu dire, & n'a iamais esté l'intention du Pape de luy donner ceste interpretation: Premièrement parce que selon saint Thomas, il faut excepter tous les mouuemens interieurs de l'ame, lesquels le Pape n'a pouuoir de iuger, sauf *in foro penitentia*, & la pluspart des pechez sont de ceste qualité. Tous les Theologiens & Canonistes tiennent, qu'en l'excommunication des heretiques, ceux qui le sont de pensée seulement n'y sont pas compris, & qu'un Canon qui les y voudroit comprendre seroit nul, d'où se pourra faire vne proposition vniuerselle, que le Pape peut cognoistre de tous les pechez, & quand on la voudra defendre, en faudra excepter la plus grande partie. Outre ce le Prince peut pecher contreuenant à sa propre loy sans cause legitime, cõme S. Thomas le prouue fort bien 1. 2. quest. 96. art. 5. & toutesfois il ne peut estre iugé pour ce peché sinon de Dieu seul, comme le traite Caie-

tan en ce lieu, monstrant que c'est autant *in foro pœnitentiali*, que deuant Dieu.

Certainement d'aduouier que le Prince soit subiect aux censures du Pape quand il contreuient à ses propres loix, c'est luy oster entieremēt sa puissance: de dire aussi qu'il y soit subiect pour les autres fautes, & non en celle-la, c'est aneantir la raison presuppōsée au chap. *Nonit* sus-allegué, disant, qu'il appartient au Pape d'auoir le soin des ames, & du salut d'un chacun, & d'oster tout ce qui luy peut estre contraire. Or est-il que le Prince encourt damnation eternele, mesmes pour les pechez commis cōtre sa propre loy, & par consequent il appartiendroit au Pape de cognoistre & iuger aussi bien de ceulx-cy comme des aultres, ce qui est toutesfois (comme nous auons dict) directement contraire à ce que saint Thomas enseigne.

Il est encor necessaire de s'arrester sur les parolles du Pape Innocent, quand il dict, que la censure de tout peché mortel luy appartient, *quam in quemlibet exercere possumus, & debemus*, & par apres il adiouste qu'il appartient aussi à sa charge de *quocumque peccato mortali corripere quemlibet Christianum*. Or s'il doit ietter des censures contre tout peché mortel, & contre tous les Chrestiens pecheurs, il peche s'il ne le fait: mais nous ne voyons pas qu'il le face contre les femmes impudiques & desbauchées qui perseuerent en leur mauuaise vie, & consequemment il peche, ou bien il faudroit qu'il ne fit autre chose que fulminer nouvelles excommunications. C'est pourquoy ce qu'il dict *de omni peccato mortali*, ne se doit entendre generalement, plusieurs en estant

desia exceptez, dont Gabriel Biel sur le can. lec. 75. apres s'estre longuement peiné sur l'exposition de ce passage, ne sçait que dire, sinon, que la Decretale, & toutes les autres qui parlent en ceste façon, s'entendent *in foro pœnitentiæ* seulement. Je ne m'efforceray beaucoup à monstrier que les parolles de la Decretale se doibuent entendre selon l'interpretation de Gabriel, mais ie diray, que quiconque voudra asseurer qu'elles s'entendent *in foro exteriori*, il doibt bien se donner garde d'abbatre entierement l'authorité seculiere establee de Dieu, veu que de ceste doctrine naistroit vne confusion au monde, & vne damnation, en laquelle il precipiteroit ensemble tous les Papes: ce que quelques Canonistes ont tâché de faire, entre lesquels est Nauarre, qui toutesfois n'y ont rien aduancé: & de nostre part nous nous debuons efforcer de rapporter les paroles de ce Pape à la vraye doctrine, qui separe la puissance seculiere du ministere spirituel, d'autant mesmes que ceste Decretale contient encore autre chose qui a besoin d'estre esclaircie, comme quand elle dict, que Philippe Auguste fut de la race de Charles magne, ce qui est faulx, si ce n'est qu'on presuppse quelque mariage, & qu'on l'entende en ligne feminine qui n'a lieu en France. Quelque historio-
graphe François a fait descendre les Carliens, comme les Capets, des Merouingiens par diuerses lignes feminines, mais il sera bien difficile de môstrer que les Capets viennent de Charles, si on ne veult adiouster & inuenter quelque chose hors de l'histoire.

Ores il est maintenant temps de sortir du chap.

Nonit, que L' A V T E V R deuoit plustost bien expli-
 quer, qu'amplifier, veu que contre l'intention
 d'Innocent, qui dict seulement que la correction de
 tous les Chrestiens luy appartient, il a changé ces
 derniers mots, disant *de tous les Princes du Monde*; de
 sorte que ce sera à luy d'excommunier le Turc, le
 Roy de Perse, le Roy de Samarcande, le Precopen-
 se, & tous les autres, encores qu'on ne cognoist
 point: & Sainct Paul ne pourra plus dire, *quid mihi*
de his qui foris sunt iudicare? Mais L' A V T E V R n'a
 estimé deuoir parler des particuliers Chrestiens,
 lesquels le Pape Innocent a comprins, comme estât
 assez de maistriser les Princes, iugeant indigne de sa
 puissance de s'abbaisser aux autres. Car d'interpre-
 ter (*quemlibet Christianum*) pour tous les Princes du
 Monde, c'est amplifier, & restreindre tout ensen-
 ble le sens de la Decretale, laquelle se restrainct en
 excluant les personnes particulieres, & s'amplifie en
 y comprenant generalement tous les Princes, mes-
 mes ceuls qui ne sont Chrestiens. Quant à l'autho-
 rité de l'extrauagante *Vnam Sanctam*, ie voudrois
 que L' A V T E V R eust osté vne difficulté qui pro-
 uient de la lecture de ceste Extrauagante, & d'une
 autre du Pape Clement V. qui succeda peu apres, la-
 quelle commence *Meruit, de priuilegiis*, où le Pape
 Clement dict, qu'il ne veult, ny entend, que l'Extra-
 uagante *vnam Sanctam*, puisse porter aucun preiudi-
 ce au Roy & Royàume de France, ny que le Roy &
 son Royàume soient subiectz à l'Eglise Romaine
 plus qu'ils ont esté auparauant, ains que les choses
 demeurent au mesme Estat qu'elles estoient auant
 icelle Extrauagante, & qu'il faict cela pour favoriser

le Roy, comme l'ayant bien merit  par son bon zele & affection au sainct Siege, pour les merites de ses predecesseurs, & aussi pour la singuliere deuotion de tous les Franois. Je demande maintenant si le Pape Boniface a declar  *ius diuinum*, c'est   dire s'il a declar  en son Extrauagante *vnam Sanctam*, que la Iurisdiction du Pape soit *de iure diuino*, ou si luy mesmes s'est assubiecti les Princes, que Dieu mesmes n'a voulu soubsmettre   la puissance. Si on veult se fonder sur le second moien, on repliquera que c'est introduire vne nouueaut  contre ce qui s'est fait & pratiqu  depuis 1250. ans, vne nullit , vne vsurpation, vn attentat, & vn abus de la puissance que Dieu luy a donn : en oultre qu'il ne falloit point que le Pape Clement entendist exempter de ceste constitution le seul Royaume de France, mais aussi tous les autres Royaumes, & Principautez: & moins encore debuoit-il octroier cela pour recognoissance des merites du Roy, ou du Royaume, mais pour le deub de la iustice.

Si on dict que c'est vne declaration du droit diuin, ie demande comment le Pape Clement a peu exempter le Roy, & son Royaume de la subiection que Dieu auoit prescrite & ordonn , estant certain que le Pape ne peut dispenser persone de ce qui est *de iure diuino*. Et pour venir   ce qui est dict en l'Extrauagante allegu e par L' AUTEUR, si ce que Boniface dict, sauoir, que quand la puissance temporelle erre, elle doibt estre redress e par la Spirituelle, est vne declaration de la Loy diuine, ie dy que cela se doibt entendre pour auoir lieu seulement en ce qui concerne nostre Salut, & le iuge-

ment de Dieu, sans y apporter aucune puissance temporelle de celles que les Legistes appellent *coactivas*, & par ainsi toute l'autorité Ecclesiastique sur les Princes est spirituelle, & en cecy n'est besoin de venir au Pape, veu que tous les autres Prelats ont ceste autorité, bien qu'il y aye grande difference entre luy & les autres, attendu que l'autorité des autres Prelats ne s'estend pas sur tous les Chrestiens en general, comme fait celle du pape, & les autres Prelats recognoissent la dignité Pontificale, comme d'un superieur.

Or quand à ce qu'il conclud de ces trois autoritez sus-alleguées, qu'encores que le Prince temporel Souuerain ne recognoisse autre Prince Temporel pour son Superieur, il doibt neantmoins recognoistre le chef de la Chrestienté: ie voudrois qu'il n'y eust aucun deceu par l'equiuoque du verbe *Recognoistre*, & du mot *Superieur*. Car *Recognoistre* signifie par foys estre subiect à toutes les loix d'un autre, luy faire hōmage, & cōfesser tenir son Estat & releuer de luy: par foys aussi il se prend en autre sens, cōme de tenir un aultre pour ministre de Dieu en ce qui regarde le Rōyaume des cieuls, & selon ceste signification ie dy que le Prince recognoit le Pape, & recognoit encores l'Euesque. Et ce mot de *Superieur* en la premiere significatiō s'entēd pour celui qu'on appelle communement le Seigneur Direct: & en autre sens *Superieur* signifie celui qui enseigne la Loy de Dieu, administre les Sacrements, & qui generalement nous dresse au chemin de Salut: auquel sens ie dy pareillement que l'Euesque est Superieur du Prince, bien que le Pape soit encore plus grand Su-

perieur. Il ne fault donc pas que L' AUTEUR sans distinction de ces significations die en vn mot, que le Prince temporel Souuerain, bien qu'il ne reconnoisse aucun autre Prince temporel pour Supérieur, doibt neantmoins reconnoistre le Pape pour tel, & confondre ainsi les Souuerainetez: Car on ne doibt admettre ceste proposition, que le Prince souuerain bien qu'il ne reconnoisse autre Prince temporel pour supérieur, il soit neantmoins tenu de reconnoistre l'Euesque en ceste qualité, attendu que la deceptiō seroit trop manifeste à vn chascun: parce que si *Superieur* s'entēd en sa premiere significatiō pour le Seigneur direct, ie dy que cela est faulx qu'il doibue Reconnoistre le Pape, parce qu'il n'est pas tel, mais que tout de mesme qu'il ne reconnoit aucun autre Prince, aussi ne doibt-il reconnoistre le Pape. Si c'est en l'autre sens pour signifier Supérieur Spirituel, il n'est pas vray aussi qu'aucun Prince temporel, bien qu'il soit Vassal, reconnoisse vn autre Prince temporel pour Supérieur Spirituel, parce que *Reconnoistre* en ce sens, c'est à dire auoir pour Pere Spirituel: Or le Vassal ne doibt pas tenir son Seigneur en ceste qualité, & partant il se fault garder de Theologizer en ceste façon qui confond le Royaume de Dieu, & ceux du Monde, & abuse les plus simples & idiots, leur faisant croire qu'il fault necessairement obeir au Pape en tout & par tout. Il n'est pas moins suspect de dire que le Pape est chef de la Chrestienté, pour raison de l'equiuoque du mot *Chrestienté*: On trouue dans les Auteurs anciē, que le Pape est appellé Successeur de saint Pierre; par d'autres Vicaire de saint Pierre; & depuis par aul-

cuns Vicaire de Iesus-Christ, Vicaire de Dieu, chef
 de l'Eglise, qui sont des paroles qui ne peuuent re-
 ceuoir vn mauuais sens; mais ce mot de *Chrestienté*
 pour son ambiguité peut bien estre mal entendu,
 parce qu'il ne signifie pas seulement l'Eglise Chre-
 stienne, mais aussi tous les Estatz & Royaumes
 Chrestiens: mesme que ceste seconde signification
 est la plus vsitée:& quand on dict que l'Asie, ou l'Æ-
 gypte n'est pas de la Chrestienté, ce n'est pas à dire
 que l'Eglise Chrestienne n'y soit, mais que les peup-
 les qui luy sont subiects ne sont pas Chrestiens.
 On voit qu'il y a de l'abus soubs ceste nouvelle ma-
 niere de parler, d'autant qu'ils veulent de là inferer
 que le Pape est chef, c'est à dire qu'il a la surinten-
 dance du temporel de tous les autres Princes Chre-
 stiens: Ne changeons point l'ancienne façon de par-
 ler, & disons seulement qu'il est chef de l'Eglise
 Chrestienne. Mais puis que L'AVTEVR veut mōstrer
 par tout son discours que si les Princes abusent de
 leur puissance à la damnation de leurs Ames, & de
 leurs subiects, & au preiudice de la Chrestienté, le
 Pape y peut mettre la main: bien que nous en ayons
 cy dessus amplement traicté en exposant le chap.
Neuit, il ne sera toutesfois hors de propos de repre-
 senter le grand inconuenient qui peut resulter de
 ceste doctrine generalement proposée. Toute actiō
 humaine est ou bonne œuure, ou peché; s'il appar-
 tient au Pape de cognoistre de tout peché, il faudra
 aussi qu'il iuge ce qui est peché, & ce qui ne l'est pas;
 si cela est, ie dy qu'il n'y a Prince aucun que le Pape,
 ny mesmes aucun Domaine particulier. Si le Prince
 ordonne qu'on ait à luy paier quelques imposts &

subſides extraordinaires pour ſubuenir à la Repu-
 blique en quelque guerre qu'il eſt contrainct de fai-
 re, ceſte ordonnance n'eſt pas iuſte, ains eſt peché ſi
 la cauſe finale d'icelle n'eſt legitime, & ſi les ſubieçts
 n'en ſont chargez à l'egal de leurs moiens & ſelon
 les regles de la iuſtice diſtributiue. Doncques le Pa-
 pe pourra dire alors, ie veux ſçauoir qui vous meut
 de leuer ce nouuel impoſt, & par ce moien il ſçaura
 tous les ſecretz de l'Eſtat: il pourra examiner ſi la
 diſtribution en eſt egalemeſt faiçte & à proportion
 des moiens d'vn chaſcun, & par ainſi il verra ce que
 peuuent porter les facultez publiques: & d'autant
 que le Pape comme Prince temporel qu'il eſt, peut
 en ceſte qualité auoir la guerre contre vn autre, il
 pourra par ceſte voie facilement affoiblir ſes enne-
 mis, & les ſurmonter. Bref le Pape pourra prendre
 cognoiſſance de toutes les Loix, Edicçts, pactions,
 ſucceſſions, & accords des Princes. Mais que dy-ie?
 Il pourra meſmes cognoiſtre des ſucceſſions & con-
 tractz des particuliers; parce que le Paſteur doit
 prendre garde (comme dict L' A V T E V R) en quel
 paſtis viande ſon troupeau, quelle eau il boit, & où
 il va cheminant: Ceſte conſequence eſt non ſeule-
 ment neceſſaire, mais auſſi elle eſt receuë de tous les
 Canoniſtes, qui ont eſcrit ſur le chap. *Nonit*: & tou-
 tesfois les plus ſages, & mieuls aduiſez la tiennent
 fort abſurde, de ſorte qu'aucuns pour oſter ceſte ab-
 ſurdité ont tiré de ce chap: *Nonit* vne diſtinction,
 diſants que c'eſt autre choſe iuger de la cauſe, ou de
 l'acçtion, ou du contract, & autre choſe iuger du pe-
 ché: mais ils ſeparent ce qui ne ſe peut diuiſer, parce
 que ſ'il appartient au Pape de iuger de toute choſe

en-tant que c'est peché, & de la defendre & empescher, & contraindre d'obeir à sa iussion, de quelle aultre chose le Prince pourra il cognoistre? Comme, si en vne vendition il y auoit quelque iniustice, & que le Pape la iugeast comme peché, & la fist casser & annuller, ie demande, que restera-il au Prince à iuger ou examiner sur ceste matiere? Le demeureray d'accord si on me monstre qu'il luy puisse seulement rester vn Atome de Democrite. Auec ceste Doctrine il fault ou abolir toutes les Principautez, ou tenir la Chrestienté en troubles perpetuelz: ie n'vse point icy de ce mot ambiguement, mais par la *Chrestienté* i'entends tous les Royaumes, & Estatz Chrestiens.

Et d'autant que l'AVTEVR nous a proposé icy vne doctrine fort generale, sçauoir, qu'il appartient au Pape de iuger si vne loy contient peché, comme il appartient au Iuge Ecclesiastic de iuger si vn contract ciuil est vsuraire, il luy fault respondre, qu'il s'ensuiuroit de là, que non seulement le Pape, mais aussi tous les iuges Ecclesiastics pourroient cognoistre de toutes choses: parce qu'ils n'ont pas plus de pouuoir de iuger si vn contract est vsuraire, que s'il est fait au detrimet & lesion du prochain, car l'vn & l'aultre est peché: & mesmes que tout cas d'homicide (parce qu'il peut estre commis auec peché, & sans peché) seroit de la Iurisdiction Ecclesiastique: qu'il leur appartiendroit encore de iuger si c'est peché ou non, que de mettre vn certain pris aux viures, & marchandises, & ordonner qu'on les leue, ou qu'on les laisse: si c'est extorsion ou non que d'executer quelqu'vn en ses biens: si vne commission

d'emprisonner contient violence & iniustice, parce qu'on peut aussi pecher en ce cas : si la façon des accoustrements des femmes est scandaleuse ; si l'homme est prodigue, ou auare à sa table, car tout cela est peché : & comme ils pourroient entrer aus gouuernements des Royaumes , aussi pourroient-ils de mesmes s'inmiscer en l'administration des familles particulieres, & voir comme les Peres gouuernent leurs enfans, comme les maris traittent leurs femmes, & en general (parce qu'il n'y a aucune action ou negoce soit public, ou priué, auquel le peché ne puisse interuenir) ce seroit au Iuge Ecclesiastic d'en cognoistre, de l'approuuer, ou defendre, & de contraindre à suiure son iugement ; & lors on pourroit bien transferer le Palais, & la Iurisdiction, & toutes les maisons à l'Euesché. Ce sont les consequences qui resultent de ceste Doctrine, & partant qui doibuent estre meurement pesées & considerées par ceux, ausquels veritablement elles touchent.

Mais la vraie doctrine Chrestienne, & l'vsage commun que nous voyons, nous oste toutes les absurditez, parce que les pechez sont iugez par le iuge temporel *in foro Laico*, & par le iuge Ecclesiastic *in foro anima*, en quoy comme il y fault proceder, on ne le scauroit mieuls apprédre que par les exemples de Iesus-Christ, & des Saincts Apostres, qui ne se sont iamais attribué aulcune autorité temporelle coactiue sur les pechez.

L'AVTEVR continuë de reprendre l'interprete, non seulement au subiect de la Loy, mais en adioustant aussi, que sa Saincteté ne blasme pas la Republique de ce qu'elle punit ses subiects delinquâts ;
mais

mais bien de ce qu'elle ose mettre la main sur les Ecclesiastiques, qui ne recognoissent autre Superieur que le Spirituel; concludant par là, que qui voudra tout considerer sans passion, cognoistra que le Pape ne veult oster à la République autre liberté, que celle de mal faire, qui ne vient pas de Dieu, mais du malin Esprit. En premier lieu il obiecte icy à l'interprete ce en quoy il n'a aucunement failli; par après il ameine les propres mots de l'interprete, qui sont, *que les censures furent iettées le iour de Noel.* Or le iour de Noel il ne fut présenté autre Breuet que sur les deux ordonnances prohibitiues de ne bastir plus d'Eglises, & de n'aliener des biens lays aux Ecclesiastiques sans permission du Senat: & l'autre censure touchant la punition des crimes des Ecclesiastiques n'a esté fulminée qu'au mois de Feburier, dequoy l'interprete ne peut parler, veu qu'il escrit seulement sur le bruiet qui couroit par tout des censures fulminées le iour de Noel. Vn homme d'autorité ne doit point procurer de l'enuie & du scandal à personne quelconque, si ce n'est pour soustenir la verité: mais que les Ecclesiastiques contreuenant à la Loy ne soient subiects au chastiment politique, il le dict sans le iustifier: Nous verrons si au progres du discours il tasche de le prouuer, & on luy respondra ce qui sera expedient pour la defense de la verité; il ne faut neantmoins differer de respōdre à ceste siēne proposition: *Les personnes Ecclesiastiques ne recognoissent autre Superieur que le Spirituel.* Ceste proposition est mise en auant pour l'impugner contre Monsieur le Cardinal Bellarmin par vn certain François, qui la reprend comme sedicieuse: & Louys Richeo-

me provincial des Iesuites en son Apologie adres-
 sée au Roy respond pour luy au chap. xxxiiij. que ce
 n'est pas l'opinion de Bellarmin, si non aux cas qui
 sont purement Spirituels, comme de *Fide, de Religio-
 ne, de Sacramentis, &c.* & que son intention n'a ia-
 mais esté de reprendre la coustume de France, où le
 Magistrat Seculier cognoist de tous crimes priuile-
 giez: puis le mesme Provincial tournant sa parole
 au Roy, dict, *Episcopi, Archiepiscopi, Cardinales, Gene-
 ralesque Praposti Religiosorum ordinum in toto sacro or-
 dine excelssimi omnium, atque immunissimi primas te-
 nent: Propterea ne tamen, aut tua Maestati subiecti, vel
 esse, vel dici aspernantur, quod sint immunes, subiectique
 Pontifici Maximo?* Et en suite de ce apres auoir dict
 qu'ils le recognoissent pour Roy il adiouste, *Quod
 quomodo sane prestandum sibi constituerent, nisi se pari-
 ture cum aliis, atque sub tuo imperio esse faterentur? Pa-
 rentemne potest Davidem suus Salomon compellare, nec
 se eius tamen filium ea compellatione dicere.*

Et de verité le Cardinal Bellarmin, sur la senten-
 ce du premier liure de *Clericis* chap. xxviii. conclu-
 sion seconde, montre par ses raisons, que les Eccle-
 siastics sont subiects au Prince Seculier en ce qui ne
 repugne à leur charge: mais d'autant que ce mot
Subditi n'y est expressément porté, i'ay mieux aimé
 m'ayder de l'autorité d'un de sa compagnie, qui le
 met par expres, non seulement au lieu sus-allegué,
 mais le repete encor au chap. xxxvj. laissant à part le
 passage de saint Gregoire en l'Epistre susdicte, où il
 se nomme subiect, & seruiteur de l'Empereur; &
 parlant au Prince en la persone de Dieu il dict ainsi,
Sacerdotes meos tuae manus commisi, Laquelle façon de

parler se trouue dans toutes les œuures des Sainctz Peres, & aux epistres des anciens Papes.

Sur ce on pourroit obiecter à L'AVTEVR, que ce qu'il diët (que le Pape ne veult oster à la Republique autre liberté que de mal faire) se pourroit mieux accommoder à la Republique, & dire, qu'en punissant les crimes des Ecclesiastiques, elle n'entreprend rien contre la liberté Ecclesiastique, & n'entend les priuer d'autre liberté que de mal faire: parce que nous sommes tous d'accord, que l'Ecclesiastique peche quãd il contreuient à la loy, mais nous n'accordons pas que la Republique aye failly en les chastiant. Je croy bien que L'AVTEVR (comme homme tres-docte) a eu vne bonne intention, quãd il a diët, que la liberté de mal faire ne vient pas de Dieu, ains du maling Esprit: ces paroles neantmoins ainsi dictes ne sont pas Catholiques, d'autant que par la liberté de mal faire s'entend le liberal arbitre, lequel est naturel, & vient de Dieu, ce qui ne peut estre nié que par quelque Manichéen, qui tient que le Diable en est autheur. Je ne veux pas nier, comme j'ay diët, qu'il n'ait eu vne bonne intention: mais lui qui est si feueré censeur des aultres, ne doit pour cela estre excusé, veu que selon le dire de saint Hierosme *ex verbis malè prolatis incurritur hæresis.*

L'AVTEVR poursuit, & par vne similitude des Princes Séculiers au Pasteur, & au Pilote, conclud que le Pape comme chef de la Chrestienté ne doit permettre aux Princes de faire des loix preiudiciales à l'Eglise, & au salut des Ames; ny qu'en se perdant eux-mesmes, ils facent perdre aux autres la vie éternelle. Ces paroles semblent de prime face fort

specieuses, & pourtoient sans doubte arrester quelque idiot, & luy faire croire que toute la raison est de son costé: mais quand elles seront examinées, nous trouuerôs qu'il propose des choses ambiguës, & conclud auec le mesme paralogisme qu'il a faict en toutes les autres precedentes. Premièrement qu'est-ce qu'il entend par l'Eglise? s'il entend ce que l'Escriture Saincte, & le mot mesme signifie proprement, sçauoir la congregation des fideles, son dire est très-veritable: mais il n'y a Prince qui puisse en ceste signification faire loy aucune preiudiciable à l'Eglise, qu'il ne se face vn grand preiudice à soy-mesme, comme estant la principale partie d'icelle, & ensemble qu'il n'offense grandement: Si par l'Eglise il entend les ministres d'icelle, comme tels, ie dy le mesme: mais i'adiouste que les Loix des Venitiens ne leur portent aucun preiudice, ains fauorisent leur ministere en quelque sorte, comme nous monstrerôs: Mais si par l'Eglise il entend quelque puissance ou Estat temporel, ie nie qu'en ce cas il appartiene au Pape d'empescher qu'on face des loix au preiudice d'icelle. Voila comme nous sommes deceus par l'ambiguité. Il n'est pas permis de faire des loix au preiudice de l'eglise, cela se doibt entendre en la premiere & seconde signification: mais on a faict defenses de porter des viures à Ancone, qui est terre d'Eglise; cela se doibt entendre en la troisieme signification: & partant si on dict que la Loy qui defend de porter des viures à Ancone, est contre l'Eglise, ce sera vne conclusion sur l'Equiuoque. Pareillement sur ce qu'il dict que le Pape ne doibt permettre que les Princes Chrestiens facent des

loix preiudiciables au salut de nos ames, nous remarquerons que c'est la doctrine de Monsieur le Cardinal-Bellarmin, que pour le criminel les Ecclesiastiques sont exempts de la iurisdiction temporelle, soit que ce priuilege vienne des Princes ou des constitutions des Papes, ou de tous les deux ensemble: Mais ie demande si deuant toutes ces loix & constitutions les Seculiers qui punissoient les crimes des Ecclesiastiques pechoient, ou s'ils preiudicioient à l'Eglise? on dira qu'ouy, mais cela ne se pourra soustenir, parce qu'ils ne pouuoient cōtreuenir à la loy diuine en punissans les delinquans, suiuant la vraye opinion & la sienne mesme, ny aussi à la loy humaine qui n'estoit point encor *& ubi non est lex, nec prauaricatio*, & par consequent il n'y auoit aucun peché, ny n'estoit pas contre le salut de l'ame, ny au preiudice de personne; pourquoy donc est-ce que les Papes ne le pouuoient permettre? L'AVTEVR dira qu'ils le pouuoient alors, n'y ayant aucune loy au contraire, mais à present non, parce que la loy y est: Ils ont donc rendu le chemin du ciel plus difficile qu'il n'estoit, & n'ont apporté aucune edification, puis que par le passé les Princes en chastiant les mauuais Ecclesiastiques pouuoient sans commettre aucun peché entretenir le repos public, & satisfaire à ceuls qui estoient interessez. Quel besoin y auoit-il au preiudice du bien public, & en danger de mettre tous les Estats en confusion, d'inuenter que c'est peché de punir les meschants selon la loy de Dieu? Cela peut-il seruir en quelque sorte à nostre salut? Il sert par-adauature à quelques Ecclesiastiques de praués, qui sous ce pretexte prennent plus de hardiesse &

liberté de mal faire ; & incitét ceuls qui sont outragez à machiner de plus grandes inimitiez, & prendre vengeance par euls mesmes: mais sert-il aux Princes en apportant du trouble en leurs Estats? Sert-il à l'honneur des bons Religieux, qui sont contraincts de souffrir en leur compagnie des personnes vicieuses & meschantes? Est-il possible que Dieu soit honoré & seruy par d'autres que par ceux qui obeyssent à ses commandemens?

Mais on me dira que c'est blasmer les exemptions que tant de Princes, dignes de perpetuelle memoire, ont octroyé aux Ecclesiastiques en cas de crimes. Tant s'en faut que ie les blasme, qu'au contraire ie les louë grandement, & les propose à tous les Princes qui sont à present & seront à l'aduenir pour les imiter : mais ie diray bien qu'il ne se trouuera Prince aucun, à commencer à Constantin le Grād iusques à Constantin Irene, & de cestuy-cy en descendant par les Grecs iusques à la ruine de cest Empire, & du costé des Latins depuis Charlemagne iusques à Federic second inclusiuement, qui ait exempté les Ecclesiastiques de sa propre iurisdiction. Toutes les exemptions sont des officiers & Magistrats, les vnes de toutes iurisdictiones, les autres d'une partie seulement, & aucunes en certains crimes, les autres generalement en tout cas, demeurāt tousiours au Prince sa puissance souueraine, qui est inseparable de sa persone. Maintenan̄ afin que les crimes soient punis par tel Magistrat qu'il appartiendra, & qui aye l'autorité requise, il faut que le Prince l'ordonne selon le temps, le lieu & les affaires, parce que les Princes selon que les affaires de leurs Estats le re-

quierent, octroyent des priuileges & exemptions à quelques soldats, & autre forte de gens: pareillemēt quand l'accroissement de la Religion en leurs Estats le requiert, ils concedent des priuileges aux Religieux, & des exemptions raisonnables, dont ils en sont dignes de loüange: comme aussi ie loüe grādemēt tous les Princes sus-mentionnez, & estime beaucoup la Republique de Venise, de ce que par vne coustume inueterée elle a exempté tous les Ecclesiastics de la iurisdiction, en cas de delicts communs & matieres legeres. Mais ie ne voy point que persone puisse approuer vne loy qui oste au Prince la puissance de punir les crimes qui troublent le repos public, ny l'estimer conforme à la loy de Dieu & de nature. Car pour loüer les honestes priuileges octroyez par les Princes, il ne s'ensuit pas pourtant qu'on approue vne exemption exorbitante, qui n'apporte que toute confusion, & trouble en vn Estat.

Concluons donc que le saint Pere ne peut & ne doit permettre chose aucune qui soit de soy meschante & contraire au salut de nos ames; & que s'il la permet, ce n'est peché de ne la point obseruer, attendu que sans vne telle obseruation de loy, l'on peut estre sauué. Et de verité il faut donner loüange aux Papes qui ont tasché d'oster les abus qui se commettent és choses prohibées par les loix diuines, lesquels continuans, il est impossible que l'homme se puisse sauuer: & tant d'années y a que le monde crie apres vne reformation, & tant de fois il a esté frustré de son esperance. Mais en ce qui ne repugne aux commandemens de Dieu, la liberté doit estre conseruée au Prince, de faire ce que l'vtilité publique

requiert: & vn rape qui voudroit l'empescher, seroit vsurpateur de l'authorité temporelle, contre le precepte de Iesus-Christ.

Iusques icy l'AVTEVR traite assez familièrement toutes les disputes: mais au second lieu, où l'interprete dict, qu'il s'est mis à rechercher quelle est la force des excommunications fulminées pour causes tant iniustes, il se tourmente fort; & parle ainsi.

2. *L'interprete vient à vne autre faulseté, disant, Je me suis mis à rechercher dans les Auteurs approuuez quelle est leur force, quand elles sont fulminees pour causes tant iniustes. Voicy la seconde faulseté, accompagnée d'une incroyable temerité, & intolerable arrogance, d'autant qu'il a bien la hardiesse de dire que la cause de la censure fulminée par nostre sainte Pere contre la Republique de Venise, est iniuste. Et peut estre qui pourroit parler à ce compositeur, ou trouueroit qu'il n'est bien informé du fait, & ne sçait pour quoy ceste censure a esté iettée, veu mesme qu'il dict, que le seul bruit qui a couru dans Paris l'a fait escrire. Il faut donc que ce soit vn de ceux dont parle l'Apostre en la 1. à Thimot. chap. 1. Non intelligentes neque quæ loquuntur, neque de quibus affirmant. Est-il possible que tu sois si temeraire, que sans auoir premierement bien entendu ce dont est question, sans auoir beaucoup estudié, & sans auoir conseré avec gens doctes, tu prennes la hardiesse de rendre vn iugement si absolu contre le Vicaire de Dieu? Et quand bien tu aurois assez estudié & communiqué avec d'autres, & que tu serois deuëment informé de tout le fait; Doibs-tu estre si arrogant que de condamner d'iniustice le Souuerain Iuge du monde, & mettre en lumiere ceste sienne sentence, pour estre cogneüe & entendüe*

de tous & en tous endroits? Mais d'autant que toutes les raisons, par lesquelles tu iuges les causes de la censure de nostre saint Pere iniuste, n'ont autre fondement que le bruit qui a couru que la Republique de Venise a esté excommuniée, parce qu'elle a refusé de soubmettre au iugement d'autruy la liberté qu'elle tient de Dieu, & que nous auôs clairement fait voir que ceste raison est faulse: loinct que la iustice de l'excommunication fulminée par nostre saint Pere est notoire & approuvée d'un chacun, fors de ceux qui y ont particulier interest, qui sont plus poussez de passion que de raison: nous ne nous arresterons d'auantage à refuser ceste faulseté.

Or en relisant soigneusement les paroles de l'interprete, ie ne trouue pas certainement qu'il determine (comme veult faire croire L'AUTEUR) que la sentence du Pape soit iniuste: puis qu'il dit en sa parenthese (ce qui ne semble raisonnable ny croyable) laquelle L'AUTEUR a expressément obmise: mais posons le cas qu'elle ny soit point, & prenons seulement les paroles, *Le bruit ayant couru que la Republique a esté excommuniée pour auoir refusé de quitter sa liberté*, ie me suis mis à rechercher dans les Auteurs approuuez, &c. L'interprete suppose vne chose tres-certaine, que l'excommunication fulminée contre celuy qui refuse de ceder sa liberté seroit iniuste, & deux autres poincts demeurent douteux; l'un *in iure*, quelle est la force d'icelle, l'autre *in facto*, si la presente censure est telle que le bruit fait entendre: Et ne pouuant rien apprendre des liures pour le regard du dernier, il s'est mis à rechercher le premier: mais il n'apert point par là qu'il définisse rien en la façon que L'AUTEUR dit: comme si on disoit que le bruit

47

eust couru dans Venise, que Demetrie Prince de Mescouie auroit esté assassiné avec ses adherans, pour s'estre laissé persuader par les Iesuistes d'attenter plusieurs choses contre les loix fondamentales de l'Estat: & sur cela, si ie me mets à chercher dás les Autheurs approuuez quelle peine meritent les Religieux, qui se meslent des affaires d'Estat à la perturbation du repos public, & au peril de la vie de plusieurs personnes, quelqu'un pourroit il dire, que ie tiendroy les Iesuistes pour perturbateurs du repos public: Non certes; mais il est bien certain, que qui trouble le repos public, peche: Deux choses sont douteuses, l'une *in iure*, laquelle on peut apprendre par l'estude, pour sçauoir quel punition merite le Religieux qui a commis telle faute: l'autre *in facto*, sur ce qui est aduenü en Moscouie, laquelle gist en preuue.

Le mesme est de ce que nous traittons, & croy que L'AVTEVR l'a bien recognu: mais pour prendre subject d'ineuetiuer contre ceuls qui disent que la censure du Pape est iniuste, il a simulé de croire que l'interprete l'a ainsi dict. C'est la coustume de L'AVTEVR de reprendre aigrement ceux qui prennent les paroles d'autruy à autre sens qu'elles ne sont, & les oppugner par apres. Mais quel besoin estoit-il en ce lieu de blasmer tous ceux qui n'approuuent l'excommunication du Pape, sous ombre de reprendre vn incognu. Si quelqu'un me de ce que L'AVTEVR dit en son texte: sus-allegué que les loix de la République de Venise sont iniustes & meschantes, retorqueroit les mesmes paroles contre luy, disant, que c'est vne faulseté, accompagnée,

Et de conclure que les Loix d'une si grande Repub. conformes à celles de tous les Royaumes Chrestiens soient iniques, & meschantes, & que s'il parloit à luy, il luy monstreroit qu'il est mal informé des affaires, & le sommeroit par escrit, en ses mesmes termes, *est-il possible que vous soyez ainsi, &c.* d'oser dire qu'il y ait de l'iniustice és loix d'une tres-sage, & tres-pieuse Repub. qui s'est si bien gouvernée depuis douze cens ans & davantage, au grand estonnement & exemple de tout le monde; mesmement puis que ces loix ne luy sont particulieres, mais generalement obseruées en tous les Estats Chrestiens, & reputées pour iustes, & approuvées d'un chascun, excepté de ceux qui s'en tiennent interessez, & qui se conduisent plustost par passion, que par raison. L'AUTEUR ne se pourroit plaindre estant impugné par les mesmes objections, & repris par ses propres paroles. Mais de nostre part nous reietterons ces moyens de proceder, adioustés seulement que si quelqu'un escriuant l'histoire de nostre temps disoit qu'à son aduis l'excommunication du Pape est iniuste, il ne seroit tant à blasmer. Nous trouuons dans les histoires Chrestiennes infinis exemples de ceux qui ont librement dit leur opinion des decrets, des commandemens, & des autres actions des Papes de leur tēps & des precedens, tesmoin ce que disent tous les modernes d'Alexandre VI. & de Iule II. & des autres successeurs & predecesseurs. Dieu seul a ceste perfectiō de ne pouoir faillir & estre irreprehensible, mais toutes personnes doibuent penser à ce qu'elles font, parce que l'opinion que le monde peut conceuoir de leur

bonté & prudence, sert de bride à ceux que les mouuemens de leur propre conscience ne peuuent contenir dans les termes de raison. Mais passons à la troisieme objection, où il est dit ainsi.

3. *S'ensuit la troisieme* : Et lisant dans les saincts Canons du Concile de Trente, ces parolles dignes d'estre escrites en lettres d'or. *Et bien que les armes de l'excommunication, &c.* l'eusse desiré que comme ces tres-saincts Peres ont prescript aux Prelats la forme qu'ils doibuent garder en vlsant d'une telle medecine pour nostre salut, ils eussent aussi enseigné aux deuotes & religieuses personnes quel est leur deuoir, quand le Prelat fulmine des censures contre la forme prescrite, tant par Iesus-Christ nostre Sauueur, que par saint Paul, & par les sacrez & anciens Canons. *L'interprete non content d'auoir allegué vne faulseté contre le Pape, en adiouste encor vne autre cõtre le Concile general, afin qu'il taxe & le chef, & les membres principauls de la sainte Eglise. Il arguë le sacré Concile de Trente d'insuffisance, d'auoir ordonné que les Prelats n'eussent à se seruir des censures en causes legeres, & de n'auoir quant & quant enseigné aux Laics comme ils se doibuent conduire quand leurs Prelats ne precedent point avec l'ordre & la reigle conforme à celle de Iesus-Christ, de S. Paul & des saintes Canons anciens. Mais s'il eust leu tout le decret du sacré Concile de Trente, & non les premieres parolles seulement, il eust trouué ce qu'il semble desirer, & eust reconnu que faulxement il accuse le Concile d'insuffisance. Le decret qu'il allegue est le troisieme de la derniere session sur la matiere de reformation, & comme au commencement du decret il admoneste les Prelats de ne se seruir des armes de l'excommunication temerè & leuibus de causis, c'est à dire temerairement & en choses legeres: aussi sur la fin il aduertit les Laics, mesmes ceux qui sont constituez en dignité de ne s'enquerir si le Prelat en ce faisant y procede deuëment.*

Et partant enioinct aux Magistrats Seculiers qu'ils ne soient si hardis d'empescher que le Prelat ne fulmine l'excommunication, & moins de commander qu'il la reuoque sous pretexte que l'ordre & les formes n'y ont esté obseruées : Nefas autem sit seculari cuilibet Magistratui prohibere Ecclesiastico iudici, ne quem excommunicet, aut mandare vt latam excommunicationem reuocet, sub pretextu, quod contenta in præsentii decreto non sint obseruata : cum non ad Seculares, sed ad Ecclesiasticos hæc cognitio pertineat, ce sont les propres mots du saint Concile, lequel a sagement pourueu à tout, & a monstré que ce n'est la charge des Magistrats Seculiers de s'opposer avec force & violence à la publication des censures, comme font auioird' huy les Magistrats de la Republique de Venise, incitez par quelques vns qui se plaisent plus à flater, qu'à dire la verité, entre lesquels est celuy auquel nous respondons.

Il reprend icy l'interprete de deux choses ; la premiere, de ce qu'il accuse le Concile d'insuffisance : la seconde, que s'il eust leu les paroles suiuant, il eust trouué ce qu'il demandoit. Je diray briefuement contre la premiere objection (d'autant que la seconde me fait laisser toute autre consideration) que cest argument est celuy dont vsent les heretiques, quand nous leur disons que les traditions sont necessaires, parce qu'on ne trouue pas tout dans la sainte Escriture, comme de se signer du signe de la Croix, de la reuerence deuë aux images, des ordres mineurs, de la consecration des Eglises, & des Autels, ils opposent soudain, & disent que nous tenons l'Escriture pour insuffisante : Mais elle ne l'est pas pourtant, car elle contient ce qui doit estre es-

crit, & remet le reste aux traditions, lesquelles elle approuue: & ainsi respond souuent monsieur le Cardinal Bellarmin aux obiections des heretiques. Tout de mesmes icy on ne tiét pas le Concile pour insuffisant de n'auoir mis tout ce que l'on doit scauoir des censures, car s'il a obmis quelques particularitez, il les a renuoyées à ce qu'en ont escrit les docteurs Catholiques. Vn chascun scait combien le Pape Pie V. y a suppléé par des declarations necessaires, pour le fait de l'alliance spirituelle, de l'afinité de fornication, de l'honnesteté publique: & les assemblées ordinaires des Cardinaux se font encore pour y suppléer, souz le nom de *declarations*. Le Concile ne peut estre mis au nombre des Autheurs canoniques qui ont escrit; il faut toutesfois croire que s'il eust duré plus qu'il n'a fait, il eust encore laissé beaucoup plus de choses decidées, & L'AVTEVR ne debueroit faire vne telle obiection, laquelle est fort contraire aux nouueutez des demandes de *auxiliis*.

On me pourra faire ceste obiection, que l'interprete d'oc a failly, en ce qu'il a desiré ce que le saint Concile n'a iugé expedient de faire: mais il ne s'ensuit pas que ce soit mal fait de desirer ce qui est autrement déterminé par celuy mesmes qui ne peut errer: comme si ie desirois qu'il eust pleu à Dieu laisser en vie iusques à present le Pape Clement VIII. ie ne peche pas faisant ce souhait, encore que Dieu n'ait iugé expedient de le faire: Et ie scay qu'il n'y a personne qui ne desire au Concile vne telle suffisance qu'il n'y manque rien du tout; en sorte qu'on puisse dire qu'il n'est plus besoin d'aucun Cō-

cile: Et nous ne serions sans doute en peine de nous traualier sur ce discours de la validité des censures, si les actes du Concile eussent esté mis en lumiere, comme ont esté les decretz. Si maintenant aussi on retrouuoit les actes du Concile d'Ephese, qui fut il y a douze cens ans, ou quelque fragment des actes de celuy de Nice encor plus ancien, ils seroient bien receus. Ceuls du saint Concile de Trente sont encor en estre, & ie remets à la prudence & sagesse de L' AUTEUR de dire s'il seroit vtile & necessaire de les mettre en lumiere, car il est bien certain qu'ils nous esclairoient & resoudroient ceste difficulté.

Quant à la seconde obiection, ie desireroiy premierement quelque bon & fidele interprete du Concile, puis qu'il dit y auoir peu de fidelité en celuy de Gerson: Le Concile dit, *Nefas sit Seculari cuilibet Magistratui*, L' AUTEUR l'interprete ainsi, *Que les Laics soient aduertis, mesmes ceuls qui sont constituez en dignité*. Ie croy que les Grammairiens diront tousiours que *Seculari cuilibet Magistratui*, signifie au Magistrat Seculier quel qu'il soit, & non aux Laics mesmes constituez en dignité: par ainsi il n'est faite aucune mention des particuliers, & l'interprete de Gerson desiroit vne instruction pour les deuotes & religieuses consciences, non pas pour les Magistrats: & L' AUTEUR l'adapte aux Laics pour y comprendre les particuliers contre l'intention du Concile. Ces parolles aussi, *Sub pretextu quod contenta in presenti decreto non sunt obseruata*, ne sont pas fidelement rapportées, en disant, *sous pretexte qu'elle n'a ses formalitez requises*, Il debuoit dire, *sous pretexte que les cho-*

ses contenues au present decret n'y ont esté obseruées: parce qu'on trouue plusieurs autres formalitez de l'excommunication en saint Matthieu, en saint Paul, & en saint Augustin, qui ne sont spécifiées au decret du Concile; lequel defend bien aux Magistrats Secliers de commander que l'excommunication soit reuocquée sous pretexte que les choses contenues en ce decret n'y ont esté gardées: mais il ne determine pas si le Magistrat pourroit commander la reuocation au cas que les autres choses deuës & requises n'y seroient obseruées, comme peut estre il le pourroit au default de quelqu'vnes, ainsi que les Parlemens de France ont accoustumé de faire. Voila donc comme le Concile n'a pas instruit les deuotes & religieuses consciences, tant de ceuls qui sont iniustement excommuniés, que des autres qui sont contraints de conuerser & communiquer avec euls, de ce qu'ils doibuent faire en tels cas & occurrences, qui est ce que l'interprete de Gerson desiroit. Mais incontinent apres ces paroles rapportées du Concile: *Nefas autem sit Seculari cuilibet Magistratui prohibere Ecclesiastico iudici ne quem excommunicet, aut mandare vt latam excommunicationem reuocet sub pre-textu quòd contenta in presenti Decreto non sint obseruata.* L' AUTEUR adioute, Ce sont les paroles du saint Concile qui a pourueu à tout, & a déclaré que ce n'est au Magistrat seclier de s'opposer avec force & violence à la publication des Censures, comme font auourd' huy les Magistrats de la Repub. de Venise.

Il se faut arrester icy. Le Concile dict que le Magistrat ne doibt empescher l'Ecclesiastic de iecter des censures, ny commander qu'il les reuoque, quand il

il les a iettées : Et L' A V T E V R dict qu'il defend de s'opposer à la publication d'icelles avec force & violence, qui sont choses autant differentes, comme le Ciel & la terre. On peut bien empescher la publication, sans toutefois prohiber que quelqu'un soit excommunié, & sans commander aussi que l'excommunication soit reuoquée : Il y a bien à dire de l'un à l'autre, car cestuy-cy est un acte de iurisdiction sur celuy qui excommunie, & l'autre est un acte de naturelle defense sans aucune iurisdiction, qui appartient non seulement aux Magistrats, mais aussi à toutes personnes priuées, comme on peut voir dans Caietan, Sotus, & Victoria, qui tous traittent bien amplement de l'opposition que doibuent faire tant les particuliers que les Magistrats aux commandemens iniustes & illegitimes, principalement du Pape: Et Monsieur le Cardinal Belarmin encor en son traité de Romano Pontifice en a parlé comme euls, auparavant que ce different suruinst, lors qu'il iugeoit sans passion. Où est donc ceste grande faulseté que L' A V T E V R pretend estre alleguée par l'Interprete contre le Concile ? & ce qui s'ensuit, *que s'il eust leu tout le Decret, il eust trouué, &c.* L'obiection faicte à l'Interprete en cest endroit, consiste en trois interpretations de L' A V T E V R, fort esloignées, voire du tout contraires au sens & aux paroles expresses du Concile. Venons maintenant au quatriesme chef, où il dict ainsi,

4. Mais passant plus outre l'Interprete adouste & dict, Et ne trouuant icy ce que ie desirois, ie me suis mis à feuilletter plusieurs Auteurs, entre lesquels est tombé en mes mains Jean Gerson Docteur tres-Chrestien, digne d'éternelle me-

moire, &c. On ne peut nier que Jean Gerson n'ait esté vn Docteur fort sçauant & pieus, mais le mal-heur du siecle qui estoit lors pour le long schisme suruenü en l'Eglise Romaine induisit ce Docteur avec quelques autres du mesme temps à mal sentir de la puissance du siege Apostolique, parce que chacun voulant remedier à ce schisme par le moien d'vn Concile general, & mouuoir les Papes de diuerse obediencie à soumettre leurs pretensions à la declaration du Concile, exaltoit outre mesure l'authorité des Conciles, & abaissoit grandement celle du Pape, d'oü prouuint qu'ils cheurent tous en des erreurs manifestement contraires à la sainte Escriture, & à la commune opinion des Theologiens qui furent deuant & apres ce temps là. C'est pourquoy l'authorité de Gerson, en ce qui concerne la puissance du Pape, n'est aucunement valable, & s'en trouue assez d'autres plus fidels & mieuls approuuez que l'on pouuoit alleguer pour faire entendre quelle estoit la force de l'excommunication, comme S. Thomas, S. Bonaenture, S. Anthonin, & vne infinité d'autres, sans amener vn auteur suspect, & qui a notoirement erré en la matiere dont il s'agit à present.

L'AUTEUR pouuoit bien apres auoir rapporté quelques tiltres honorables que l'Interprete donne à Gerson, les mettre tous : car peut estre ce dont il l'accuse d'auoir abbaislé l'authorité du Pape, seroit resolu: parce que s'il eust adiousté la bonne opinion que ce siecle auoit conceu de luy, l'appellant Docteur tres-Chrestien, & son exercice continuel à enseigner la sacrée Theologie, les peines & trauaux qu'il a supportez; ioinct sa grande doctrine, le bon exemple de sa vie, & l'authorité de la commune renommée, difficilement il auroit peu persuader au

lecteur que Gerson ait esté homme, pour se laisser emporter aux mouuemens des passions indiscrettes: mais l'affection de contredire a eu tant de pouuoir, qu'elle l'a porté à mesdire non seulement de Gerson, mais aussi de tous les Docteurs de son temps, & les blasmer d'estre notoirement plains d'erreurs, suspects, & contraires aux saintes Escritures. De verité on ne peut nier la misere de ce temps là, & la longueur du schisme en l'Eglise Romaine; côme aussi celle de maintenât, qui est beaucoup plus grãde; veu que tant de Royaumes se sont entierement distraits & separez de l'Eglise, d'où est prouenu en aulcuns le desir de suppléer intensiuement en ce peu de Provinces qui restēt, ce qui s'est perdu en estéduë. Nous pouuons bien appeller ce temps miserable, puis qu'on ne voit Pere aucun de l'ancienne Eglise qui ne soit censuré; & qu'on ose dire que s'ils estoient à present, ils ne parleroient comme ils ont fait. Et ne faut croire que les occasions de ces temps là ayent plus fauotisé l'authorité des Conciles, que celles de maintenant tendent à la deprimer, veu que par tous les Royaumes qui sont separez de l'Eglise, on ne desire ny demande autre chose qu'un Concile.

Partant de parler en faueur du Concile, cela ne touche point nostre interest particulier, puis que personc ne peut aspirer à faire de luy seul vn Concile, mais seulement d'en estre vne cinq-centiesme partie; Et l'on doibt beaucoup plus craindre que le mal-heur de ce temps n'engendre des excès, au lieu que celuy du passé a causé de la diminution: Le bon zele de remedier au schisme, comme fut celuy de Gerson, & des autres docteurs de son temps, par le

dire mesme de L'AVTEVR, ne les amena point à vne opinion peruerse, n'y ayant aucun interest: mais la mauuaise intention que l'on a de s'agrandir & accroistre, est biẽ dangereuse pour conduire les hommes à vn aueuglement. I'adiousteray encor que c'est aulcunement blasmer la Diuine prouidence, de dire qu'elle ait laissé tomber en vn erreur manifeste, & tout contraire aux saintes Escritures vn siecle plein de religion, & bien zellé à remettre l'vnon & concorde en la sainte Eglise: Les hommes de grand sçauoir & pieté, comme L'AVTEVR confesse que Gerson estoit, & les autres excellents Docteurs qui estoient lors, ne le pouuoient souffrir; car de commettre des erreurs euidentes, & du tout contraires à l'Escriture sainte, c'est vn defaut si enorme & exorbitant, que i'ose dire avec la permission de L'AVTEVR, que qui y tombe, il n'a aucune scintille de science, ny de religion. Errer notoirement contre les Escritures, c'est le plus grand aueuglement qui puisse aduenir à vn Chrestien, & le plus grand chastiment que Dieu ordonne contre celuy qui se sert de l'authorité diuine pour l'interest mondain. C'est vne contradiction trop expresse & trop apparente, de confesser que Gerson estoit de grande doctrine & pieté, & dire tout ensemble qu'il soit tombé en des erreurs manifestes, & contraires à la sainte Escriture.

Il n'est encor décidé, lequel sent mieuls de l'authorité du S. Siege, ou Gerson, ou nostre AVTEVR, pour dire si absoluẽment que l'authorité de Gerson en ce qui touche la puissance du Pape n'est pas de grand poids, qui est vn mot relatif: & ce qui n'est de

grand poids à son endroit, l'est à l'endroiect des autres : & si l'opinion de L'AVTEVR est receuë en quelque lieu, celle de Gerson est mieuls approuuée en plusieurs autres. Mais laissons cecy à part; L'AVTEVR en toutes ces douze propositions ne scait reprendre qu'un seul poinct incidemment proposé, pour tout le reste il faut qu'il l'approuue, & encor qu'il s'efforce par tous moyens de montrer le contraire, il l'approuue toutesfois sur la fin. Doncques il n'estoit besoin qu'il s'arrestat icy sur la superiorité du Concile comme sur le chef principal, n'estant le subject dont nous traittons maintenant, & dont persone se veuille seruir, pour ne faire croire que nous ayons de gayeté de cœur pris la defense de Gerson, pour offenser la Saincteté.

L'AVTEVR dit qu'on ne manque point d'autres docteurs plus approuuez, lesquels on pouuoit alleguer à ce propos; & nomme particulièrement S. Thomas, S. Bonauenture, & S. Anthonin. Toutesfois la doctrine de Gerson, qui est, qu'il ne faut craindre les censures nulles & abusiuës, qu'il n'y fault obeyr, ains se defendre contre icelles, qu'aux cas douteux il se faut resouldre d'estre tous vnis ensemble pour le bien commun, c'est celle mesme de S. Thomas, de S. Bonauenture, de S. Anthonin, & d'infinis autres, laquelle neantmoins n'est toute ramassée en vn lieu, en sorte qu'on l'a puisse voir en vn petit traitté, comme en celuy de Gerson : mais qui voudra faire vn recueil des lieux de ceux-cy, & de leurs disciples, trouuera leur Doctrine (ie ne dis pas touchant la supperiorité du Concile, ains pour les aultres chefs) en tout & par tout conforme à cel-

le de Gerson. l'adjousteray dauantage, que si l'A-
 T E V R me veult promettre de recevoir toute la do-
 ctine de S. Bonauenture, qui fut de si sainte vie, &
 de si grand sçauoir, ie luy monstreray des passages,
 qui le traouilleront beaucoup plus que ceux de Ger-
 son, & des aultres Docteurs de son temps. Il se
 fust bien passé d'appeller suspect, & plein d'erreurs
 vn homme, lequel il confesse luy-mesme auoir esté
 fort sçauant & tres-pieux. Mais escontons encores
 vne autre plus grande reprehension, où il dict,

5. Mais sur tout est à blasmer la cause qui a meu l'Interprete de
 traduire. & mettre en lumiere les deux traittez de Gerson, à celle
 fin, dict-il, que toute persone deuote & religieuse en les lisant
 puisse recevoir quelque consolation, sans estre touchée de
 ceste grande aduersité que Dieu enuoye aux reprochez de
 redoubter toutes choses, encores qu'elles ne soient à crain-
 dre. Trepidauerunt timore vbi non erat timor.
 Voila où arrive l'aneuglement des hommes, à se seruir me-
 mes des parolles de Dieu, pour chasser la crainte de Dieu. Le
 S. Prophete au Pseaume 13. & 52. dict que les meschans ne
 craignent point le vray Dieu, lequel sur tout on doit crain-
 dre. Non est timor Dei ante oculos eorum, & au con-
 traire ils craignent les faulx Dieux, qui n'ont aucun pou-
 uoir, illic trepidauerunt timore vbi non erat timor.
 Et maintenant ce nouueau Docteur prend les parolles de ce
 pseaume à rebours, voulant persuader par icelles, qu'il ne
 faut craindre le Vicaire de Dieu, & par consequent ny
 le vray Dieu, parce qu'il dict à ses Vicaires, Qui vos au-
 dit, me audit, qui vos spernit, me spernit, en S. Luc 10.
 Les parolles de S. Gregoire sont fort differentes de celles de
 ce nouueau Theologien, parce qu'en l'Homilie 26. parlant
 de l'excommunication, il dict, que la sentence du pasteur soit
 iuste, ou iniuste est fort à craindre: & adiouste que qui ne

erainct la sentence du pasteur, se persuadant qu'elle soit iniuste, tombe en l'affliction des repprouvés, qui craignent où il n'y a subject de craindre. Et le mal qui prouient de ceste doctrine, passe bien plus ouire, & va tousiours croissant, iusques à l'entiere ruine de l'ame, d'autant que celuy qui n'a craincte aucune des censures du Pape, encor moins redoubtera. il celles de l'Euesque: & qui commence à mespriser les commandemens du chef de l'Eglise, mesprisera facilement tous aultres.

Martin Luther persuada à plusieurs avec cest artifice, que la liberté Chrestienne consistoit à eslargir la conscience sans craincte aucune de contreuenir à tous les preceptes de la sainte Eglise: nous auons veu ainsi tant de religieux & religieuses sans aucun scrupule sortir de leurs Monasteres, quitter l'habit, & se marier, & tant de peuples fouler aus pieds les sacrées images, oublier les festes & iours d'abstinence, & ne scauoir plus que c'est de Careme, de confession, ny du seruice diuin. Et finalement nous voyons de ce principe (scauoir qu'il ne faut craindre la puissance du Vicaire de Iesus-Christ en terre) que quelques Prouinces sont auourd' huy demeurées sans aucun vestige de religion Chrestienne.

Je pourray aussi bien que L'AVTEVR, commencer par vne exclamation, non toutefois mesdisante. Voila où arriue la hardiessse des grands, d'imputer à aultruy le mal qui prouient d'euls mesmes. Il est notoire à vn chacun, & les histoires en sont pleines, que le commencement du schisme qui suruint en Allemagne, il y a enuiron cent ans, n'a eu son origine de la desobeissance des subjects, ains de l'abus des Prelats. On scait qu'il prouinst de l'iniuste extortion des deniers, & de l'estrange forme qu'on

obseruoit à donner les indulgences. l'espere, Dieu aidant, que ces contentions se termineront non à la perte, ains au salut de ceste Republique, qui subsiste encores. Et d'où est-ce, qu'elles procedent, sinon d'un mescontentement, de ce qu'un fort petit nombre d'Ecclesiastiques, qui ne sont pas au nombre de mille, iouist à present de la quatriesme partie de tous les biens de cest Estat, qui contient quatre millions de personnes, & de ce qu'ils voudroient en fin spolier les Secliers de toutes leurs facultez? Comme pareillement de ce que l'on n'a voulu permettre que quelques-vns, qui n'ont rien dauantage que le nom d'Ecclesiastiques, puissent sans crainte de iustice & en toute impunité offenser aultruy en la vie & honneur? Et s'il en suruenoit quelque inconuenient, qui diroit-on en auoir esté cause? Peut estre d'autres, que ceux qui ont voulu corriger la forme des iugemens vstée en cest Estat depuis douze cens ans en ça, & les loix establies il y a plus de trois cens ans. Il n'estoit necessaire puis qu'il s'agit entre Catholiques de la validité ou nullité d'une censure, de parler des monasteres, mariages, images, iours d'abstinences, festes, Caresmes, confessions, & seruice Diuin, pour contraindre les autres à respondre & monstrer d'où procede le mal. Il eust esté beaucoup plus seant se tenir simplement au fait, & traiter doucement ce qui viendroit en occurrence, & ne croire pas que le monde soit si idiot, qu'il ne cognoisse bien si ce dont il s'agit à present est temporel ou spirituel. Mais il sera bon de quitter maintenant ce discours, auquel par-aventure l'AUTEVR à dessein m'a voulu tirer hors de propos, & veoir quelle objection il fait à l'Interprete

sur l'exposition des paroles du pſeume, comme-
 ceâts par celle qu'il donne lui meſme, laquelle ie ne
 veuls point arguer comme faulſe: mais ie diray que
 quand elle conuiendroit à ce ſeul verſet pris ſeparé-
 ment, & qu'un autre interprete le pourroit ainſi ex-
 pliquer, neantmoins liſant tout le pſeume, on ver-
 ra que ce n'eſt pas le ſens literal, & que l'Interprete
 l'a expoſé ſelon ſon vray ſens, conforme à la parole
 de Dieu, parce que l'argument du pſeume eſt vne
 plainte du Prophete, pleine d'affection contre les
 meſchans, que nous pouons dire Atheiſtes, avec
 vne conſolation qu'il reçoit de les voir punis &
 chaitiez, & non contre celuy qui craint les faulx
 Dieux, comme le montre ce commencement, *Di-
 xit inſipiens in corde ſuo non eſt Deus*. Or pour enten-
 dre ce verſet, *Deum non inuocauerunt, illic trepidauerunt
 timore, ubi non erat timor*, il faut ſçauoir que *Dei in-
 uocatio* en la ſaincte Eſcriture, ſignifie ſouuent par
 ſynecdoche la recognoiſſance de Dieu: au moyen
 dequoy le ſens literal eſt, Ils ne recogneurent pas le
 vray Dieu, & partant ils eurent frayeur & crainte
 de ce qu'il ne falloit pas craindre. Doncques la pu-
 nition dont Dieu chaitie les meſchans eſt, que leur
 eſtant aduis d'eſtre hors de toute crainte, ils ſe for-
 ment neantmoins en leur eſprit diuerſes caprices
 & choſes repugnantes, qui leur cauſent vne crain-
 te en apparence. Ainſi auons-nous veu quelques
 vns en l'antiquité qui noient l'immortalité de l'a-
 me, & toutesſois craignoient extrêmement d'eſtre
 des-honorez apres leur mort: & d'autres auſſi qui
 noient la prouidence Diuine, & ne laiſſoient de
 craindre infiniment les augures, & autres fantaſies:
 C'eſt là le ſens literal. Voyons maintenant s'il a eſté

allegué à ce propos: Il y en a (dict S. Paul) qui confessent Dieu de bouche, mais ils le nient par leurs œuvres, comme font ceux qui viuans dissoluëment ne se soucient aucunement de la loy Diuine: ils feront souuënt des meurtres, commettront plusieurs adulteres; sans iamais se repentir de toutes ces meschancetez: ils desroberont tout ce qu'ils pourront, & consommeront tous leurs moyens avec ceux d'autrui, mais s'ils sont appellez en Cour d'Eglise pour paier vne decime, & à faute de ce faire excommuniez, ils se trauailleront plus pour cela que pour tous les pechez qu'ils ont commis directement cõtre Dieu. Il faut que nous sçachions que Iesus-Christ nostre Sauueur a ordonné l'excomunication pour medecine & pour peine, & que si elle n'est cõioincte avec le peché, elle est moindre que le peché veniel quel qu'il soit, & n'y a Theologien qui n'en die de mesme. Il est certain aussi que l'excommunication fulminée pour autre subject que pour le peché, & separée d'iceluy, n'offense l'ame Chrestienne en façon quelconque. Doncques à celuy qui n'aura crainte d'offenser Dieu, & transgresser ses commandemens, & craindra toute fois vne excommunication, se pourra biẽ adapter le sens literal du pseu-me, *trepidauerunt timore vbi non erat timor*. Qui a intention de viure chrestienement s'efforcera de garder les commandemens de Dieu, & de ceux auxquels Dieu a commandé qu'on obeyst apres luy en tout ce qui est de leur superiorité, comme au Pape & aux Ecclesiastiques es choses spirituelles, au Prince es ciuilles & temporelles, aus peres & aus maistres es domestiques (car il faut obeir à tous ceux-cy, parce

que Dieu le commande, & non pour autre occasiō) en gardant cest ordre, & mettant deuant toutes choses le commandement de Dieu: car ceux qui font autrement, Dieu permet pour punition qu'on leur impose des commandemens insupportables, ausquels ils ne sont nullement tenus, & redoubtent plus les vaines menaces en cas de contrauention, que les vrayes peines ordonnées de Dieu, à la façon du petit enfant qui pleure pour les menaces que sa mere luy fait de le chastier, bien que sans effect, ains seulement en apparence imaginaire. Que si ses vives raisons ne peuvent persuader L'AVTEVR, que ce passage du pséaume, *trepidauerunt timore*, soit bien allegué à ce propos, qu'il cede aumoins à l'autorité de Nauarre, qui sur le chap. *cum contingat. Rom. 2. num. 14. & num. 23.* l'allegue contre ceux qui craignent les excommunications nulles, disant, que de craindre les excommunications nulles, *est Deum falsum pro vero colere*: L'AVTEVR toutesfois dit, que qui ne craint le Vicaire de Dieu, ne craint pas Dieu: parce qu'il a dit à ses Vicaires en S. Luc 10. chap. *Qui vos audit, me audit*, comme s'il vouloit dire, que ne point craindre les censures temerairement iettées, soit autant que ne craindre point Dieu ny son Vicaire: & que qui veult craindre Dieu, soit contrainct de se soubmettre aussi aux indiscretions des Prelats, ausquels Dieu n'a pas donné la puissance qu'avec la discretion.

Il semble que c'est chose qui deroge à la sagesse & doctrine d'un si grand personnage, d'alleguer l'Escriture en vn sens fort esloigné du vray, mesme qui luy est totalement contraire. Pour moy ie croy cer-

rainement qu'il a seulement leu ce passage, & non
 tout le chapitre, qui ne parle des Vicaires ny des Pa-
 pes, ains de ceuls qui annoncent la parolle de Dieu,
 & qui preschent sa doctrine, disant, que qui les hait,
 il hait Iesus-Christ: & qui les mesprise, il mesprise
 Iesus-Christ. S. Luc mesme au chapitre sus-allegué
 dict, que nostre Sauueur deputa autres septante deux
 disciples, & les enuoya deuant deux à deux, en tous
 les lieux où il debuoit aller, leur enseigna comme
 ils debuoyent se comporter, ce qu'ils auoyent à pres-
 cher & à faire, quand on ne les voudroit escouter,
 ny receuoir: & puis il adiouste *qui vos audit, me audit,*
 le recherche en cest endroit non seulement vn homme
 de iugement, mais aussi la commune & vulgaire ex-
 plication de ce passage. Il est constant par tous les
 Interpretes de l'Escriture sainte que le Pape a suc-
 cédé à S. Pierre, les Euesques aux Apostres, & les
 Prestres aux septante-deux, desquels il n'est pas que-
 stion à present, sinon que Iesus-Christ disant aux
 septante deux, *qui vos audit,* il parle comme predica-
 teur à tous les predicateurs: L'AVTEVR pourroit
 dire, le Pape doncy sera compris encor avec ceux-
 cy, ie l'aduouë bien en cas de prescher la doctrine de
 Iesus-Christ, mais ie n'accorde pas ceste maniere de
 parler improprement, qu'il a dict à ses Vicaires, *qui
 vos audit, me audit,* parce que le predicateur ne dict
 pas qu'il ait vne iurisdiction coactiue ou conten-
 tieuse: Si ce lieu, *qui vos audit,* estoit seul, sans estre
 conioinct avec ce qui est dit deuant & apres, (qui
 montre euidentement qu'il s'adresse aux septante-
 deux, comme predicateurs) il y auroit quelque ap-
 arence en le lisant ainsi separément: mais la sainte

Eſcriture veult eſtre leuë entierement, & non par paſſages tronqués ou diuiſez.

Pareillement auſſi ce que dict ſainct Gregoire, que la ſentence du Paſteur eſt à craindre encore qu'elle ſoit iniuſte, n'eſt pas contraire à ce que dict l'Interprete de Gerſon; car ſainct Gregoire diſant la ſentence du Paſteur bien qu'elle ſoit iniuſte, preſuppoſe neantmoins qu'elle ſoit ſentence: aultrement elle ne peut eſtre ſentence iniuſte; mais nulle, comme eſt celle du iuge Laïc aux cauſes Eccleſiaſtiques, & celle du iuge Eccleſiaſtique aux cauſes Laiques: Mais la ſentence iniuſte qui eſt à craindre, c'eſt quãd il y a default de bonne intention, ou quand on eſt mal informé du fait; car lors il la faut craindre & garder: au contraire quand elle contient vn erreur intollerable, elle doit eſtre non pas ſuperbement meſpriſée, comme ie diray en ſon lieu, mais ſeulement reiectée avec douceur & modéſtie. L'AVTEVR a diſſimulé cela, qui eſt neãtmoins vne doctrine vulgaire, & ne ſeroit pour ſon regard neceſſaire d'en dire d'auantage; mais pour quelques-vns, entre les mains deſquels ceſte Apologie pourra tomber, i'allegueray deux Canons, l'vn de S. Leon I. Pape, de tres-ſaincte vie, qui a precedé S. Gregoire de vingt Pontificats, par lequel il dit que le priuilege de Pierre demeure touſiours, quand le iugement eſt rendu ſelon ſon equité, ſans qu'il y ait trop de rigueur, ny auſſi trop de douceur, & qu'alors il n'y aura rien lié ny deſlié, ſinon ce que S. Pierre *aut ſoluerit, aut ligauerit*. J'ay voulu mettre ces dernieres parolles en Latin, pour ne les reſtreindre à vne des deux ſignifications qu'elles peuuent receuoir, & ſera mieulx en-

eor d'y mettre tout le passage entier, *Manet ergo Pe-
tri privilegium, ubicumque ex ipsis fertur aequitate iudi-
cium, nec nimia est vel feueritas, vel remissio, ubi nihil erit
ligatum, nihil solutum, nisi quod beatus Petrus aut soluerit,
aut ligauerit.* & S. Gelase predecesseur de S. Gregoire
de quinze Pontificats (les propres mots duquel
ie rapporteray en Latin de crainte qu'on ne trouue
à redire en l'interpretation) dit: *Cui est illata sententia,
deponat errorem, & vacua est, sed si iniusta est, tando eam
curare non debet quando apud Deum, & Ecclesiam eius
neminem potest iniqua grauare sententia: ita ergo ea se
non absolui desideret, qua se nullatenus perspicit obliga-
tum.*

Quand L'AVTÈVR dit apres que ceste doctrine
croissant tousiours vient en fin iusques à mespriser
le seruice Diuin, les confessions, les iours de festes &
d'abstinence, &c. il n'est besoin à cela de response,
puis que la resistence que la Republique fait en cest
endroit n'est que pour entretenir le culte Diuin &
fester les iours dediez à Dieu: ce qu'on luy voudroit
oster, pour mettre par ce moyen l'Estat, en danger
d'estre imbu, & remply de quelque meschante &
peruerse opinion. Plusieurs tiennent qu'au siecle
passé vn certain Royaume a entierement abandon-
né la vraye & saine doctrine pour le scandale causé
par les Ecclesiastiques, ainsi qu'ont escrit les plus ce-
lebres & plus fideles historiens: & si la Republi-
que par sa pieté n'eust vsé maintenant de remedes
propts pour cōseruer & retēir l'exercice de la Re-
ligion, & se fut arrestée à executer les paroles du Pa-
pe (ie ne dy pas son intention, car ie croy qu'elle est
tres-bonne) elle tomberoit incontinent en vn grād

precipice, & s'aneantiroit. N'a-on pas assez experimenté combien il importe en ce temps d'oster au peuple l'exercice de la sainte Religion? Les heresies nées en l'an 1300. & paruenues iusques au comble, comme elles sont aujourd'huy, n'ont iamais prins leur origine que d'une infinité d'excommunications & censures, qu'on commença à ietter en l'an 1200. & qui furent continuées durant tout ce siecle: tellement que qui lira les histoires de tout ce temps là, à peine pourra-il contenir ses larmes voyant vne si grãde perte spirituelle. Or nous sommes venus graces à Dieu à la sixiesme objection, qui est la dernière, où L'AVTEVR parle ainsi,

6. En fin l'Interprete ne se contentant de s'estre mal seruy d'un passage du vieil Testament, il se veult encor aider mal à propos du nouveau, disant, mais selon l'Apostre confirmez & fortifiez au Seigneur, & en la puissance de sa vertu: ils prindrent le bouclier de la foy pour l'opposer aux fulminations temeraïres avec les armes du saint Esprit, qui est la parole de Dieu. Luther ny Calvin ne pouuoient plus ouuertement se seruir de la parole de Dieu contre Dieu mesme. L'Apostre en l'epistre aux Ephesiens dernier chapitre, parle de la resistance que les fideles doibuent faire au diable, vt possitis stare contra insidias Diaboli, & peu apres, in omnibus sumentes scutum fidei, in quo possitis omnia tela nequissimi ignea extinguer. Comme aussi dict saint Pierre, cui resistite fortes in fide, & S. Jacques, resistite Diabolo, & fugiet à vobis. Et ce nouueau Theologien adapte ceste resistance aux censures du Pape: comme si l'Apostre au lieu de dire, Armez vous de la foy & de la parole de Dieu pour resister au diable, eust dit, Armez vous de la foy & de la parole de Dieu, pour resister à Dieu mesme en la persone de son Vicair. Et quelle est ceste foy, ou ceste

parole de Dieu qui enseigne de s'opposer au Vicaire de Dieu? Mais plustost quelle est la foy & la parole de Dieu qui n'enseigne d'estre subiect, & d'obeyr aux Prelats de la sainte Eglise? S. Paul ne dit-il pas au 12. chap. de l'Epistre aux Hebreux *obedite prepositis vestris, & subiaccete eis?* Iesus-Christ luy mesme ne dit-il pas en saint Matth. 18. chap. *Si Ecclesiam non audierit, sit tibi sicuti Ethnicus & publicanus?*

De verité L'AVTEUR prend les paroles de saint Paul selon leur vray sens, mais non toutesfois contraire à celuy que l'interprete de Gerson leur a donné, S. Paul dict generalement contre les embusches du diable, & l'interprete entend qu'entre les embusches du diable sont les censures temeraires, & seroit vne contradiction de dire les censures temeraires & non procedées du diable. S. Iean dict, *omnis qui facit peccatum ex diabolo est*, & ie croy que ceste proposition est fort Catholique & sainte. L'excommunication iettée contre celuy qui fait bien & qui obeyt aux commandemens de Dieu, prouient de la persuasion du diable, & est vne espece d'embusches qu'il trame contre les fideles. L'AVTEUR sçait bien que nous n'auons pas à combattre en chair & en os contre le diable: tout ce qui tend à la ruine de l'Estat spirituel de l'Eglise, qui est le Royaume de Iesus-Christ, est œuvre du diable; & si elle est occulte, c'est vn embusche. L'Escriture sainte faict le diable auteur, comme il est en effect, de tous actes qui se font au detrimement de l'Eglise, encor qu'il n'en soit pas l'executeur. Les demolitions de plusieurs Eglises, & le degast des autres pour raison des censures peu legitimes, rendent tesmoignage, que le diable tend
des

des embusches au troupeau de Iesus-Christ par les choses mesmes qu'il a instituées pour le maintenir & conseruer. Quand S. Paul dit aux Theſſaloniciens que le diable l'auoit souuent empesché d'aller vers eux, cela ne s'entend pas par œures humaines. Le diable met à cest effect toute sorte de personnes en besongne, & souuent celles qui ny vont à la malice, mais sont trompées pensants bien faire en executant sa meschante intention avec vn zele indiscret, & l'Escriture sainte dit expressément, que telles œures sont du diable. Nous lisons en saint Matthieu qu'apres que saint Pierre eust confessé nostre seigneur estre le fils de Dieu, & qu'il eust la promesse des clefs du Royaume des Cieux, Iesus-Christ commanda à ses disciples de ne descouurir à personne qu'il fut le Christ, parce qu'il falloit qu'il endurast, & mourust en Hierusalem: Surquoy saint Pierre l'ayant reprins en ces mots, *Absit à te domine, non erit hoc tibi*, le Seigneur se tournant vers luy repliqua, *Vade post me Satana, scandalum es mihi, quia non sapiſ ea quæ Dei sunt, sed ea quæ hominum*. Qui doute que S. Pierre ne fust poulsé d'un grand zele & bonne intention? Mais d'autant qu'il s'opposoit à l'effect de la redemption, & à l'establissement de l'Eglise, qui debuoit sortir du costé de Iesus-Christ percé en Croix, il l'appella Sathan. Il n'est donc pas incontinent, puis que S. Pierre sans y penser, & allant à la bonne foy, pourchassoit vne chose directement contraire à l'Eglise, si aujourd'hui vn de ses successeurs estimant bien faire tente vne chose dont il n'est bien informé, & laquelle comme consistant simplement en fait, d'autres qui en sont mieuls in-

struicts qu'il ne peut estre, cognoissent tendre eu-
demment à la ruine, & detrimēt de l'Eglise.

L'AUTEUR est tres-excellent en toute science, &
fort persuasif, mais il ne me fera iamais croire, ny
peut estre à quelque autre que ce soit, qui aura leu
les bons liures, qu'un homme mortel de quelque
qualité qu'il soit, ne puisse quelque fois ou de son bõ
gré, ou par infirmité humaine prester aide sans au-
cune mauuaise intentiõ à quelque mauuais dessein
du malin esprit, & de cecy ie n'en excepteray pas vn
s'il n'est exempt de prier & dire tous les iours, & *ne
nos inducas inducas in tentationem.*

L'AUTEUR demande quelle est ceste foy, qui
enseigne de resister au Vicaire de Dieu, & ie luy res-
ponds que c'est la foy de monsieur le Cardinal Bel-
larmin, qui dit, en ces propres termes, *Itaque sicut li-
cet resistere Pontifici inuadenti corpus, ita licet resistere in-
uadenti animas, vel turbanti Rempub. & multo magis, si
Ecclesiam destruere niteretur, licet inquam ei resistere, non
faciendo quod iubet, & impediendo ne exequatur volunta-
tem suam.* Il se traite donc icy des moyens de resi-
ster au malin esprit avec la parole de Dieu, selon
qu'il est dit au dernier chapitre aux Ephesiens, veu
que Dieu par ses tres-occultes & tres-iustes iugemēs
luy permet de machiner tous les iours contrē le re-
pos de la saincte Eglise.

L'AUTEUR allegue ce que dit S. Paul aux He-
brieux, *obedite praepositis vestris & subiaccete eis*, qui me
plaist fort, principalemēt parce qu'il ne regarde pas
le Pape seulement, mais aussi tous les Euésques &
Curez, & ne fait rien en particulier pour le Pape:
Mais il deuoit rapporter tout le passage entier de

de S. Paul, *obedite praposis vestris, & subiaccete eis, ipse enim peruigilat quasi rationem pro animabus vestris reddituri*, ou comme dit le Grec, obeïſſez à vos ſuperieurs & ſoyez-leur ſubjects, parce qu'ils veillent ſur vos ames, comme tenus d'en rendre compte. Donques en tant qu'ils veillēt ſur nos ames, il leur faut obeïr, qui vault autant à dire qu'il leur faut obeïr es choſes ſpirituelles qui appartiennent au ſalut de l'ame, & partant L' AUTEUR dit, *Si Eccleſiam non audierit, ſit tibi ſicut Ethnicus & Publicanus*. Nous debuons ſçauoir que l'Egliſe eſt comme dit S. Paul la colonne & le ſouſtien de la verité, & qu'elle n'enseignera iamais rien que la doctrine de Ieſus-Chriſt, & ne commanderà autre choſe que ce qui luy eſt conforme, mais nous n'auōs point ouy que l'Egliſe ait cōmādé ce que L' AUTEUR dit : en quoy eſt noſtre circonuention qui procede de l'equiuoque de ce mot Egliſe. Pluſieurs autheurs en ce meſme lieu interpretent *dic Eccleſia, id eſt Pralatis Eccleſia*, & n'y a aucun qui l'entende du Pape ſeul : nous l'entendrons donc de luy generalement comme des autres Prelats, & non en particulier, gardans neantmoins à chacun le grade & le lieu qui luy appartient, & ces mots, *Si Eccleſiam non audierit*, ſe prendront pour le fait de l'excommunication ſelon la doctrine de l'Egliſe.

Il eſt tout notoire maintenant que les raiſons de la Republique de Veniſe ſont conformes à la doctrine de l'Egliſe, puis que tous les Royaumes Chreſtiens tiennent la meſme couſtume & vſage qu'elle obſerue.

Or icy ie deſire fort de ſçauoir pourquoy en l'E-

angile qu'on lit à la Messe la troisieme ferie, *post
 primam dominicam quadragesime*, où y auoit dans le
 Missal, *Respicens Iesus in discipulos suos dixit Simoni
 Petro, si peccauerit, &c.* on a osté ces paroles, & ne se
 trouuent plus dans les Missels nouvellement im-
 primez. Je sçay bien qu'elles ne sont pas dans le
 nouveau testament: mais on dit de plusieurs autres,
 lesquelles ny sont pas aussi, & neantmoins se trou-
 uent au Missal, qu'elles viennent *ex traditione Apo-
 stolica*: & quelqu'un dira qu'encor que l'Euangeli-
 ste ne le die ainsi, nous sçauons toutesfois par tradi-
 tion que ces parolles furent adressées à S. Pierre: Il
 faudroit icy vser d'une distinction pour monstrier la
 difference de cecy, quoy faisant tousiours ne pour-
 roit on empescher, qu'il n'ait esté ainsi leu par plu-
 sieurs centaines d'années, & par conséquent creu
 de tout temps par les fidelles qu'il fut dit à S. Pierre
dic Ecclesie, de sorte qu'il faut equiuoquer sur ce mot
 Eglise, ou interpreter *dic tibi ipsi*. Ce seroit encor vn
 sens fort estrange d'entendre par l'Eglise vne seule
 personne, non seulement parçe que le mot ne le peut
 porter, mais aussi parçe que le mesme Iesus-Christ
 par les parolles suiuantés dit, *vbi fuerint duo vel tres,*
&c. tellement qu'il declare ouuertement que par
 l'Eglise il entendoit vne congregation au moins de
 deux ou trois assemblez en son nom. Mais d'autant
 que S. Chrysostome a exposé cecy, nous en parlerons
 cy apres, quand L'AVTEVR en fera encor mentio
 plus amplement, en luy monstrier que S. Chrysosto-
 me ne luy est pas fort favorable, mais bien contrai-
 re. Que L'AVTEVR donc cesse de peiner tant
 apres vne petite preface, il eust peut estre mieux fait

d'espargner vn si grand labeur, & d'employer son temps, & son travail en la substance de la cause, où il entre maintenant.

Mais il est temps que nous considerons de pres les discours de Gerson, & que nous monstrions, où qu'ils ne viennent à propos, on qu'ils sont pleins, d'erreurs.

Auant que passer à la defense particuliere des traictez de Gerlon, ie ne doibs obmettre d'aduertir les bons lecteurs, que L' A V T E V R ou par artifice, ou a dessein, ou a quelque autre but que ce soit ne cesse ordinairement de reprocher & imposer à la Republique, qu'elle ne veult recognoistre le Pape Vicaire de Iesus-Christ, ny luy rendre obeïssance, qu'elle le desdaigne & mesprise, vsant de plusieurs autres parolles piquantes, & propres à exciter les cœurs de ceux qui ne sont deuement instruits de ce dont il s'agit, & de la iuste cause de la Republique: & pour paruenir encor plus facilement à ce qu'il pretend, il empesche tant qu'il peut, que ses raisons ne soient veuës, ny cognuës, qui est chose contre tout droict diuin, & humain.

Or ie respondray vne fois pour tout à ce que L' A V T E V R va si souuent rebattant, que ce n'est pas proceder sincerement & de bonne foy en c'est affaire, parce que la Republique de Venise recognoist & obeit comme elle à tousiours fait au saint Siege Apostolique, & n'introduit aucune nouveauté, ains maintient & deffend en toute pieté & religion la sainte Foy Catholique, laquelle elle prefera à toutes choses, mais seulement pour le regard des choses temporelles (au fait desquelles le Pape fulmine des censures contre le deub de la iustice pour

n'estre deuëment informé de ce qu'il debueroit, ou pour y estre poulsé par le conseil d'autruy, ou pour quelque aultre raison incogneuë) elle entend dans les termes de la religion Catholique defendre sa liberté & la puissance que Dieu luy a donnée, conforme à la Loy diuine & de nature, & à la doctrine des saincts Peres & Docteurs Catholiques. Mais examinons maintenant les propositions de Gerson l'une apres l'autre, ainsi que L'AUTEUR nous les proposera, pour voir si elles sont à propos, & pleines d'erreurs ou non.

1. La premiere proposition est que l'excommunication & l'irregularité sont fondées principalement sur le mespris des clefs de l'Eglise, c'est à dire de la puissance Ecclesiastique. *Ceste proposition est veritable si par par le mespris on entend la desobeissance, ou pour mieuls dire la contumace, & n'est point contraire au sacre de nostre Seigneur.*

2. La seconde proposition est que le mespris des clefs peut estre en trois façons, directement, ou indirectement, ou en apparence: *Ainsi dit celuy qui n'est gueres bon Interprete: parce que Gerson ne declare pas le troisieme moyen par le mot apparter, mais interpreuatiue, qui sont deux mots quasi contraires, d'autant que ce qui est apparter, semble, & n'est pas, & interpretatiue represente ce qui est en effect & non en apparence, mais cela est de peu d'importance à l'affaire que nous traitons.*

Quant à la premiere proposition, il n'est besoing que ie la defende, puis qu'il l'aduouie pour veritable. C'est pourquoy ie passeray à la seconde, laquelle il reçoit pareillement comme vraye, & ne repréd pas Gerson, mais seulement son Interprete, qui luy eust eu de l'obligation pour son bon aduertissement

si par son equivoque il n'eust rendu tout confus. Car il est vray que *interpretatiue* veult quelquefois dire ce qui est & n'apparoist point, & signifie lors autant que tacitement, & s'entend de ce qui n'est pas clair, & a besoin d'interpretation, & n'est point opposé à ce mot (*verè*) mais bien au mot (*expresse*) en ceste signification l'on dit, *licentia interpretatiua*, c'est à dire, *tacita, non expressa*: mais quelquefois aussi il signifie ce qui apparoit, & n'est point, comme quand on dit que de ne saluer point, c'est vn mespris *interpretatiue*, c'est à dire, semble vn mespris, & peut estre ne l'est pas, & lors *interpretatiue* s'oppose à *verè*. Je ne sçay quel texte de Gerson à eu l'Interprete, mais au mien qui est imprimé l'an 1494. sur la fin de ceste proposition il est dit en termes formelles, & *isto modo reperitur contemptus in omni peccato, praesertim mortali, directè, vel indirectè, verè, vel interpretatiue*. Parquoy si *verè* est contraire à *interpretatiue*, cela ne peut estre *interpretatiue*, qui n'aparoit point, mais est reellemēt & de fait, cōme dit L'AVTEVR, d'autāt que ce qui n'est point en apparence & qui est neantmoins en effect, est certainement vray en soy. Et bien que cecy soit suffisant pour esclaircir la verité: P'adiousteray toutesfois que Gerson dit en sa troisieme proposition que le mespris en la troisieme façon, qui est *interpretatiue*, ne merite pas tousiours vne excommunication de l'Eglise: Or s'il ne la merite tousiours, il la merite donc quelquesfois: mais ce qui est & n'apparoist point, ne peut estre subject en façon quelconque aux censures de l'Eglise, cōme tiennent tous les Theologiens & Canonistes: Et par consequent *interpretatiue* n'est pas ce qui est

vrayement, & de fait, & qui n'apparoist point. Je croy que L'AVTEVR demeurera satisfait pour ce regard, & par mesme moyen l'Interprète absout du crime d'infidelité dont il l'accusoit, ce qu'ayant leu dans le Proëme de L'AVTEVR, ie m'attëdois trouver à la suite beaucoup d'autres lieux taxez de mesme, toutesfois apres l'auoir tout leu, ie ny trouuay que ce seul mot avec ceste addition (*Mais cela est de peu d'importãce. à l'affaire que nous traictons*) & me suis fort esmerueillé que quelqu'vn pour vn seul mot qui importe de peu soit noté d'infidelité, veu mesmes qu'on la prend sur vn equiuoque, qui est interpreté par Gerson au mesme lieu.

3. La troisieme proposition est, que le mespris des clefs en la premiere & seconde façon merite iustement l'excommunication de l'Eglise, & par consequent l'irregularité, mais en la troisieme il ne la merite pas tousiours, mais bien celle de Dieu, car qui peche mortellement est excommunié de Dieu. *Il n'y a que reprendre en ceste proposition, fors qu'aux dernieres parols, car parlant proprement de l'excommunication, il n'est pas vray que quiconque peche mortellement soit excommunié de Dieu, autrement les pecheurs ne pourroient assister à la Messe, ny au seruice diuin, sans pecher de nouueau, ce qui est faulx comme chacun scait.*

On voit en la troisieme proposition que l'affection demesurée de reprendre ne le transporte pas moins, que toutes les autres passions, & d'autât qu'il ne reprend pas Gerson en ce qu'il conclud icy, ains l'approuue entierement, il se met à le reprendre sur vn mot dit incidemment, & l'accuse d'auoir mal parlé quand il dit que quiconque peche mortellement est excommunié de Dieu, soustenanz que cela est faulx si on prend le mot d'excommunication

en sa propre signification, aultrement que les pecheurs ne pourroient assister à la Messe, sans commettre nouveau peché. Et ie luy dy que c'est proprement parler, que tout pecheur est excommunié de Dieu, parce qu'excommunier est vn mot general, qui signifie toute priuation de la communion: Mais il y a deux especes de communion entre les Chrestiens, l'vne interieure en charité avec Dieu & les saincts, qui est proprement communiõ, & partât sa priuatiõ est proprement excõmunication: l'autre est entre les mēbres de l'Eglise militāte, ou la charité n'est requise necessairement, à laquelle s'oppose l'excommunication qui est la censure Ecclesiastique, & selon icelle tout pecheur n'est excommunié, à cause dequoy il peut assister à la Messe, ou necessairement la charité n'est requise: Gerson aussi ne dit pas qu'il soit excommunié de la censure Ecclesiastique. Sainct Augustin 12. de Gen. *ad literam* chap. 40. vse de ces termes, *Adam ab esu ligni vitæ excommunicatus fuit*, & Gratian, *ij quest. 3. post c. ad mensam*, dit, *scilicet & Adam ab esu ligni vitæ excommunicatus est*, & post C. *non solum*, il dit encore, *quare ex reatu adulterij tandem apud Deum excõmunicatus fuerat*, ce qui se rapporte formellement aus paroles de Gerson. D'auantage excõmunication en Grec, c'est Anatheme, & les nostres mesmes ne distinguēt point *excommunicationem maiorem ab Anathemate*, & S. Paul dit, *cupiebam Anathema esse à Christo*, & en vn autre passage, *si quis non amat Dominum nostrum Iesum Christum, sit Anathema*. Or vienne qui voudra reprendre S. Paul d'auoir improprement parlé, puis qu'il est certain que tout pecheur *non amat Dominum Ie-*

sum, & partant qu'il est Anatheme, & puis il dira que Gerson à mal parlé. Il n'estoit de besoin, encor qu'il y eust quelque impropriété au langage, prenant l'intention de Gerson, qui ne parloit pas de l'excommunication qui est censure Ecclesiastique, demeurant d'accord du surplus, de le vouloir cōtraindre à certaines paroles en chose de nulle importance: Et cecy pouuoit suffire, mais i'ay voulu (apres auoir allegué S. Augustin, Gratian, & S. Paul) monstrier que L' A V T E V R reprend Gerson en ce qu'il merite plus de loüange.

4. La quatriesme proposition est qu'on ne doit dire que aucun mesprise les clefs en pas vne des trois manieres, quand le Prelat abuse manifestement, & notoirement de la puissance des clefs. *Ceste proposition est veritable, s'il entend de l'abus des clefs aux choses essentielles, comme si vn Prelat excetoit son pouuoir ou excommunioit quelqu'un sans au prealable auoir vsé de quelque monition, ou commandoit sur peine d'excommunication quelque chose contre le commandement de Dieu, car alors on pourroit dire avec saint Pierre au 6. des Actes, obediendum est magis Deo, quam hominibus. Mais iacoit que la doctrine de Gerson soit veritable, l'intention toutesfois de l'Interprete peut bien estre mauuaise, d'autāt que par aduanture il veult que l'on croye que l'excommunication fulminée par nostre S. Pere est notoirement vn abus des clefs estant au contraire vne custume legitime, & tres-ancienne, comme il se pourra facilement prouuer quand on traittera de ceste maniere.*

L' A V T E V R pouuoit bien laisser ceste proposition, puis qu'il n'y trouue que reprendre: La limitation qu'il y apporte, disant, qu'il est vray que l'abus

des clefs qui est manifeste & notoire excuse le fidele du mespris, pourueu qu'il soit aux choses essentielles, est superflüë. Car qui doubte que cela ne s'entende ainsi ? Ce mot, Abus, porte avec soy sa signification.

Mais quand L'AUTEUR adiouste qu'encore que la doctrine de Gerson soit veritable, l'intention toutesfois de l'Interprete peut bien estre mauuaise, c'est proprement combattre cõtre les ombres, puis qu'il se fonde seulement sur simples coniecturcs. Cela est-il conforme au commandement de S. Paul, qui deffend de iuger son prochain auãt que le Seigneur soit venu reueler le secret de nos cœurs ? Est-ce la ceste charité *qua non cogitat malum* ? La doctrine de Gerson est bonne, l'Interprete ne l'applique à aucun sens, n'en parle point d'auantage, ny adiouste rien du sien, & toutesfois on dit que son intention peut estre mauuaise. S'il y auoit quelque mot ambigu, qu'on peust tourner en tout sens bõ & mauuais, la charité Chrestienne nous commande de le prendre en bonne part : mais de coniecturer ce qui peut estre, pour blaïmer & reprendre quelqu'un, c'est excéder les termes de toute raison. Il declare quant & quant quelle pourroit estre ceste mauuaise intention de l'Interprete, disant, qu'il veult par aduanture qu'on croye que l'excommunication fulminée par nostre S. Pere cõtre la Republique est notoiremẽt vn abus des clefs, qui est au contraire vne coustume fort legitime & tres sainte, comme on le pourra clairement monstrier cy-apres lors qu'on touchera ceste matiere. Je ne scay de quoy il entend traitter, mais ie scay bien que ce debuoit estre principalement de

ce point, qui est en controuerse, & lequel estant vuidé mettroit fin à ceste contention qui ne se peut autrement terminer: C'est pourquoy ie voudrois que l'AVTEUR en eust discouru bien à plain, & eust laissé le reste à part, comme estant hors de propos.

5. La cinquiesme proposition est, que quand le Prelat abuse de la puissance des clefs, il mesprise plus les clefs, & peche plus grieuement, que ne fait le subiect en desobeissant à son Prelat, & de la s'ensuit que c'est vne oeuvre meritoire en tel cas de resister en face au Prelat, comme fit S. Paul à saint Pierre. Il y a bien dequoy discourir sur ceste proposition, mais d'autant qu'elle ne viêt à propos, nous-nous contenterons de dire seulement deux choses. La premiere que la doctrine de Gerson ne semble pas estre bien certaine ny bien fondée, parce que laissant à part les particularitez & diuerses circonstances, en comparaison desquelles il se peut faire qu'aucunesfois le Prelat peche plus en abusant de sa puissance, aucunesfois le subiect en desobeissant, si nous considerons simplement que c'est abuser de la puissance, & ne vouloir obeir à la puissance, nous trouuerons que la desobeissance est plus grand peché que n'est pas l'abus, parce que qui abuse de la puissance peche en iniustice, & n'offence qu'un sien subiect: mais qui ne veult obeir au Prelat commandant iustement, & mesprise son excommunication, commet peché de rebellion, & offense la diuine Maiesié en la persone de son Vicaire, & ainsi le dit Iesus-Christ en S. Luc 10. chap. Qui vos spernit, me spernit, & l'Apostre en la premiere aux Theſſaloniſiens 4. chap. Qui hæc spernit, non hominem spernit, sed Deum, & ceste façon de mesprimer Dieu en son Vicaire, est appellée vne espece d'Idolatrie par le prophete Samuel au premier liure des Rois chap. 15.

Je ne peux pas répondre à ce qu'on qu'on pourroit dire, & n'a esté dit par L'AVTEVR, ny le doibs deviner, pour ne pecher en donnant vn iugemēt temeraire. Il objecte deux choses, la premiere, que la doctrine de Gerson ne luy semble pas fort certaine, ny bien fondée, parce qu'il peut aduenir, que selon les circonstances le Prelat quelquefois peche plus en abusant, & quelquefois le subject en desobeissant.

L'AVTEVR ne trouuera iamais aucun Theologien, qui venant à faire comparaison de deux pechez, pour sçauoir lequel est le plus grand, la face *ex circumstantiis*, mais seulement *ex genere*: La consideration *ex circumstantiis* est infinie, & n'y a personne de sain entendement qui s'arreste sur ce qui est infiniment variable: & S. Thomas 22. quest. 39. art. 2. dit formellement, *dicendum quod grauitas peccati dupliciter potest considerari, vno modo secundum suam speciem, alio modo secundum circumstantias. Et quia circumstantia particulares sunt infinita, ita & infinitis modis variari possunt, cum queritur in communi de duobus peccatis, quod sit grauius, intelligenda est questio de grauitate, quæ attenditur secundum genus peccati.* Ceste proposition est tres-veritable, & tres-expressse, que l'homicide est pire que le larcin, mais il peut aduenir qu'un meurtre aura des circonstances si fauorables, & vn larcin de si exagerantes, que le larcin sera estimé beaucoup plus grief. Et qui tiendroit la doctrine de L'AVTEVR pour veritable, ne pourroit iamais faire comparaison entre deux pechez. Gerson avec cela a déclaré, que ce n'est son intention de faire aucune comparaison *ex circumstantiis*, mais bien *ex genere*, quant il dit, *faisant seulement comparaison*

avec l'Abus: L' A V T E V R pour certain n'a prins garde à ces parolles, car il n'eust fait aucune objection. Par apres il se met aux champs, & assure le contraire, disant, que considerant en soy-mesme l'abus de la puissance, & le refus d'obeir à la puissance, il trouue que la desobeissance est plus grand peché que l'abus.

La raison qu'il ameine est, que qui abuse de la puissance, n'offense que celuy qui luy est subject, & qui ne veut obeir au iuste commandement du Prelat, & mesprise la censure, commet peché de rebellion, & offense la diuine Majesté en la persone de son Vicaire, d'autant que *qui vos spernit, me spernit, &c. & qui hac spernit, non hominem spernit, sed Deum*: & Samuel appelle ce melpris de Dieu en son Vicaire vne espece d'Idolatrie. Nous auons icy deux auteurs fort contraires l'vn à l'autre, l'vn sans passion estant decedé il y a plus de cent cinquante ans, & l'autre encor viuant, qui est en partie de ceste controuerse.

Voyons donc les raisons de l'vn & l'autre, & premièrement celles de L' A V T E V R. Nous auons montre cy-dessus, que ces mots, *Qui vos spernit, me spernit*, ont esté dictz aux predicateurs, qui annoncent la parolle de Dieu: le Lecteur peut voir ce qui est escrit en ce lieu, pour estre mieuls informé comme cela se doit entendre. Mais il adioute apres que Iesus-Christ au iour du iugement dira aux reprouués, *Quandiu non fecistis vni de minoribus his, nec mihi fecistis*. De sorte que voicy encor l'authorité de l'Escriture, pour montrer que nostre Sauueur tient & reputé l'iniure faicte à luy-mesme

qui est faicte à chascun fidele, & ce qu'il dit en l'Euangille, *Quandiu non fecistis*, n'est point allegué hors du sens litteral: car remonstrer, & corriger doucement est vn œuvre de charité, comme au contraire *cum austeritate imperare & cum potentia*, est directement contre charité. Quand à ce que S. Paul dit *qui hæc spernit, non hominem spernit, sed Deum*, ie ne peus comprendre à quel propos il est allegué. Car quand S. Paul dit, *qui hæc spernit*, il parle des choses par luy dictes, & partant en quelle sorte se peut il accommoder aux commandemens du Prelat? S. Paul exhorte les Thessaloniffiens à faire de bonnes œuvres, & de bons progrès selon les commandemens de Dieu: & sçachez (dit-il) quels commandemens ie vous ay donnés de la part de Iesus-Christ, & les specifie, sçauoir qu'ils soient purs & nets, qu'ils fuyent la paillardise, & se gardent de tromper leur prochain, & puis il conclud, *qui hæc spernit, non hominem spernit, sed Deum, qui etiam dedit spiritum in nobis*. Chacun entendra facilement que S. Paul par ces paroles à voulu dire, Dieu à commandé telles choses, ie vous ay signifié les commandemens, qui les mesprise, c'est Dieu mesme qu'il mesprise, qui m'a donné son saint Esprit pour les vous faire entendre. Appliquons maintenant à nostre subject le dire de S. Paul, sans l'escire en plus de paroles, & concluõs que quand le Pape nous enseignera les preceptes de Dieu il pourra adiouster, *qui hæc spernit, non hominem spernit, sed Deum*. Mais ie ne sçay en verité comme les gens de bien pourront trouuer bon, que lon compare aucun de ce temps à S. Paul, & vn Decret de qui que ce soit, à vne escriture Canonique. S. Paul

escriuant, & ayant ferme foy que Dieu l'assistoit
 d'une grace particuliere, & n'estoit en danger de
 commettre aucune faute, pouuoit dire librement,
qui hæc spernit, non hominem spernit, sed Deum. Mais
 celui qui ne peut dire pour le certain qu'il a l'assistã-
 ce du S. Esprit, si nõ lors qu'il decide quelque poinct
de fide ex cathedra, ne pourra pas assurement dire en
 vn decret qui n'est pas d'un poinct concernãt la foy,
qui hæc spernit, non hominem spernit, sed Deum. C'est biẽ
 encor vne animositẽ semblable a la premiere, d'alle-
 guer a ce propos le dire de Samuel au. i. des Roys
 chap. 15. *quasi peccatum ariolandi est repugnare, & quasi
 scelus Idololatriæ nolle acquiescere.* Samuel comme
 Prophete auoit par expres commandement de Dieu
 enioinct a Saül de ne laisser aucun Amalechite viuãt
 & de tuer encor tous leurs animaux: Saül ayant sau-
 uẽ le Roy Agag, & le bestail pour sacrifier, Samuel
 luy repliqua, que Dieu ayroit mieüx obeissance
 quẽ sacrifice, & quẽ c'estoit comme vn pechẽ d'I-
 dolatrie de n'obeir a son commandement: Nostre
 A V T E V R voudroit icy comparer vn commande-
 ment humain subject a erreurs, a vn expres comã-
 dement de Dieu, qui est d'autoritẽ canonique.
 S'il se trouuoit maintenant quelqu'un ayant l'au-
 thoritẽ de Prophete & de Docteur Canonique, qui
 aãnonceast quelque chose au nom de Dieu, *eset
 quasi scelus Idololatriæ nolle agnoscere.* Mais les oreilles
 pieuses ne peuuent supporter telles comparaisons
 des choses humaines avec les diuines: Il est tres-
 dangereux d'esgaler vn homme a Dieu. C'est bien
 vne chose sainte de remõstrer l'obeissance, & hon-
 neur qu'on doibt aux Prelats, mais de l'estendre
 hors

hors de ses bornes, & la mettre au pair avec les Escritures Canoniques, c'est plustost l'abbaisser, que l'exalter. Qui pourra entendre cecy sans s'esmerveiller grandement, que Samuel dict plus d'vnze cens ans auant qu'il y eust aucun Pape, que c'est cōme Idolatrie de n'obeir à l'expres commandement de Dieu faict par la bouche de son Prophete? & nostre AVTEVR dit, que mespriser Dieu en la persone de son Vicaire est vne espece d'Idolatrie, ainsi appellée par Samuel au i. des Rois chap. 15.

L'AVTEVR ne niera pas que saint Pierre a esté le premier Vicaire de Dieu, que Dieu n'auoit point de Vicaire au vieil testament, que l'authorité du prophete au vieil testament estoit infaillible, mesmes aux choses plus petites, que le Vicaire de Dieu au nouueau testament ne puisse faillir, excepté aux pointcs de la foi, & des coustumes vniuerselles *ex cathedra*. Comment donc peut dire L'AVTEVR, sans se mocquer de nous, que le Prophete Samuel appelle ce mespris de Dieu en son Vicaire vne espece d'Idolatrie?

Ie fors maintenant de ceste matiere serieuse, pour venir à vne aultre de moindre consequence. Nostre AVTEVR interprete icy *quasi scelus Idololatrie* vne espece d'Idolatrie, comme qui diroit, *nonaginta nouem, sunt quasi centum*, nonante neuf sont vne espece de cent: Ce que ie ne mettrois en auant s'il ne s'estoit luy-mesme monstré trop feure reformateur contre l'Interprete de Gerson en chose qui ne le meritoit pas. Mais retournons au sens, & que le lecteur remarque cest artifice: Tous les pechez sont contre dieu, mais aucuns d'iceux touchent im-

mediatement la Majesté diuine, comme le blaspheme de son S. Nom, l'Idolatrie & autres semblables: D'autres sont directement contre le prochain, & par mesme moyen contre Dieu, comme sont l'adultere, le meurtre, & le larcin: de ces deux sortes sont les pechez desquels nous traiçtons à present: La desobeïssance du subject enuers son Superieur, est directement contre vn homme, mais finalement elle va contre Dieu: pareillement le gouuernement tyrannique du Superieur est immediatement contre le subject, & mediatement contre Dieu, & nostre **AUTEUR** pour se iouïr de nostre simplicité quand il parle de l'abus de la puissance, il dit, que c'est contre vn subject, & quand il vient à parler de la desobeïssance, il assure que c'est offenser la Diuine Majesté en la persone de son Vicaire. Si quelqu'un disoit au contraire, le Prelat qui abuse de sa puissance, offense Dieu en sa creature: & celuy qui mesprise la césure, offense vn homme, que diroit-il? Mais nous procederons sincerement faisants les choses egales. Le refus d'obeïr offense Dieu en la persone du Superieur, & l'abus de la puissance offense Dieu en la persone du subject. Or voyons maintenant de ces deux offenses enuers Dieu, laquelle est la plus grande. S. Thomas qui fait souuent des comparaisons entre les pechez, dit tousiours que le peché est priuation du bien, & partant qu'ou le bien dont y a priuation est plus grand, aussi est le peché, comme le lecteur peut voir *in 2. quest. 150. art. 3. 154. art. 3. 39. art. 2.* & en plusieurs autres endroits. Le bien, dont la desobeïssance nous priue, est vn bien particulier du subject, qui est la vertu d'obeïssance, & le bien

dont l'abus de la puissance nous priue, est le bõ gouvernemēt de l'Eglise, qui est vn bien beaucoup plus grand, d'autant que le bien public est tousiours plus grand que le particulier, comme aussi c'est plus grãde vertu de bien commander, que de bien obeyr : & c'est la raison sur laquelle Gerson s'est fondé, qui est solide, & n'est appuyée d'aucune autorité qui soit tirée hors de son vray sens. Qui voudroit encor cõsiderer l'enormité du peché, ou par le mal qui en prouient, ou bien par la persone qui le commet, encor que ces considerations soient accidentelles, & qu'il se faille arrester seulement sur la premiere, on trouueroit neantmoins qu'vn seul abus de la puissance apporte plus de scandale & detrimēt au mōde, que ne scauroient faire cent pechez de desobeissance: Ioinct que le Superieur comme plus eminent en honneur & dignité est plus obligé enuers Dieu à faire son debuoir.

Par la 2. nous disons qu'encor que ce puisse estre quelquefois œuvre meritoire de resister en face au Prelat, c'est toutesfois pour l'ordinaire chose fort scandaleuse & meschante. Et de mettre en auant vne telle proposition au fait qui se presente pour inciter & animer les subiects à mespriser les commandemens du Vicaire de Iesus-Christ, cela est du tout insupportable: Car S. Paul ne resista point à S. Pierre en vn fait d'obeyssance, mais sur le subiect d'vne certaine obseruation legale, de laquelle Dieu voulut permettre que S. Paul fust mieuls esclaircy pour faire voir à vn chascun l'humilité de S. Pierre, qui receut fort volontiers la correction fraternelle de S. Paul, qui estoit Apostre & remply de la grace du S. Esprit comme luy. Mais en matiere d'obeyssance & de respect S. Paul a tousiours exhor-

té les subiects d'obeyr aus Prelats, & luy-mesmes vint en Hierusalem trouuer S. Pierre pour conferer avec luy de l'Euangile qu'il preschoit, bien qu'il l'eust par reuelation, cōme luy-mesme le tesmoigne au chap. 1. de l'Epistre aus Galates. Or voyons maintenant quelle seroit ceste consequence. S. Paul Apostre, & vaisseau d'election a osé admonester & corriger S. Pierre, partant les hommes feront œuvre meritoire de resister en face au Pape quand il leur commanderà quelque chose sur peine d'excommunication: Ce seroit vne consequence, non pas d'un bon Logicien, mais d'un meschant Schismatique.

Je ne scay pas pourquoy il met icy pour seconde objection à Gerson, qu'encore que ce soit quelquefois œuvre meritoire de resister au Prelat, cela toutefois pour l'ordinaire est cause d'un grand scādale, veu que Gerson dit, qu'aucunefois c'est chose meritoire de resister en face au Prelat, mais que pour le respect de la puissance Ecclesiastique, il y faut proceder modestement sans exceder les termes d'une defense legitime, comme fist S. Paul à l'encontre de S. Pierre: Il me semble que L'AVTEVR dit le mesme que Gerson, sinon que Gerson a entierement deduit ce qui se pouuoit dire sur ce subject, en adioustant vne limitation pour la defense, qu'il dit deuoir estre irreprehensible, à cause dequoy j'ay pensé que pour plus grande lumiere, il seroit bō de rapporter icy les propres mots de Gerson (*cum appositione inculpata tutela.*) Que veut L'AVTEVR d'auantage si la defense est irreprehensible? Qui osera dire qu'estant telle, il y ait du crime ou du scādale? Que L'AVTEVR ne nous vienne point icy alleguer que c'est ordinairement chose scādaleuse, car nous dirons

avec sa permission que toutes & quantesfois que de la part du Prelat il y aura notoirement vn abus de la puissance, & que la defenſe du ſubject ſera irreprehenſible, il ſera touſiours veritable que c'eſt vne œuvre meritoire d'y reſiſter. Et c'eſt en ce cas que Gerſon l'entend, quand il dit (*quelquesfois*) en le limitant ſ'il fault ainſi dire avec des paroles dorées, que L'AVTEVR exprime ainſi, *en certain cas il peut eſtre meritoire*: De ſorte qu'il ſemble auoir apporté pour objection contre Gerſon vne confirmation de ſon dire. Quand L'AVTEVR adiouſte par apres que c'eſt choſe inſupportable d'alleguer vne telle propoſition au fait qui ſe preſente, cela n'eſt pas contre Gerſon, ains contre ſon Interprete, comme ſi ayant mis en auât les douze propoſitions, il euſt dit qu'elles ſeruoient toutes au fait dont eſt queſtion: Il falloit, pour mieuls faire, rapporter tout le liure entier, afin que par apres le Lecteur en tiraſt ce qu'il y euſt trouué à propos pour noſtre ſubject. Par meſme raiſon, d'autant que Gerſon dit en ſa neuſieſme propoſition, *Si le Pape vouloit rauir les threſors de l'Egliſe, ou uſurpèr le bien d'icelle, ou reduire en ſeruitude tout le Clergé, & le ſpolier iniuſtement de toutes ſes facultez, &c.* L'AVTEVR pourra objecter à l'Interprete qu'il l'allegue ici pour dire que le Pape rauit les treſors de l'Egliſe, &c. Ce qui n'eſt pas; mais paraduâture que L'AVTEVR, qui void bien en quoy ceſte cinquieſme propoſition peut ſeruir au faiçt qui ſe preſente, impoſe hardiment cela à l'Interprete. Maintenant pour ſçauoir ſi l'exemple de S. Paul eſt bien allegué ou non; ie ne diray aultre choſe, ſinon que le Cardinal Caietan l'a auſſi allegué ſur ce pro-

pos en ses opuscules, & le Cardinal Bellarmin en son second liure *De Rom. Pontif.* cite Caietan sur ce mesme propos, & admoneste de le voir. Cest exemple a esté pareillement mis en auant en vn semblable fait par Dominique Sotus, par François Victoria, & aultres Docteurs fort celebres. Il est bien vray ce que dit L'AUTEUR, que S. Paul ne resista point à S. Pierre pour cause d'excommunication, (car elle n'estoit pour lors encore en vſage) & que S. Paul proceda contre l'incestueux Corinthien suivant & conformémēt à l'institutio de Iesus-Christ: Mais aussi est-il certain qu'en Antioche S. Pierre commandoit tacitement par son exemple à tous ceuls qui y estoient presens sur le mesme subject dōt nous parlons, comme S. Paul le tesmoigne par ces mots, *Et simulationi eius consenserunt ceteri Iudei, ita ut & Barnabas duceretur ab eis in illam sententiam*, à quoy S. Paul s'opposa; & ne faut point que L'AUTEUR die qu'il n'estoit question de commandement, ny d'obeissance, veu que c'est le principal subject qui s'y traite: Ioinct aussi que ceste consequence est fort bonne, que si on peut resister au cōmandement que le superieur fait tacitement par son exemple, à plus forte raison le peut-on faire cōtre vn commandement qui est expres, & sur peine d'excommunication.

Je ne ſçay pas à quel propos L'AUTEUR vient par apres à raconter que S. Paul fut trouuer S. Pierre pour cōferer avec luy de l'euāgile qu'il preschoit: mais ie ſçay bien que l'Escriture ne dit pas ainsi, & ses paroles sont telles, *Deinde post annos tres veni Hierosolimam videre Petrum, & mansi apud eum diebus quin-*

decim: Alium autem Apostolorū vidi neminem, nisi Iacobum fratrem Domini: quæ autem scribo vobis, ecce coram Deo, quia non mentior, deinde veni in partes Syria, &c. Il y a bien en vn autre endroit, Deinde post annos quatuordecim iterum ascendi Hierosolymam cum Barnaba assumpto & Tito: ascendi autem propter reuelationē, & contuli cum eis Euangelium quod prædico in Gentibus. Il parle bien au premier voyage d'auoir visité S. Pierre, mais nullement d'auoir conferé avec luy; & au second il ne parle point de visitation, mais de la conférence qu'il a faicte, non pas avec S. Pierre, ains cum illis, du nombre desquels il est vray que S. Pierre estoit: doncques L'AVTEVR a mis les deux voyages de S. Paul distans l'vn de l'autre de plus de quatorze ans pour vn seul: & ce qui est dit, contuli cum illis, qui s'entend avec toute l'Eglise de Hierusalem, ou autrement avec les trois Apostres, Iaques, Cephas, & Ieā, (lesquels S. Paul nomme en cest ordre) L'AVTEVR l'explique avec S. Pierre seulement. Mais ie scaurois volontiers pourquoy en traittant de ceste conference, on n'a adiousté cecy: *mibi enim, qui videbantur esse aliquid, nihil contulerunt. Sed è contra, cum vidissent, quod creditum est mihi Euangelium præputij, sicut Petro circumcissionis: qui enim operatus est Petro in Apostolatum circumcissionis, operatus est mihi inter gentes, & cum cognouissent gratiam quæ data est mihi, Iacobus, & Cephas, & Ioannes, qui videbantur columna esse, dextras dederunt mihi, & Barnabæ societatis, vt nos in gentes, ipsi autem in circumcissionem, tantum vt pauperum memores essemus*: parce que de ces parolles il auroit paraduantage tiré la conséquence. L'Escriture rapporte deux actiōs de S. Pierre, ausquelles il a esté re-

prins depuis auoir receu le S. Esprit, l'vne en l'Epistre aux Galates, l'autre en l'vnziemesme chapitre des Actes des Apostres, quand les Iuifs conuertis entrerent en contestation avec luy, de ce qu'il auoit receu les Gentils à l'Eglise: En la premiere il y auoit quelque default de la part de S. Pierre, & en la seconde il fut repris à tort. S. Paul dit du vieil testament, *quacunque scripta sunt, ad nostram doctrinam scripta sunt,* & nous le pouuons dire du vieil & du nouveau: Car par ce second exemple le Superieur est aduertuy avec quelle charité & doctrine il doibt rendre capable le subject qui conteste avec luy, mesme contre raison: S. Pierre n'excommunia pas ces Iuifs, ains les instruisit par l'authorité des reuelations diuines. **Q**UANT A V T E V R nous montre par aucun exemple en toute la saincte Escriture qu'on ait deub proceder autrement contre la Republique de Venise, & nous y acquiescerons. Quant à l'autre exemple de l'Epistre aux Galates, où il n'est fait aucune mention de ce que S. Pierre respondit, ains seulement de l'opposition de S. Paul, il ne peut seruir d'instruction au Prelat, mais bien au subject, pour scauoir comme il se doibt gouverner quand le Superieur abuse de sa puissance: Et cecy mesme montre clairement combien cela repugne au vray sens de l'escriture de dire, que Dieu eust disposé ce qui aduint pour faire voir l'humilité de S. Pierre, d'autant qu'il eust esté necessaire d'y adiouster l'humble response de ce saint personage; & au contraire l'Escriture tait ce que S. Pierre respondit, & met seulement la reprehension de S. Paul, pour montrer que cest exemple n'est point pour rendre preuue de l'humilité de S. Pierre

mais bien pour seruir d'instruction aux subjects, cōme ils se doibuent comporter à l'endroict de leurs Superieurs, sans que de leur part il en puisse arriuer aucun scandale. Si l'Autheur a quelqu'autre passage de l'Escriture, où le Superieur ayant oultre-passé le deu de sa charge, le subject ne se soit deuëment opposé, qu'il le monstre, & pareillement nous y soubscrirons. Nous tenons ceste consequence pour tresbonne & infaillible, S. Pierre a failly, doncques tout Pape peut faillir : S. Paul luy resista auëc grande humilité, doncques la resistance, qui est faite en ceste façon est licite & permise. Et pour luy mōstrer la force de ceste consequence, ie luy diray que Caietan en son traitté de *auctoritate Papa & Concilij*, assure qu'on doibt s'opposer en face au Pape, quād il abuse de sa puissance, où apres vn long discours il dit ainsi, *abusui namque potestatis, qui destruit, obuiam eant congruis remedijs, non obediendo in malis, non adulando, non tacendo, arguendo, aduocando illustres ad increpandum, exemplo Pauli, &c.* dōcques le Cardinal Caietan qui fist ceste consequence, ne fut pas bon Logicien ains vn meschant schismatique ? Mais que dirōns-nous de ceste-cy ? Sainct Paul exhorte les subjects d'obeir à leurs Prelats, & vient trouuer S. Pierre, donc il leur faut obeir quand ils abusent de leur puissance: Ie remets à L'AUTEUR d'en dire ce qu'il luy plaira: S'il me dit qu'il ne parle pas de l'abus, ains de l'usage legitime de la puissance: Ie respondray que Gerson ne parloit que de l'abus, & non de l'usage legitime, & que nous condāmnōs tous ceux qui n'obeissent à leurs superieurs, quand ils commandent ce qui est prescrit par celuy qui leur a dō-

né la puissance, comme aussi nous condamnons les superieurs qui abusent d'icelle.

6. La sixiesme proposition est, que l'on peut supposer vn cas, auquel plusieurs refusants d'obeir au Prelat, l'un sera contempteur des clefs, & l'autre non, d'autant que le premier croira que la sentence du Prelat soit iuste, ou estimera qu'il soit tenu d'y obeir pour quelque autre raison, là où le 2. sçaura pour certain, ou du moins aura vne probabilité suffisante, que son Prelat abuse de la puissance des clefs. Il n'y a rien à dire sur ceste proposition, sinon qu'il ne suffit pas d'auoir telle probabilité, ny de tel abus de la puissance des clefs que ce puisse estre, pour n'estre tenu d'obeir au Prelat, ains selon la commune opinion est necessaire, que ce soit chose certaine & toute notoire que le Prelat abuse de la puissance aux choses essentielles, parce que c'est vne maxime generale prise de S. Augustin au liure 22. chap. 15. contre Faustus, & suiue des autres, que le subiect est tenu d'obeir, non seulement quand il est certain que le commandement du superieur n'est point contre Dieu, mais aussi quand il y a quelque doute s'il est contre Dieu, ou non, parce qu'en cas douteux il doit suiure l'opinion du superieur, & non la sienne propre: & lors seulement qu'il est indubitable que c'est contre Dieu, il n'y doit obeir, parce que comme il a esté dit cy dessus *obediendum est Deo magis, quam hominibus.*

Je ne sçay que dire sur ceste sixiesme proposition, sinon m'esmerueiller de ce que l'AVTEVR, poulsé d'une affection particuliere de contredire, donne vne limitation, comme fait aussi Gerson en moins de parolles, & plus clairement, disant, qu'il peut arriuer qu'en vn mesme fait quelqu'un sera desobeyssant par expres, & vn autre non, sçauoir qu'ad celuy-là estime que la sentence soit iuste, ou pour

quelque autre raison pensé estre tenu d'y obeyr: & cestuy-ey au contraire ne l'estime pas ainsi, mais scait assurement, ou du moins a vne probabilité suffisante que son Prelat abuse de son autorité au preiudice des clefs; & L'AVTEVR y apporte ceste restrictiō, qu'il ne suffit pas d'auoir quelque probabilité que ce soit: ce que Gerson ne dit pas aussi, ains dit vne probabilité suffisante: & pour moy ie dy & maintiens qu'une probabilité suffisante est assez, & que c'est toute l'assurance qu'on peut desirer es choses humaines & morales, & n'estime pas qu'aucun puisse dire le contraire, s'il ne veult impliquer vne contradiction. Partant tout ce que L'AVTEVR dit en beaucoup de l'angage, Gerson l'exprime mieux en peu de parolles & fort clairement: de sorte qu'ils sont d'accord ensemble. Mais ie ne veuls pas que quelqu'un s'abuse sur ce que L'AVTEVR adiouste, qu'en cas douteux il faut suiure le iugement du superieur, & non le sien propre, parce que vn fait est douteux en deux sortes, ou pour le regard de celuy qui ne s'est pas mis en peine de s'en instruire, ou bien de celuy, qui apres vne exacte recherche n'en a peu estre esclaircy. Au premier cas celuy qui est en doute si le commandement à luy fait est contre Dieu, ou non, il est tenu de faire tout ce qu'il luy est possible, tāt par soi mesme que par l'aide d'autrui pour s'en informer, autrement il peche grandemēt contre Dieu, & se met en danger de contreuenir à sa loy: & pour celuy qui apres vne exacte diligence demeure encor en ce doute, les Docteurs luy permettent de suiure le iugement du superieur. Ie croy bien que l'Auteur a eu ceste mesme opinion: mais il

se faut garder des ambiguitéz, parce que les faulses doctrines se glissent facilement sous pre-
 texte & apparence de bonnes. Quand il inculque
 tant de fois que le subiect est tenu d'obeyr, non seu-
 lement quand il est certain que le superieur ne cõ-
 mande chose aucune contre Dieu, mais aussi quand
 il est incertain si le commandement est contre Dieu
 ou non, parce qu'en cas douteus il doibt suiure
 l'opinion du superieur, & non la sienne propre, &
 seulement il peut refuser d'obeyr, lors qu'il sçait
 pour certain que le commandement est contre
 Dieu: nous sommes en fin contraints luy repliquer
 que son affirmation n'est pas veritable, sinon quand
 le subiect n'est pas bien assureé que le commande-
 ment du superieur soit cõtre Dieu apres l'auoir suf-
 fisamment examiné, & alors en cas de doute, il doit
 suiure le iugement du superieur: & quand il sçait
 pour certain que c'est contre Dieu, il n'y doit obeir:
 mais s'il est en doute pour n'y auoir aduiseé, il y doit
 meurement penser auant que d'obeyr.

Je ne voudroy pourtant qu'il tirast de cecy vne
 consequence, que comme le subiect est tenu d'obeir
 en vn cas entierement douteus (ie le veux ainsi
 nommer pour fuir l'equiuoque) le superieur aussi
 puisse commander en vn tel cas, parce qu'il peche
 tousiours commandant chose que luy mesmes n'est
 pas certain si elle est obligatoire: ainsi le conclud &
 le prouue Adrian, *quod. lib. i.* d'autant que l'authori-
 té du superieur ne s'estend pas aux choses douteu-
 ses, & est contre la loy naturelle (dit Adrian) d'asseu-
 rer que l'authorité des clefs s'estende à ce qui est
 douteus: mais le subiect est tenu d'obeyr en vn cas

entierement douteux , parce qu'il doibt croire que s'il est douteux pour son regard, il ne l'est pas à l'endroict du superieur. Mais s'il apparoiſſoit que le superieur auſſi en fut en doute, il n'est pas tenu d'obeir. De sorte que quand le superieur comãde en vn cas douteux, & le ſubject ſçait que le superieur meſme le tient pour tel, & commande ſeulement pour s'auantager, il n'est pas tenu d'y obeyr. Il ne ſera impertinent d'adiouſter qu'il fault que le doute qui oblige le ſubject ait deux conditions, l'vne qu'il ſoit entierement douteux pour ſon regard, & l'autre, qu'il ne ſçache point que le superieur le tienne pour douteux.

7. La ſeptieſme propoſition eſt, que pour cognoiſtre le meſpris des clefs, il faut aduiſer à la puiſſance legitime, & au iuſte gouvernement d'icelle: & partant le dire comũ, qu'on doit craindre la ſentẽce du paſteur, ou du iuge, encor qu'elle ſoit iniuſte, a beſoin de Gloſe. *Ceſte propoſition eſt bonne, & la gloſe de ce comũ dire ſe trouue dans les ſacrez Canons, eſquels il eſt inſerẽ, ſçauoir dans le decret de Gratian 2. qu. 3. en pluſieurs chapitres, dont le Sommaire eſt tel, qu'on doibt craindre la ſentence du paſteur, quand elle eſt iniuſte & au ſurplus valable, comme quand il n'y a aucun deſaut des formes eſſentielles, ains ſeulement de quelques choſes accidentelles: pour exemple, vn Prelat legitime excommunie vn ſien ſubiect à iuſte occaſion apres l'auoir aduertiy, mais il ne l'excommunie point tant pour le deũ de la iuſtice, que pour vne baine particuliere qu'il luy porte; il ne l'admonẽſte point par trois fois, ny ne reduit pas la ſentence par eſcrit, ceſte cenſure eſt iniuſte, elle eſt toutesfois valable, & partant on la doit craindre. Et quand bien encore elle ſeroit deſe-*

étuense, & qu'on ignorerait la defectuosité, elle seroit
 aussi à craindre, du moins pour le scandale. Je ne m'arres-
 te point à prouuer cecy, car il est trop clair, veu mesme que
 Gerson ne le nieroit pas. Et vn chacun pourra recueillir de
 ceste proposition, que la censure de nostre S. Pere le Pape
 Paul V. fulminée contre les chefs de la Repub. de Venise a
 toutes les conditions requises, tant essentielles, qu'acciden-
 telles, & partant est à craindre, estant non seulement
 valable, mais aussi tres-juste. Car si tu demandes la
 puissance legitime, tu trouueras qu'elle est souveraine, don-
 née de Dieu, vniuerselle sur tous ceux qui pretendent estre
 du troupeau de Iesus-Christ, & membres du corps mystic
 de l'Eglise, Citoyens de la Cité de Dieu, & ses domestiques.
 Qu'elle soit vniuerselle, il se voit en S. Matthieu 16. chap.
 en ces parolles, quodcúmque ligaueris, & quodcúm-
 que solueris, & qu'elle soit sur tous, il se voit aussi en S.
 Iean 21. Pasce oues meas, ou il n'exécpte point particu-
 lierement celle-cy, ou celle-la des brebis, mais il y comprend
 toutes celles qui sont à luy; & qui ne le croit ainsi, n'est
 point Catholique. Si tu demandes la coustume legitime, tu
 trouueras qu'on n'a manqué à faire toutes les admonitions
 necessaires, & toutes les parties requises en vn ordre iudi-
 ciaire. Si tu demandes finalement pourquoy, tu trouueras
 que c'est pour la defense de la liberté Ecclesiastique, laquel-
 le le S. Concile de Trente, en la 25. Session chap. 20. dict
 estre fondée in ordinatione diuina, & aux constitutions
 des sacrés Canons, & pour laquelle nous scauons que plu-
 sieurs saints Prelats ont combattu iusques à la mort. Dieu
 a rendu fort celebre la memoire de S. Thomas de Cantorbie
 par vne infinité de miracles, & l'a déclaré son vr.ay cham-
 pion & martyr, comme aussi depuis a fait l'Eglise, pour
 auoir respandu son sang pour la liberté d'icelle.

L'AVTEVR a esté d'aduis d'apporter en ceste septiesme proposition la glose de ce commun dire, que la sentence du Prelat, ou du iuge, encor qu'elle soit iniuste, neantmoins est à craindre, laquelle Gerson a voulu obmettre, & passer outre, pour estre toute notoire, & rapportée par tous les Docteurs. Or nō seulement ie soufcris à ce que dit L'AVTEVR, mais i'adiouste aussi qu'encor que la sentence soit notoirement non valable, neantmoins elle est à craindre en vne façon, sçauoir, pour ne la point mespriser audacieusement; ains avec toute modestie & respect, empescher l'execution d'icelle: Et encor que la glose alleguée contienne vne bonne doctrine, la consequence toutesfois qu'il en veult tirer n'est pas bonne, qu'en la sentence de nostre S. Pere dont est question, toutes les choses requises tant essentielles qu'accidentelles y ayent esté obseruées, & qu'elle soit non seulement valable, mais aussi tres-iuste. Il le montre ainsi: Si tu demandes vne puissance legitime, tu trouueras que c'est vne puissance Souueraine donnée de Dieu, & vniuersalissime, ce qu'il prouue par ce passage *quodcūque ligaueris* en S. Matthieu 16. & par celui du 21. chap. de S. Iean, *Pasce oues meas.* Quant au sens les Catholiques n'apportent aucune difficulté à ceste proposition, mais ce nouveau mot *vniuersalissima*, est ambigu, & pris en vn bon sens, estant limité aux choses concernantes le Royaume des cieux, & selon les regles de l'Euangille à l'edification de l'Eglise, on le voudra estendre par apres aux choses mondaines. Et S. Gregoire au 6. liu. ep. 30. ne trouue pas bon qu'on l'appelle *Papa vniuersalis*, il tient cela pour suspect, & dit que c'est vn til-

tre trop ambitieux, & qui signifie autant que s'il estoit seul Euesque, & qu'il n'y en eust aulcun autre que luy. Par mesme raison auoir vne autorité vniuersalissime, est autant à dire (selon l'interpretation de saint Gregoire) que d'auoir seul autorité souueraine: Le tiltre d'Euesque vniuersel supprime tous les autres, aussi l'autorité vniuersalissime casse & annulle toutes les autres: nous ne debatrons pas du mot, pourueu qu'on l'interprete comme il faut. Voyons comment il prouue ceste autorité vniuersalissime: Il est dit à S. Pierre, & par consequent en sa persone à tous les Papes, *quodcūque ligaueris, &c. quodcūque solueris, &c.* la puissance donc est vniuerselle: Or en S. Matth. 28. il est dit à tous les disciples, & par consequent aussi à tous leurs successeurs, *quacūque ligaueritis, &c. quacūque solueritis, &c.* Il y auroit donc plus d'une autorité vniuersalissime, ce qui implique en soy vne contradiction. Il est vray que *quodcūque* est vniuersel, mais il est restrainct par les parolles precedentes, *claves Regni cælorum.* Qui doute que tout ce qui appartient au Royaume des cieus ne soit subject à S. Pierre? mais Iesus-Christ ne l'a point chargé de ce qui appartient aus Royaumes de la terre. L'autre preuue par ce passage, *Pasce oues meas* est bien vniuerselle aussi pour le regard de ces mots, *oues meas*: Mais Dieu en Ezechiel 34. chap. nie que se vestir de la peau de la brebis, soit *pasce*: il nie aussi que commander *cū austeritate, & potentia*, boire l'eau claire, & troubler le demeurant avec les pieds, soit *pasce*. L'auteur poursuit pour monstrier que la iustice de la sentence ne prouient seulement de la puissance le-

gitime, laquelle nous luy accordons encor, mais aussi de l'usage legitime, disant, qu'il ne s'y trouue aucun default de plusieurs admonitions, ny de chose quelconque requise en l'ordre iudiciaire: Il ne falloit pas assurez cela, mais bien le prouuer, comme il s'y estoit offert. Et quiconque verra les raisons de la Republique, cognoistra aussi tost qu'il y a eu default de plusieurs choses, voire des plus necessaires & essentielles, & que la deffense de la liberte Ecclesiastique, comme dit L'AUTEUR sans le iustifier, n'a point donné subject à ceste censure. Et si la chose est si claire, comme il dit, pourquoy est-ce qu'il ne met en lumiere les raisons Ecclesiastiques *in facto & in iure*? Pourquoy ne permet-il qu'un chacun voye les defenses de la Republique, afin qu'elle soit conuaincüe? Il n'est pas bon de vouloir icy empescher qu'on voye les escrits des gens doctes, si ce n'est pour cacher la verité, & faire voir à un chacun la cause toute desguisée, comme fait L'AUTEUR en cest endroit, disant, qu'en la sentence du Pape Paul V. fulminée contre les chefs de la Republique de Venise toutes les formes requises y ont esté obseruées, & les deux sentences signifiées, l'une le iour de Noël, & l'autre le 25. de Februrier, portant excommunication contre la Republique, & non contre les chefs seulement, comme nous dirons en son lieu.

Auant que passer oultre il fault que ie cote icy vne ruzze de L'AUTEUR, d'auoir allegué le passage du Concile en la sessiõ 25. chap. 20. où il est dict que la franchise Ecclesiastique est fondée sur l'ordonnance diuine, & sur les constitutions des sacrez Canõs :

cen'estoit pas icy le lieu d'en traitter, ny bien seant de proposer avec parolles ambiguës vne doctrine qui requiert vn grand progres, de crainte de troubler l'Estat paisible de la sainte Eglise. Mais pour en dire à present ce qui pourra suffire pour antidot au lecteur, ie le veux aduertir, que mōsieur le Cardinal Bellarmin au 28. chap. du 1. liure de *clericis* tire de là quelques conclusiōs: la premiere, que les clerics aux causes Ecclesiastiques *iure diuino* sont exempts de la iurisdiction des Princes Seculiers; & la cinquiesme, que l'exemption des Clercs au fait de la police, tant pour leurs persones, que pour leurs biēs est introduicte par le droict humain, & non diuin: Voila donc comment s'entend le Concile, qui dit l'exemption Ecclesiastique auoir esté establee *iure diuino*, sçauoir pour les causes Ecclesiastiques, de sorte que L'AVTEVR deuoit traduire *constitutam ordinatione diuina*, establee par ordonnance diuine, & nō pas fondée, parce qu'il semble que ce mot veuille signifier que les Canons ont la puissance de Dieu de l'establi, ce qui n'est pas: L'exemption aux choses spirituelles est totalement, & expressément *de iure diuino*, & aux autres cas elle est sans doubte *de iure humano*. Quant à l'exemple de S. Thomas qui est mort pour la defense de la liberté Ecclesiastique, ie ne le nie pas, mais c'a esté pour la vraye liberté, & nō pour empescher la punition des crimes, ny pour augmenter les facultez des Ecclesiastics. Maintenant si quelqu'vn au lieu de la consequence que tire L'AVTEVR en rapportoit vne toute contraire en la mesme forme, disant, on peut recueillir de cete proposition que la sentence du Pape Paul V. fulminée

contre le Duc, le Senat, & la Republique de Venise, & cõtre tout leur Estat, est defectueuse en plusieurs formes essentielles sans toucher aus accidentelles, & partant on ne la doibt craindre, estant non seulement de nul effect & valeur, mais aussi iniuste: On pourroit mieulx prouuer ceste consequence que L'AVTEVR n'a faict la sienne, mais cela seroit hors de propos, veu qu'il s'agit seulement icy de la defense de Gerson, & suffira de dire qu'un chacun est du troupeau de Iesus-Christ, mais que Dieu l'a pourueu de sa defense naturelle, au cas que le pasteur se desuoie de l'institution du suprême Pasteur Iesus-Christ.

3. La huitiesme proposition est, que l'abus des clefs en la persone du Pape cause plus d'inconueniẽt que si l'inférieur en abuse, parce que de l'abus de l'inférieur on peut appeller au Pape, mais de l'abus du Pape on n'en peut appeller qu'au Concile general, lequel ne se peut si facilement assembler. Et bien que du commencement du Concile de Constance plusieurs ayent tenu qu'il n'estoit pas permis d'appeller du Pape au Concile, toutesfois le mesme Concile a déclaré expressẽment que c'est heresie de nier que le Concile soit par-dessus le Pape. *Ceste proposition contient vne erreur tres-dangerense & notoire, & qui la met en auant sur le faict qui se presente, il monstre qu'il n'est gueres bon Catholique.*

Il sera necessaire d'vser d'un long discours sur cete huitiesme proposition, non qu'elle le requiere, mais parce que L'AVTEVR a longuement & artificiellement discouru, & qu'il faut descoutrir ses artifices, afin que persone en le lisant ne se laisse emporter par sa subtilité. Gerson en ceste proposition dit, que le mespris des clefs à l'endroit du Pape porte

plus de danger, que celuy qui est fait à l'endroit d'un inferieur.

L'AVTEVR tourne ces paroles ainsi : *L'abus des clefs en la personne du Pape cause plus d'inconuenient qu'en la personne de l'inferieur.* Est-ce là rapporter fidelemēt ce qu'on veult impugner ? Gerson parle du mespris que fait le subject des commandemens du Pape, & dit que ce mespris est plus dangereux que celuy des preceptes des Prelats inferieurs : & L'AVTEVR estime qu'il die, que le peché du Pape en abusant des clefs, porte plus de dommage que celuy des Prelats inferieurs, en commettant le mesme abus : De sorte que l'un parle de l'action du subject enuers le superieur ; & l'autre de celle du superieur enuers le subject, l'un du mespris fait par le subject, & l'autre de l'abus des clefs commis par le superieur. La proposition de Gerson est en faueur du S. Siege Apostolique, & monstre qu'il faut proceder en son endroit avec plus de respect & reuerence, disant, que le mespris d'iceluy est plus dangereux que de tous les autres : L'AVTEVR le fait dire au contraire, que l'abus commis par le Pape apporte plus de peril, que celuy qui est commis par les inferieurs, d'où l'on peut inferer qu'on doit porter moins de respect au S. Siege qu'aux autres Prelats. Est-ce là vne dispute, ou plustost vne imposture recherchée pour auoir moyen de contredire ? Je ne sçay ce que L'AVTEVR pourra respondre icy. La principale intentiō de Gerson en ceste proposition est, que quand il est question de s'opposer aux preceptes & censures des prelates, il est necessaire d'y aduiser de plus pres si on le veult faire contre le Papē, & en rend ceste raison,

parce qu'il y a recours des inferieurs au Pape, & fait ceste obiection contre soy-mesme : Si quelqu'un di-
 soit qu'on peut aussi appeller du Pape au Concile.
 à quoy il respond, qu'autresfois ceste obiection
 estoit de nulle valeur, quand on tenoit que le Pape
 estoit par dessus le Concile, mais à present que cela
 ne se peut dire pour les raisons qu'il allegue: & neant-
 moins quand il auroit lieu, qu'il seroit plus dange-
 reux de s'opposer au Pape pour vne aultre raison,
 qui est, qu'on ne peut & ne doit si facilement as-
 sembler & tenir vn Concile pour causes de peu d'im-
 portance, comme pour vider quelques appellations.
 Voila le sens de la proposition de Gerson, de laquel-
 le (Lecteur) si tu ostes ce seul poinct de la superiori-
 té, tu n'y trouueras chose que L'AVTEVR mesme
 selon son propre aduis puisse reprendre, & cecy y a
 esté mis incidemment : mais comme il est tousiours
 attaché à vne mesme fin, il l'a prins pour le poinct
 principal, & a dit qu'elle contenoit vne erreur tres-
 grande & manifeste, & que qui la met en auant sur
 le fait qui se presente, n'est gueres bon Catholique.
 Luy-mesme sçait bien que la Serenissime Republi-
 que n'a pas estimé expedient qu'on s'aidast du bene-
 fice de l'appel, d'autant que le Prince & le Senat ont
 publiquement déclaré dequoy ils entendoient se
 preualoir, ce que persone n'a encore mis en auant
 sur ce propos. On ne peut deuiner quelle intentio
 a eu l'interprete de Gerson auparauant la declaratio
 faite par la Republique; & d'ailleurs la charité ne
 permet pas qu'on en iuge: Mais quand L'AVTEVR
 dit qu'il se montre peu Catholique, est-il possible
 qu'il se soit souuenu de la doctrine de monsieur le

Cardinal Bellarmin, lequel au liure 2. de *authoritate Concilij*, chap. 13. qui est intitulé *an Concilium sit supra Papam*, dict, *Et quamuis postea in Concilio Florentino & Lateranensi ultimo videatur questio diffinita, tamen quia Florentinum Concilium non ita expressè hoc diffiniuit, & de Concilio Lateranensi, quod expressissimè rem diffiniuit, nonnulli dubitant an fuerit verè generale. Ideo vsque ad hanc diem questio superest etiam inter Catholicos.* Je le prie de reuoir ceste doctrine, escrite long temps auparavant qu'il se rendist passionné pour ce qui est à present en contention: car pour se sauuer de ceste contradiction, ie ne voy point qu'il puisse dire autre chose, sinon ce qu'il dit au chap. 17. où il parle autrement, disant du Concile de Latran à ce propos, *Quòd vero Concilium hoc rem istam non diffinierit propriè, vt decretum de fide Catholica tenendum, dubium est, & ideo non sunt propriè heretici, qui contrarium sentiunt, sed à temeritate magna excusari non possunt*: vrayment ces deux passages si proches l'un de l'autre ne semblent pas s'accorder, car d'arguer de temerité ceux qu'il nomme Catholiques, il ne montre point qu'il procede avec charité: & outre ce, bien qu'il se voulust seulement aider de ce dernier passage, il n'est pas toutesfois suffisant pour prouuer entierement que l'Interprete soit peu Catholique, parce qu'une opinion temeraire peut bien estre encor fort veritable: Autresfois la commune opinion tenoit que les Anges estoient corporels, & estoit reputé pour vne grande temerité de les dire estre sans corps, au contraire pour le present on tient communément qu'ils sont incorporels, sans qu'il soit iugé temeraire de le dire & le croire ainsi: Tout de mesme en est-il

de ce fait. Martin Nauarre au chapitre *Nouit de iudic.* rapportant les parolles de Iean Maior, declare fort bien que la question est en debat, & qu'il n'est pas permis à Rome de tenir la doctrine de Panormitan, qui soustient la superiorité du Concile, & que neantmoins l'vniuersité de Paris permet qu'on la suiue.

Que dirons-nous de Iean Mariana Moderne Iesuiste, qui en son liure *de Regis institutione* (approuué de toute la compagnie des Iesuistes, veu & examiné par commandement du Roy d'Espagne) dit appertement que les plus grands docteurs tiennent en ceste question l'une & l'autre partie? Ceste opinion ne se peut toutesfois appeller temeraire, parce que l'opinion temeraire selon Melchior Canus, qui en a donné vne exacte definition, est celle qui n'est soustenuë d'aucune raison ny autorité, ou bien qui est maintenuë avec audace & opiniastreté. Or vne opinion qui est defenduë par autant de grands & celebres docteurs, comme est la contraire, & suiue de pareil, ou plus grand nombre d'vniuersitez, de Royaumes & Prouinces, ne se peut dire estre destituée de raison & d'autorité, ny audacieusement debattue. La charité n'enseigne pas d'arguer si legèrement de temerité: mais si L'AUTEUR vouloit discourir à vn chacun son affection particuliere, il pouuoit en peu de parolles exprimer sa conception sans entrer en vn si long discours contenant trois fueilles de papier, pour monstrier que l'opinion de Gerson n'est pas veritable, & contraindre ceuls qui font estat de ce grand personage, à dire ce qu'ils ne voudroient. Or pour agiter solempnellement ceste question, il dit ainsi:

Et pour commencer au Concile de Constance, il dit trois choses: la premiere, que ce Concile n'a declaré en lieu quelconque que ce fust heresie de nier la superiorité du Concile par dessus le Pape: qu'on voye & reuoye bien tout le Concile, cela ne s'y trouuera point. La seconde, qu'il y a vn decret en ce Concile sess. 4. où il est declaré que le Concile de Constance represente l'Eglise vniuerselle, & prend la puissance immediatement de Iesus-Christ, à laquelle vn chacun est tenu d'obeir, & le Pape mesmes. Ce decret suiuant l'interpretation des plus doctes ne s'entend generalement du Pape, ains seulement de celui qu'on doute estre Pape, comme du temps qu'il y en auoit trois qui se disoient l'estre, & auoient leurs adberans; Et est indubitable que l'Eglise peut declarer lequel est le vray Pape, & que ceux qui en temps de schisme debattent du Papat, sont tenus d'obeir à la sentence de l'Eglise & du Concile general. Mais on ne peut inferer de ce decret, que quand le Pape est canoniquement esleu, & vrayment recogneu pour tel, il soit tenu d'obeir à l'Eglise, ou au Concile. La troisieme, que ce decret ne peut seruir à aultre effect qu'à remedier au schisme, parce que n'estant le Pape pour lors au Concile, c'estoit vn corps sans chef, & par ainsi n'auoit aucune autorité de determiner quelque poinct de la foy, ny d'autres de plus grande importāce. Et biē que le Pape Martin V. ait par apres approuué ce Concile de Constance, c'a esté seulement pour quelques decrets particuliers & legitimes, comme ceux qui furent faits contre l'heresie de Iean Vuiclef, & Iean Hus; mais nō pas le decret de la superiorité du Concile par dessus le Pape, comme n'estant legitimement fait avec vne exacte recherche & dispute preccedente en recueillant les opinion des peres, ains fut vn decret simplement ordonné, comme ils voyoient bon estre, pour remedier au schisme. Dont Pic 2.

au Concile de Mantouë excommunia ceux qui appelloient du Pape au Concile, & le Pape Iule 2. renouuella ceste excommunication, ainsi que tesmoigne Siluestre, in verbo excommunicatio VII. nu. 93. comme depuis tous les Papes la renouueller en la Bulle dicte in cœna Domini, & finalement le Pape Martin V. ordonna du consentement du mesme Concile de Constance, que ceuls qui estoient suspects d'heresie seroient interrogez sur plusieurs articles, & entre autres s'ils croyoient que le Pape eust la souueraine puissance en l'Eglise de Dieu, veu qu'il est certain qu'ayant ceste souueraineté, le Concile ne peut estre par dessus luy, autrement la Souueraine puissance seroit au Concile; & non au Pape, par où l'on voit que le decret du Concile de Constance en la quatriesme Session se doit entendre comme dessus, ou bien qu'il y a de la contrariété, ce que quand on admettroit, il faudroit neantmoins adiouster plus de foy au second decret fait par le Pape, & le Concile ensemble, qu'au premier, qui n'est fait que par le Concile sans le Pape, c'est à dire par le corps sans son chef.

Ie neveux pas maintenir que l'opinion de Gerson soit veritable, ny alleguer sa doctrine, & ses raisons en ceste Apologie; mais ie diray bien que celles qui sont icy deduites par L'AVTEVR contre luy ont esté veuës & resoluës par le mesme Gerson, ou par autres de mesme aduis depuis luy: & i'ameray icy quelques vnes de ces resolutions, nō pour definir chose aucune, mais seulement pour môstrer qu'il faut appuyer ceste dispute sur des fondemens plus solides, & ne point condamner si legeremēt des personages excellēs en doctrine, & saincteté de vie. Sur le Concile de Constance, duquel Gerson parle, nostre AVTEVR dict trois choses: la premiere, que

ce Concile n'a point déclaré en lieu quelconque que ce soit heresie de nier la superiorité du Concile pardessus le Pape. Si L' A V T E V R entend que ceste forme de parler ne soit dans le Concile (*nier l'authorité du Concile par dessus le Pape est heresie*) il dit vray: s'il veult dire encore que le Concile de Constance n'a ordonné que qui niera la superiorité du Concile *fit anathema*, il dit pareillemēt vray. Mais Gerson nie que le Concile ne l'aye determiné (ie ne dy pas mon aduis, ains celuy de Gerson) en la mesme façon qu'on resoult les choses de la foy, & croire le contraire est estimé heresie: cela se voit en la 4. Session en ces mots: *Ordinat, disponit, statuit, decernit, & declarat*: & en la 5. Session, il repete la mesme doctrine vsant de ces termes, *Ordinat, diffinit, decernit, & declarat*: c'est pourquoy Gerson dit en ceste proposition que c'est vne heresie condamnée par ordonnance tres-expresse, & obseruée au Concile de Constance, comme il a esté ailleurs plus amplement monstré: L' A V T E V R pouuoit lire les lieux alleguez par Gerson en ses œuvres, où il auroit peu voir ce qu'il respond à ces obiections. Le Concile de Trente a condamné sans doute pour heresie de nier le Purgatoire, toutesfois on ne trouuera pas qu'il die, nier le Purgatoire est heresie, ou, qui niera le Purgatoire *anathema fit*, mais la doctrine du Purgatoire est fort expresse en la Session 22. & 25. de forte qu'on la voit resoluë comme vn poinct de la foy, & qui en ce discours prendroit les mesmes parolles de L' A V T E V R, & diroit, le Concile de Trente n'a déclaré en aulcun endroit que ce soit heresie de nier le Purgatoire, qu'on voye & reuoye exactement tout le Concile, cela ne s'y trouuera point, il

monstreroit que s'astreignant trop aux paroles, il laisseroit le sens, & on en dira tout de mesmes pour le regard de Gerson.

La seconde objection faite par L'AUTEUR cõtre Gerson est, que les plus doctes tiennent que le decret du Concile de Constance s'entend seulement de *Papa dubio*, & non pas de *Papa certo*, laquelle objection contrarie en tout & par tout à la premiere, d'autant que si le decret du Concile quel qu'il soit ne tient point pour heretique celuy qui est d'opiniõ contraire, & s'entend seulement de celuy qui n'est pas vrayement Pape, ce ne sera donc pas heresie de dire que qui n'est pas vrayement Pape, n'est point subject au Concile, & neantmoins c'est vne heresie toute apparente & manifeste: Partant quiconque dira que le decret s'entend de *Papa dubio*, il fault qu'il die aussi que ce decret tient pour heretique celuy qui contrarie à ce qu'il determine, aultrement qu'il le faut entendre de *Papa certo*. Ce que dit L'AUTEUR est veritable, que les plus doctes tiennent qu'il parle de *Papa dubio*, mais il est vray aussi qu'il y en a d'autres non moins sçauants qui l'interpretent de *Papa certo*, & n'y a autre difference entre euls, sinon que ceuls-la ne se sont point trouuez au Concile, & entre ces derniers sont tous ceuls qui y assisterent, & consecutiuellement tous leurs successeurs qui se trouuerent au Concile de Balse, desquels faut necessairement qu'il y ait eu grand nombre, veu que ce Concile est distant de l'autre de quinze ans ou enuiron.

Dauantage L'AUTEUR debuoit prendre garde que Gerson ne dit pas seulement *heresie condannée*,

mais aussi *observée*, & par mesme moyen voir ce qui a
 esté pratiqué au Concile de Constãce, & aduifer s'il
 cõmande seulement *dubio Papa*, ou bien encore *certo*.
 Qu'il lise la Session 17. il trouuera que le Concile
 ordonne qu'aucun Pape ne pourra demettre An-
 ge Corrarius (dit auparauant Gregoire 12.) du Car-
 dinalat, ou de la legation de la marque que le Con-
 cile luy a donnée, ny le rechercher ou punir en façõ
 quelquõque pour ce qu'il auroit fait & administré
 durant son Pontificat. Qu'il lise encor la session 39.
 apres la deposition de tous les Papes non legitimes,
 où il est commandé à tous les Papes futurs de tenir
 en certain temps les Conciles generauls: qu'il re-
 marque aussi les paroles, par lesquelles il oblige
 chascun Pape à l'execution de cela: qu'il voye en
 apres la Session 44. où le Pape Martin V. desia esleu
 fait executer ce decret, & qu'il obserue entre autres
 ce mot (*teneatur*) qui est au decret du Concile, & en
 l'execution. Puis qu'il considere, comme en la der-
 niere sessiõ les Ambassadeurs de Pologne & Litua-
 nie supplierent humblement le Pape de vouloir
 auant la fin du Concile condamner en vne session
 publique vn certain liure de frere Ieã Falkembergh,
 protestants à faulte de ce faire pour & au nom de
 leurs maistres *de grauamine, & de appellando ad futu-
 rum Concilium*, de laquelle protestation le Pape ne se
 tint aucunement offensé, & n'en fut le Concile da-
 uantage esmerueillé. Ainsi L'AUTEVR par ceste
 obseruation cognoistra, que de la forme & teneur de
 tout ce decret on peut recueillir, que le Pape cano-
 niquement esleu, & vrayement recogneu pour tel
 est tenu d'obeir à l'Eglise & au Concile, encor qu'il

maintienne au contraire qu'on n'en peut tirer ceste consequence, mais conioignant le decret avec toutes ces obseruations, il cognoistra que Gerson a tresbien parlé.

La troisieme objection faite par L'AUTEUR est que ce decret n'est à autre fin que pour remedier au schisme, parce que le Concile estoit vn corps sans chef: mais preuoyant ce qu'on lui pourroit objecter de la confirmation d'iceluy par Martin V. il remarque qu'il fut approuué par ce Pape seulement pour les decrets legitimement faits, & que cestuy-cy n'est pas tel, n'estant fait avec cognoissance & dispute precedente, & par les aduis des Peres. Mais où est-ce que L'AUTEUR trouuera que ce decret ait esté fait sans ces obseruations? Par aduantage qu'il le croit ainsi, parce qu'il ne s'en trouue rien par escrit: Et au Concile de Trente il n'est aulcunement parlé de disputes faictes, ny d'aduis donnez, est-ce à dire pour cela qu'il n'y a eu aucune chose legitimement faicte? Tout de mesmes il faut croire pour certain, que prealablement ce decret a esté bien examiné & debatú, encor qu'il n'en apparaisse par escrit aux actes du Concile de Constance, puis que plusieurs grands personages se mirent deslors à escrire sur ce Concile, & Gerson au mesme temps composa ce tres-docteliure, *De potestate Ecclesiastica, & origine iuris & legum*, comme le lecteur peut voir: Et il montre bien encor en ceste proposition qu'il y eust de grandes contentions sur ceste matiere, puis qu'il dit qu'elles commencerent au Concile de Pise, qui fut cinq ans auparauant celuy de Constance. Et qui doute qu'en l'vn & en l'autre & durant les cinq

années d'interuale, la difficulté n'ait esté agitée, & que pour la terminer on n'ait recueilly les voix & opiniōs? Si quelqu'vn veut prédre la peine de lire la confirmation de Martin V. il verra clairement que (*conciliariter*) ne signifie pas ce que L'AVTEVR dit, & que c'est vrayement vn *interpretatiuè*. En la session 45. & derniere il est dit que la Messe finie avec les Litanies, le Cardinal de S. Vite par commandemēt du Pape, & du Concile dist, *Domini ite in pace*, & luy fut respondu *Amen*, & par apres vn Euesque de l'ordre du Pape voulant faire vne predication pour la fin du Concile, les Ambassadeurs du Roy de Pologne, & du grand Duc de Lituanie demāderēt, cōme il a esté cy-deuant dit au nom de leurs maistres, qu'vn certain liure de Iean Falkemberg fust condāné envne session publique, comme il auoit desia esté par les deputez *in causa fidei*, par les nations du Concile, & par le college des Cardinauls, à quoy le Pape fist response qu'il approuuoit tout ce qui auoit esté cōclud & arresté par le Concile touchāt les poinctz de la foy *conciliariter* & non autremēt, par où lō voit que *conciliariter* icy est opposé à ce que dirent les Ambassadeurs, que le liure auoit esté condamné par les deputez, par les nations, & par le College à part, & que c'est autant à dire qu'en session publique. Mais disons encore plus particulierement, que si ceste response a esté faicte par le Pape sur le sujet d'vne demande inopinément proposée apres le Concile finy, il est donc vray de dire qu'il n'estoit auparauant approuué, que le Pape n'auoit directement intention de l'approuuer, & que si ces Polaqes n'eussent de bonne fortune fait ceste instance,

nous n'aurions point pour authentique la condamnation de Vuiclef & de Jean Hus, & de là s'ensuiura qu'un Concile general aura esté confirmé par accident. Il fault encore icy remarquer la façon de parler de L' A V T E V R, que ce Concile estoit vn corps sans chef, d'où il veut inferer que pendant le Siege vacant l'Eglise doit estre tenuë imparfaite, comme luy manquant quelque chose essentielle.

Or apres la mort de Marcellin l'Eglise fut sept ans sans Pape parmy les persecutions de Diocletian, comme tesmoigne Damafus, & qui dira pourtant qu'en ce temps plein de sainteté l'Eglise manqua de quelque chose essentielle? Je sçay qu'aucuns se fondants sur certaines coniectures ne tiennent pas que le Siege ait si longuement vaqué: mais nous croirons avec plus d'apparence de verité que Damafus (qui fut Pape soixante neuf ans apres la mort de Marcellin, & naquit vn peu apres le Siege vacant) sçauoit mieux ce qui en estoit que nous par nos coniectures. Mais qu'on en croye ce qu'on voudra, & parlons de choses plus certaines: Apres le deces de Clement V. aduenu en l'année 1270. l'Eglise demeura sans Pape enuiron trois ans, dira-on pour cela que lors elle estoit sans chef? Il fault croire la doctrine de saint Cyprian, & de saint Augustin
24. *quest. 1. cap. quodcumque, & cap. sequitur.*

En fin L' A V T E V R conclud son discours de l'invalidité de ce Decret du Concile de Constance, disant, qu'à ceste occasion le Pape Pie I I. au Concile de Mantouë excommunia tous ceux qui appelleroient du Pape au Concile. Or ces termes (qu'à ceste occasion) monstrent la cause de l'abus, parce

qu'ils signifient que le motif, qui a induit le Pape Pie II. a excommunier tels appellans, a esté d'autant que le Pape est par dessus le Concile : mais la Bulle de Pie ne dict pas ainsi, ains elle defend seulement telles appellations, parce qu'on appelle à ce qui n'est pas, & ne sçait-on quand il sera, & cependant les perits sont oppressés par les grands, les crimes demeurent impunis, la rebellion contre le S. Siege se nourrit, toute liberté de pecher est permise, la discipline Ecclesiastique, & l'ordre Hierarchique se confondent, par où il n'appert point que Pie II. se soit fondé sur sa Superiorité, qui estoit vne raison pregnâte, & claire, puis qu'on ne peut appeler qu'au Superieur : Et qu'on ne die point que cela se puisse tirer des termes de la Bulle d'autant qu'on n'a point coustume de laisser en arriere ce qui est de l'essence, pour mettre en auant & coter exactement tant de choses incidentes. Outre ce, auant que proposer ces raisons & motifs, il dict, qu'il laisse les autres pour estre de moindre importance, & qu'il suffit d'auoir touché les moyens principauls, qui monstre clairement qu'il n'entend en façon quelconque y comprēdre le fait de la Superiorité. D'auantage nostre AVTEUR s'abuse de dire *au Concile de Mantouë*, car le Pape Pie ne fut iamais en aucun Concile, ny general, ny Prouincial; on sçait bien qu'il fut en passant à Mantouë, & n'auoit avec luy que sa Cour, comme le porte expressément le contenu de la Bulle, qui dict, *De vobis & consentement de noz freres les Venerables Cardinaux de la Sainte Eglise Romaine, & de tous les Prelats, & interpretes du droit diuin & humain, qui suiuent la Cour, &c.* Mais ce

qu'adiouste l'Auteur est encore pis, que Pie II. excommunia ceux qui appelloient du Pape au Concile, & que Iule II. renouuella cest excommunication, comme ont fait tous les Papes du depuis *in bulla Cœna Domini*. Si la Bulle de Pie II. & celle de Iule II. & toutes les autres qu'on liët *in Cœna*, ne se trouuoient encore, ie ne luy pourroy repliquer: mais ie dy qu'il n'y a Pape aucun qui ait iamais excommunié ceux qui appellent au Concile, ains seulement qui appellent au Concile futur: on peut voir & lire toutes les bulles: & parce que *Pœna sunt restringenda*, il n'y a Canoniste qui die, que *appellantes ad præsens Concilium* (s'il y en auoit vn) soiët excommuniés en vertu de ces bulles; veu mesmes que par icelles on peut inferer la superiorité estre au Concile. Ie ne sçay pourquoy L'AVTEVR a obmis ce mot *futurum*. Si l'interprete de Gerson eust commis vne telle faute, quelle censure auroit-il encouru? La raison de Pie II. est bonne, qu'on ne doit appeller à ce qui n'est point, ny ne sçait on quand il sera, c'est à dire au futur Concile; mais l'appellation est valable au Concile present; & pour ceste cause les Papes ont excommunié *appellantes ad futurum Concilium*: nous n'obmettrons pas de nostre part ce mot *futurum*, comme fait nostre aduersaire.

Après ceste digression L'AVTEVR reuiet encore à Constance, & diët, que le Pape Martin V. par l'aduis du Concile ordōna que ceuls qui estoiet suspects d'heresie seroient interrogez, s'ils croioient que le Pape eust la Souueraine puissance en l'Eglise de Dieu: & conclud par là, que le Concile a entendu parler de la Superiorité du Pape: & que le Decret de

la quatriesme Session se doit interpreter de *Papa dubio*, suiuant son exposition, parce qu' autrement il y auroit de la contrarieté au Concile.

Mais pour scauoir comment s'entendra l'interrogatoire dont parle le Pape & le Concile, que L'AUTEUR prenne la peine de voir la huitiesme Session, où entre les quarante cinq articles de Vuiclef condamnez, le quarante vniesme est, *Non est de necessitate Salutis credere Romanam Ecclesiam esse supremam inter alias Ecclesias*, à quoy le Concile adiouste, *Error est, si per Romanam Ecclesiam intelligat vniuersalem Ecclesiam, aut Concilium Generale, aut pro quanto negaret primatum Summi Pontificis super alias Ecclesias particulares*. Ce seul passage monstre clairement que le Concile de Constance entendoit la Superiorité du Pape estre sur chacune des Eglises à part, mais non pas sur toutes ensemble. Et de là nostre AUTEUR laissant le Concile de Constance, vient à prouuer que l'opinion de Gerson est manifestemēt erronnée, par l'autorité de l'Escriture & des Conciles, & par aultres raisons, disant,

Mais laissant à part le Concile de Constance, on peut prouuer sommairement par l'autorité de l'Escriture, des Conciles, & de la raison, que l'opinion de Gerson est manifestement erronnée. L'Escriture Saincte ne donne en aucun lieu autorité à l'Eglise, ny aux Conciles par dessus leurs Prelats, & moins encore sur le Souuerain Pasteur: mais bien au contraire, saint Paul au 20. chap. des actes des Apostres dict, que Dieu a mis les Euesques pour gouverner son Eglise: & Iesus-Christ dict à son Vicaire, en saint Mattheu 16. chap. Super hanc Petram ædificabo Ecclesiam meam, ou nostre Seigneur faisant saint

Pierre le fondement de l'Eglise, le constitue pareillement chef du corps mystic de l'Eglise, d'autant que ce qui est fondement en la maison, est comme le chef au corps. Et nous voyons que le chef a puissance sur tout le reste du corps, & qu'au contraire le reste du corps n'en a point sur le chef. Ainsi en saint Iean 21. chap. quand nostre Sauueur dict à saint Pierre, Pasce oues meas, il l'establit pasteur de tout son troupeau : & n'y a point de doute aucun, que le troupeau n'a aucune puissance sur le Pasteur, mais bien le pasteur sur le troupeau. Finalement quand Iesus-Christ dict en saint Luc 12. chap. Quis est fidelis dispensator, & prudens, quem constituit dominus super familiam suam ? il declare certainement que l'Euesque en son Eglise particuliere, & le Pape en l'vniuerselle, est comme l'intendant, ou maistre d'hostel general en la maison de Dieu. Et comme l'intendant a puissance sur toute la famille, & non la famille sur luy, ainsi l'Euesque a puissance sur son diocese, & le Pape sur toute l'Eglise, non pas le diocese sur l'Euesque, ny l'Eglise assemblee en Concile sur le Pape : & pourtant nostre Sauueur adiousta au mesme lieu, Quod si dixerit seruus ille in corde suo, moram facit dominus meus venire, & cœperit percutere seruos, & ancillas, edere, bibere, & inebriari, veniet dominus serui illius in die qua non sperat, & diuidet eum, partemque eius cum infidelibus ponet. Desquelles parolles on peut recueillir, que quand l'intendant de la maison de Dieu ne se gouverne pas bien en sa charge, Dieu ne veut pas qu'il soit puni par la famille, ains se reserve l'authorité de le iuger & punir. Donques l'Eglise, & par consequent le Concile, qui represente l'Eglise, n'ayant selon les Escritures Sainctes aucun pouuoir sur le Pape, il s'ensuit qu'on ne peut appeller du pape au

Concile, mais bien du Concile au pape.

Il n'estoit besoin faire icy vn grand discours sur ceste matiere pour si peu qu'en a dict Gerſon, & ne rapporteroyſ icy ce que luy meſme & les autres de meſme opinion reſpondent, ſi ce n'estoit pour garder l'ordre que ie me ſuis propoſé au commencement, de prendre de ſuite tous les poincts oppugnez par L'AVTEVR. Il di& premierement qu'il ne ſe trouuera lieu aucun, où l'Eſcriture ſaincte donne autorité à l'Egliſe par deſſus ſes Prelats, & moins encor ſur le Souuerain Paſteur: Gerſon reſplique à cecy, que noſtre Seigneur renuoya ſainct Pierre à l'Egliſe, quand il luy diſt *dic Eccleſia*, car Gerſon liſoit de ſon temps, non ſelon le Miſſal reformé, ains ſelon l'ancien, *reſpiciens Ieſus in diſcipulos ſuos, dixit Simoni Petro, ſi peccauerit, &c.* comme L'AVTEVR pourra voir dans ſes œures, outre les paſſages de l'Eſcriture ſaincte qu'il allegue à ce propos. L'AVTEVR par apres pour monſtrer meſme le contraire dans l'Eſcriture ſaincte, amene vne autorité de ſainct Paul au 20. chap. des Actes des Apoſtres, où il diſt que Dieu a ordonné les Eueſques pour gouuerner ſon Egliſe. Poſé qu'il die ainſi, (parce que ces termes *poſuit vos Epiſcopos* ſ'interpretent autrement, que *poſuit Epiſcopos*,) ie dy qu'il ne peut conclure par là, que le Pape ſoit plus par deſſus l'Egliſe, qu vn autre Eueſque quel qu'il ſoit: mais on en pourra bien tirer, que tous les Eueſques ont immediatement leur autorité de Dieu, ce qui ne plairoit gueres à L'AVTEVR.

Quelle apparence y a il en ceste conſequence? Dieu a eſtably les Eueſques pour regir. & gouuer-

ner son Eglise, *ergo Papa est supra Concilium*: mais celle cy seroit bonne, Dieu a ordonné les Euesques pour gouverner son Eglise: doncques ceux qui ne la regissent, & gouvernent, ne font pas la charge à laquelle Dieu les a deputez. Ceste proposition est bien veritable, Dieu a estably le Roy pour gouverner le Royaume, doncques le Roy est superieur de tout le Royaume ensemble: & L'AVTEVR toutefois dict vn peu apres, que ceste consequence n'est pas bonne, mais c'est selon son aduis, & celuy de Iean Mariana Iesuite: & pour moy ie diray seulement qu'il ne s'ensuit pas pourtant qu'il soit superieur de tous les Royaumes.

En second lieu il allegue le passage de saint Mathieu au 16. chap. *Super hanc Petram edificabo Ecclesiam meam*, où il dict, que Iesus-Christ fait saint Pierre le fondement de l'Eglise, Gerson ne le nie pas, puis que saint Paul dict, que l'Eglise est posée sur le fondement des Apostres, & des Prophetes: & en l'Apocalipse la Cité de Dieu a en son mur douze fondemens avec les noms des douze Apostres. Gerson ne croira pas pourtant que L'AVTEVR veuille condamner vne autre exposition, qui interprete *super hanc Petram*, sur Iesus-Christ, & sur la confession de la foy de Iesus-Christ, veu mesmemét que saint Augustin admettant toutes ces deux expositions, approuve plus la dernière: doncques sur vne Escriure qui a deux bonnes interpretations, L'AVTEVR en veut prendre vne, & sur icelle fonder absolument vn article de foy. Mais encore qu'il soit vray (comme dict est) que saint Pierre est le fondement, s'ensuit-il de là qu'il soit maistre de tout l'edifice? Ger-

son dira que non, parce qu'il n'est pas le fondement principal, mais Iesus-Christ; ny total, ains la douzième partie seulement, selon le sens de l'Apocalypse; & moins encor la vingt-cinquième, selon S. Paul. Quant à la comparaison que fait l'AVTEVR, que Dieu en mettant saint Pierre pour fondement, par consequent aussi il l'a fait chef, d'autant que ce qui est fondement en la maison, est le chef au corps; encor qu'il soit vray que saint Pierre soit chef, neantmoins c'est vne Analogie qui ne se peut entendre, de dire qu'il y ait mesme proportion du fondement à l'edifice, que du chef au corps, & ne peus remarquer en quoy se trouue la proportion: Si lon dict que comme le fondement soustient la Fabrique (qui est son propre effet) ainsi le chef soustient le corps, cela n'est pas veritable: Si lon veut dire encore que comme le chef communique au corps le sentiment, & le mouuement, ainsi le fondement, communique à la fabrique, qu'est-ce qu'il communique? Les propositions qu'on veut establi pour maximes ne se doibuent pas fonder sur des similitudes prises d'autres similitudes: Mais il n'est besoing de se traouiller d'auantage sur ceste preuue, puisque nous sommes d'accord en la conclusion, que saint Pierre est le chef. Or monsieur le Cardinal Pinelli est chef de la congregation des saincts offices, & par consequent il est pardessus la congregation; ceste consequence ne semble pas bonne, comme aussi Gerson n'admettra pas ceste proposition, que le reste du corps n'a aucune puissance sur le chef, principalement ou le chef est establi par le corps; en somme il ne fault rien arrester

& conclure sur des similitudes.

En troisieme lieu il allegue ce passage *Pasce oues meos*, & finalement le 10. chap. de saint Luc, *Quis est fidelis dispensator, & prudens*, à quoy Gerlon respondroit tout ensemble, qu'il n'y a lieu aucun dans l'Escriture, d'où lon puisse tirer, que nostre Sauueur pour auoir estably des Pasteurs en l'Eglise, il les aye exemptez de l'obeissance d'icelle, mere commune de tous les Chrestiens, tant Ecclesiasticks que Seculiers: veu que par l'ancien vsage, du temps que les Euesques estoient des saints Martirs, le Pasteur estoit subiect au iugement de l'Eglise; comme S. Cyprian en rend vn expres tesmoignage au liu. 1. epist. 4. parlant du commun peuple, quand il dict, *Quando ipsa maxime habeat potestatem, vel eligendi dignos sacerdotes, vel indignos recusandi, quod & ipsum videmus de diuina autoritate descendere, vt Sacerdos Plebe presente sub omnium oculis deligatur, &c.* Or L'AUTEUR dict, que nostre Seigneur a declaré ouuertement que l'Euesque en son Eglise particuliere, & le Pape en l'vniuerselle, estoit comme intendant en la maison de Dieu, ayant puissance sur la famille, & non la famille sur luy; & saint Ciprian dict que le peuple principalement a pouuoir d'essire les Prestres dignes, & reietter les indignes: Que l'Auteur lise ce passage, il verra qu'il parle des Euesques en particulier, encor qu'il les nomme Prestres; & adiouste que l'Epistre n'est pas de luy seul, ains de trete six Euesques, escritte au peuple de Lyon, d'Asturie, & d'Emerite en Espagne; Qu'il y adiouste encor s'il luy plaist la 14. Epistre du 3. liu. pour plus grande assurance. Ce sont les autoritez dont il

falloit estre muni, & ne se presenter au combat simplement armé de sens mistiques, mesmes tirez par force ; comme en ce lieu, où l'AVTEVR debuoit apporter le texte entier de saint Luc, *Quis putas est fidelis dispensator, & prudens, quem constituit dominus super familiam suam, ut det illis in tempore tritici mensuram ?* qui fait contre luy : Car ce seruiteur ne peut estre l'intendant general de toute la maison du Seigneur, qui ne luy a donné autre charge, que de pouuoit disposer de son bled: il reste encor à distribuer la viande, le breuuage, les vestemens, & autres choses, sur toutes lesquelles le Maistre l'establira s'il se comporte dignement en ce ministère particulier, suivant ce qu'il dict, *Beatus ille seruus, quem cum uenerit dominus, inuenerit ita facientem, verè dico uobis, quoniam super omnia quæ possidet, constituet illum.* Qu'on lise le passage, & qu'on voye s'il se peut entendre autrement. Si le Pape, ou quelque autre despencier general estoit ce fidele seruiteur, la charge vniuerselle de toutes choses luy estant donnée, que resteroit-il à luy commettre apres qu'il se seroit bien gouverné en l'exercice de ceste charge ? on dira le Paradis: mais nul n'a charge de le distribuer que Iesus-Christ, & les Anges. Les Papes entrans au Royaume des cieux sont salariés de Dieu de leurs peines, & n'ont plus aucune charge ny gouvernement ou administration de chose quelconque: & ce qui suit encor, *Quod si dixerit seruus ille in corde suo &c.* d'où veut-il tirer, que quand l'intendant de la maison de Dieu ne fait pas bien sa charge, Dieu ne veut point que la famille le punisse, ains s'en reserue la punition ? cela n'est pas generalement

vray en tout Oeconome, cōme aussi l'exēple du Viceroy que L'AVTEVR allegue, ne faict rien à ce propos. Car c'est autre chose que le Pere de famille (maistre absolu d'icelle) y establisse vn dépensier, ou qu'il permette à la famille d'en eslire vn avec telle & si grande autorité sur son bien qu'il prescrira; & que le Roy, Seigneur souuerain de son Royaume, y cōmette vn Viceroy, ou dōne puissance au Royaume d'en eslire vn, avec vne autorité limitée. Au premier cas ie dy, que la famille n'a aucune autorité sur l'Oeconome, ny le royaume sur le Viceroy: mais pour le second, que comme la famille a pouuoir d'eslire vn Oeconome, elle a aussi l'autorité de iuger de ses actions, & le Royaume pareillement de celles du Viceroy. Et comme Monsieur le Cardinal Bellarmin dict, que l'Eglise pour auoir l'autorité d'eslire le Pape, n'a autre pouuoir que d'appliquer la puissance à la personne, ainsi Gerson en son liure qu'il a faict touchant ceste matiere dict, que quand elle le condamne, elle ne fait autre chose que retirer la puissance de la personne. Si Iesus-Christ eust creé vn Pape avec puissance de se nommer vn successeur, & cestuy-cy vn autre, & ainsi consecutiuellement, peut estre qu'il seroit vray ce que L'AVTEVR dict, que l'Eglise n'a aucune puissance sur le Pape: mais puis qu'il soustiēt que Dieu a donné la puissance à l'Eglise d'appliquer l'autorité à la personne, il deuoit aussi monstrier, qu'elle n'a point le pouuoir de luy oster. Or la doctrine commune que le Pape ne peut eslire vn successeur, monstre clairement, que ce n'est pas vn Oeconome deputé par le Pere de famille, ains seulement esleu par la famil-

le de l'institution du Pere : & par ceste doctrine Gerson respond au passage *Pasce oues meas*, & à tous les autres semblables de l'Escriture, que si le Pasteur est establi par le Maistre sur le troupeau, il n'est subiect au troupeau: mais que si le troupeau auoit puissance de s'esslire vn pasteur, alors il luy seroit subiect.

Les fideles de Iesus-Christ doibuent estre vrayes brebis par humilité & innocence, mais non pas par stolidité & default d'entendement pour se pouruoir eux mesmes d'vn bon pasteur par l'authorité du maistre, & condamner le mauuais. S. Augustin montre par viue raison qu'on peut tirer vne doctrine du sens literal seulement, & non d'aucune interpretation mystique : En lisant tout le chapitre, on prendra le vray sens de Iesus-Christ, & le sens literal de l'Euangile : c'est ce qu'il dit à ses disciples, & par consequent à tous les Chrestiens, commenceant par ces parolles qui sôt au milieu du chapitre, *dixit-que ad discipulos suos*, qu'ils n'ayent aucun soing des choses mondaines, parce que dieu leur a preparé vn autre Royaume; & qu'ils soient tousiours à faire de bonnes œuures, estants incertains quand Dieu viendra pour les appeller : que si le pere de famille scauoit l'heure de la venue du larron, il veilleroit pour le surprendre: qu'ils veillent donc ainsi, parce que le Seigneur viendra quand nous n'y penserons pas. S. Pierre demanda alors, Seigneur dictes-vous cecy à nous, ou bien à tous? & nostre Seigneur repliqua, *Qui penes-tu qui soit dispensator fidelis, & prudens, &c.* concludant par là qu'il parloit à tous: & s'il eust parlé en ce lieu de son Vicaire seulement, il faudroit qu'il eust commandé à luy seul de veiller, de n'auoir

foucy des choses mondaines, d'attendre vn autre Royaume, & la venue incertaine de Iesus-Christ : mais d'autant que ces commandemens sont faits à tous les fideles, le sens literal est que tous sont ces dispensateurs, ausquels Dieu a donné la grace de pouuoir exercer la charité à l'endroit de toute la famille, en telle sorte de biens ou de vertus que Dieu luy a departy: & cecy est *mensura tritici*; & qui s'acquitera deuëment de ceste charge, Dieu le benira. Telle est aussi l'expositiõ literalle de tous, bien que quelques-vns depuis l'explication generale par argument *à minori*, l'appliquent particulierement aux Pasteurs: mais l'Auteur ne dit pas que tous les Peres, quand ils l'appliquent aux Pasteurs, adioustent *quod si cœperit percutere seruos, & ancillas, edere, bibere, & inebriari, &c.* & font de grandes digressions contre les fautes & erreurs: & par-advanture que ce *percutere seruos, & ancillas*, est cela mesme que nous voyons auiourd'huy en ce qui se presente: de sorte que Gerson ne niera pas que ceste parabole, comme dicte à tous, & appliquée specialemeñt aux Pasteurs, ne puisse encores par plus speciale raison s'appliquer au Souuerain Pasteur; & partant qu'il ne soit aussi dit pour luy, que s'il s'adonne à yrongnerie, & s'il offense son prochain, le Seigneur viendra quand il n'y pensera pas, & le chastiera. Il ne s'ensuit pas pourtant qu'il ne soit subject à aucun autre iugement, car autrement il s'ensuiuroit qu'aucun fornicateur, ou adultere ne pourroit estre iugé par les hõmes: veu qu'il est escrit aux Hebrieux 15. ch. *fornicarios, & adulteros iudicabit Dominus*, & aussi qu'aucun crime ne pourroit estre condamné par euls: par-

ce qu'il est dit en l'Ecclesiaste 3. chap. *iustum, & impium iudicabit Dominus*, & que par mesme moyē il ne faudroit establir aucun iuge: d'autāt que le Sauueur dit en S. Iean 5. chap. *omne iudicium dedit filio*. L'Ecriture ne se doibt pas ainsi tordre, & faut entendre tous ces passages du iugement du siecle à venir, auquel il n'est pas repugnant qu'il y ait des iurisdiction humaines, tant Seculieres qu'Ecclesiastiques; & n'y a celuy si ignorant, qui ne sçache bien que ce commun dire, *Dieu iugera, Dieu punira, &c.* n'exclud pas les iugemens & les chastiemens des hommes. Et par ainsi nous voyons que ce passage ne fait rien du tout pour monstrier que le Pape soit exempt du iugement de l'Eglise, & par consequent du Concile: Et Gerson sort volontiers des paraboles, & se fonde sur le sens literal. Passons maintenant aux autres preuues, où L'AVTEVR dit ainsi,

Les saincts Conciles attestent la mesme verité que nous auons prouuée par l'Ecriture: Quād S. Marcellin fist ceste faute de sacrifier aux Idoles pour crainte de la mort, on assemble vn grand Concile à Sinuesse pour traiter de ce fait, mais tous ainsi assemblez confesserent qu'il n'estoit en leur puissance de iuger le Pape, Prima sedes à nemine iudicabitur. Et le Pape Nicolas I. fait mention de ce Concile en vne Epistre à l'Empereur Michel. Vn Concile pareillement assemble à Rome par S. Siluestre Pape declare au dernier Canon que le premier Siege, qui est celuy du Pape, ne peut estre iugé de persone. Le Concile de Chalcedoine, qui est vn des quatre premiers Conciles generaux condamna en la troisieme action Dioscorus Patriarche d'Alexandrie, ensemble tout le secōd Concile d'Ephese pour auoir eu ceste presumption de iuger le Pape de Rome. Or si le premier

Patriarche apres cely de Rome en l'assemblée d'un Concile general n'a eu la puissance de iuger le Pape, il s'ensuit clairement que le Concile n'est pas par dessus le Pape, autrement il l'eust peu iuger. En apres le cinquiesme Concile Romain tenu sous le Pape Simmachus approuue comme son propre decret, l'opinio d'Ennodius: Aliorum hominū causas Deus voluit per homines terminari: Sedis istius Præfulem suo sine questione reseruauit arbitrio. Voluit Petri Apostoli successores cælo tantum debere innocentiam. Nous lisons aussi au huitiesme Concile general en l'action 7. Romanum Pontificem de omnium Ecclesiarum Præfulibus iudicasse, de eo vero neminem iudicasse legimus. Paul Aemile au 3. liure de son histoire dit, qu'un grand Concile d'Euesques estant assemblé en la presence de Charlemagne pour certaines choses imposées au Pape Leon III. tous les Euesques s'escrierent qu'il n'estoit licite à aucun de iuger le Pape. Le Concile general de Latran sous Alexandre III. ayant à faire un decret de la forme d'eslire le Pape, dit qu'il faut en ceste eslection vser d'une grande precaution, parce que si on vient à faillir on ne pourra par apres recourir à aucun superieur en terre, comme il est dit au chap. licet, extra de elect. Finalement au Concile de Latran sous Leon X. en la Session II. il fut expressément arresté que le Pape estoit par dessus tout Concile, & partant que c'est à luy seul de conuoquer le Concile, de le transferer, & de le congedier. Or si les Conciles mesmes auoient estre sous les Papes, qui osera dire que le Concile soit par dessus le Pape, ou que l'on puisse appeller du Pape au Concile?

La premiere preuue dont s'aide nostre AUTEUR est, que quand le Pape S. Marcellin sacrifia aux Idoles pour craincte de la mort, on assembla un grand

Concile à Sinuesse, pour traitter de cest affaire, & tout le Concile confessa qu'il n'estoit en sa puissance de iuger le Pape, & le Pape Nicolas I. fait mention de ce Concile. Il est non seulement vray qu'il en fait mention, mais se trouuent encor les actes de ce Concile: Or les Docteurs de Paris disent en premier lieu, que ceste assemblée ne fut pas vn Concile general, & que ces mots, *prima sedes à nemine iudicatur*, ne comprennent pas le Concile general: puis s'esmerueillent pourquoi ce Concile s'assembla, s'il croyoit n'auoir autorité de iuger ceste cause, veu qu'il n'estoit pour autre subject; & s'estonnent encore que Marcellin niant auoir sacrifié, ceuls qui tenoient le Concile ne s'en allerent, puis que la contestation estoit par ce moyen finie & terminée, ains que procedans sur icelle pour le conuaincre, ils ouïrent premierement sept tésmoins, y denomez, qui deposèrent l'auoir veu sacrifier: & pour la seconde fois furent ouïs quatorze tésmoins; & le iour suivant encore d'autres en pareil nombre; qui estant interrogez par les Euesques dirent la mesme chose: & finalement le troisieme iour furent examinez quarante-quatre autres, pour faire le nombre de septante deux, vulgairement appellé *la libra occidua*. Or il est certain qu'examiner des tésmoins est vn acte iudiciaire d'vn superieur: puis c'est chose notoire qu'apres l'examen de ces septante deux, il se ietta à genoux, & confessa son peché; & le texte dit que les Euesques *subscripserunt in eius damnationem, & damnauerunt eum*, & vn d'eux dit, *iuste ore suo condemnatus est, ore suo Anathema suscepit Maranatha, quoniam ore suo condemnatus est, nemo enim unquam iudicauit*

Pontificem, nec Praesul Sacerdotem suum, quoniam prima sedes non iudicabitur à quoquam. Il est bien vray que ces Euesques luy dirent plusieurs fois, *iudicæ causam tuam, nostro iudicio non condemnaberis*, & ie laisse au iugement du lecteur, comme cela se doit entendre, car l'effect semble contraire aux paroles: Le Pape le nie, le Concile reçoit les tesmoins contre luy, soubscrit la condamnation, que doit-on dire? L'Eschole de Paris s'estonne, & ne peut comprendre pourquoy selon la doctrine d'auioit d'huy, il n'appartenoit au Coneile d'en cognoistre, veu qu'il s'agissoit d'un fait d'infidelité: Car si ce qui est dit, *prima sedes à nomine iudicabitur*, s'entend en cas d'heresie, il est cōtraire à la doctrine de maintenāt: & s'il s'entend *in aliis causis*, il ne se peut rapporter à ce Cōcile. Vne autre difficulté se trouue en ces actes, que Diocletian en persone induit Marcellin à sacrifier, septante deux tesmoins tous d'un accord deposent du fait, le Concile s'assemble à Sinuesse, qui dura trois iours: & sur la fin est dit, que Diocletian estant en la guerre de Perse, il eust aduis que trois cens Euesques, trente Prestres, & trois Diacres s'estoient assemblez, & qu'en la sentence Marcellin auoit soubscrit le premier son Anatheme, & Diocletian s'en alla en Perse en grande diligence. Ce qui est d'autant plus à remarquer, qu'il semble que par expres commandement de Diocletian, il fut mis à mort.

Il y a plus, c'est que Marcellin fut excommunié, comme tesmoignent les actes, & luy mesme soufcriuit son Anatheme, comme pareillement tous les euesques: mais qui l'excommunia? luy-mesmes? nō:

car les Scholaſtiques tiennent qu'il ne ſe peut faire: le Concile? non: car il ne le iugea pas dit L'AVT E VR: Par qui donc fut-il condamné? Si on dit à iure, qui aura fait ce Canon? Le Pape, ou le Concile. Or nul ne peut faire vn Canon, par lequel il ſ'excommunie au cas qu'il y contreuienne, & l'inferieur auſſi n'en peut faire vn qui lie & oblige ſon ſuperieur: Et neantmoins il eſt certain qu'il y euſt ſentence d'excommunication contre Marcellin, non pas renduë par luy-mefme, car il ne pouoit: mais par qui d'oc, ſi le Concile n'eſtoit pardeſſus, du moins en tel cas? Je ne puis pas bien concilier ceſte contrarieté qui ſemble eſtre entre l'effect & les paroles, car en ces actes il faut remarquer deux choſes, l'vne, que les Eueſques ont dit à Marcellin qu'il ſe iugeaſt ſoy-mefmes: L'autre, que Marcellin deniant la faute, ils ont ouy & examiné des teſmoins cõtre luy, & en outre l'ont excommunié, choſes fort difficiles à accorder: mais, quoy que ce ſoit, elles ne ſont point contraires à la doctrine de l'Eſchole de Paris, ce Concile n'eſtant pas general.

Il allegue en ſecond lieu le Concile tenu à Rome ſoubs le Pape Silueſtre, où au dernier Canon il eſt dit, que le premier ſiege, qui eſt celuy du Pape, ne peut eſtre iugé de perſone. Il eſtoit biẽ beſoin d'apporter icy tout ce Canon entier, parce qu'il declare auſſi comment l'on doibt entendre que le premier ſiege ne puiſſe eſtre iugé de perſone, diſant, *Nemo indicabit primam ſedem, quoniam omnes ſedes à prima ſede iuſtitiam deſiderant temperari: neque ab Auguſto, neque ab omni Clero, neque à Regibus, neque à populo index indicabitur*: Les Theologiẽs de Paris ſur ce Canon di-

fent que personne ne iugera le premier siege, parce
 que tous les autres sieges attendent la iustice de luy;
 mais que tous les sieges assemblez, qui font le Cō-
 cile general ne peuuēt entrer en cōtention avec vn
 autre siege pour la iustice, & partant en ce cas ils
 n'attendent point la iustice du premier; mais bien
 separément & en particulier ils peuuēt auoir quel-
 que debat entr'eux: & ainsi on entend que le siege
 Romain est pardessus tous les autres sieges particu-
 liers, & non congregez ensemble; conformément à
 ce que dit le Concile de Constance sus-allegué au 41
 article contre Vuiclef: & les Parisiens disent que
 quand il se trouue en quelque lieu que *prima sedes*
à nemine indicatur, cela s'entend à *nulla alia sede parti-*
culari. D'autres respondent plus precisément, que
 ce Canon ne s'entend pas du siege Romain, ains de
 tous les Patriarchats, veu que le Pape Nicolas I. en
 l'Epistre qu'il escrit à l'Empereur Michel, le met
 pour l'Eglise de Hierusalem: & ceste epistre doit
 bien estre receuë par L'AVTEVR, puis qu'il l'allè-
 gue en son texte, où il ne deuoit contre l'intention
 du Pape Nicolas, parlant du premier siege, y adiou-
 ster du sien ces parolles, *qui est celuy du Pape*, parce
 que le Pape Nicolas entendoit estre celuy de tous
 les Patriarches. Or L'AVTEVR ne reuoquera point
 en doute que les Patriarches ne puissent estre iu-
 gez par le Concile general, & partant ce Canon
 n'empesche nullement que le Pape ne puisse estre
 subject au Concile, suiuant l'opinion de Gerson.
 Quelques autres encor s'esmerueillent, de ce que
 aux actes de ce Concile il est dict, qu'il fut assemblé
 par saint Siluestre, de l'aduis & consentement de

Constantin, qui estoit premierement baptisé: & sur la fin apres le Canon sus-allegué, est dict, que ce fut au temps de son troisieme Consulat. Constantin donc estoit dès lors baptisé, & neantmoins au chap. *Constantinus* 96. *distinet*. il est dict, qu'il fut baptisé lors de son quatriesme consulat, ce qui semble entierement contraire.

Oultre ce ils adioustent que l'illustrissime Cardinal Baronius a conuaincu de fauls ce chap. *Constantinus*, en ce qu'il dict auoir esté faict durant le quatriesme Consulat de Constantin avec Gallican, & ce par l'authorité d'Amian Marcellin, qui remarque que Constantin ne fut iamais Consul avec vn particulier: laquelle raison est directement contre ce Concile, qui est ainsi daté *Constantino A. III. & Prisco Coss.* Donques par l'opinion mesmes du Cardinal Baronius ce Concile Romain ne sera point tenu pour veritable. Quelques particuliers remarquent aussi en ce Concile, bien que ce soit chose de peu d'importance, que Constantin se nomma *Donnus*, nom qui ne fut en vsage que quelques centaines d'années apres: & semble encore qu'il die, que *prima sedes non iudicabitur, neque à Regibus*, comme si dès lors il y eust eu quelque Roy, duquel on peult craindre la domination en l'Italie, veu qu'ils estoient tous pardelà le Danube & l'Eufrate, & non Chrestiens: Ioinct que par le second Canon de ce Concile, pour le regard des promotions Ecclesiastiques, il faut cinquante cinq ans passez pour monter de l'ordre de Lecteur, à celuy de Prestre.

En troisieme lieu il allegue l'authorité du Concile de Calcedoine, qui en la troisieme action con-

damna Dioscorus avec tout le second Cōcile d'Ephese, pour auoir osé iuger le Pape de Rome; concludant ainsi, *si le premier Patriarche apres celuy de Rome, & tout vn Concile general n'ont peu iuger le Pape, il s'ensuit que le Concile n'est par dessus le Pape.* Les Parisiens respondent sommairement, que ce second Concile d'Ephese, lequel nostre AVTEVR appelle Concile General, fut vn Conciliabule, & surnommé d'vn nom fort infame, *Prædatorium*: & en ceste action troisieme du Concile de Calcedoine, alleguée par l'AVTEVR, Dioscorus fut condamné, non seulement pour auoir excommunié Leon, mais aussi pour auoir receu à la communion Eutiches excommunié par son Euesque, & pour auoir pareillement vsé de force & violence contre Flavian Constantinopolitain, & pour plusieurs autres crimes: principalement pour sa cōtumace, de n'auoir voulu comparoistre ce mesme iour au Concile.

Qui voudroit tirer de là ceste cōsequence, le Concile donc ne peut cōdamner vn Patriarche de Constantinople, elle ne seroit valable; mais bien ainsi, doncques nul Cōcile *Prædatorium* ne peut condāner vn Patriarche de Cōstantinople, pour tenir la vraye foy Catholique: & pareillement s'ensuit, qu'aucun Concile fauorisant à l'heresie ne peut proceder cōtre vn Pape enseignant la foy Catholique. Quelques-vns aussi remarquent qu'en ceste troisieme action furent faictes plusieurs plaintes, tant verbales que par escrit par les presents & absents, contre Dioscorus, qui n'estoit au Concile, mais bien dans la Cité, pour raison de quoy le Concile le fist appeler par trois fois; & luy tousiours non comparant,

on resolut en fin de le condamner. Cent quatre
 vingt & six Euesques opinerent à sa condamnatiō;
 & toutes ces opinions se trouuent par escrit aux
 actes de ce Concile: les Legats du Pape Leon di-
 rent, que Dioscorus presumant iniustement tenir
 le premier lieu, auoit receu Eutiches, qu'il n'auoit
 voulu permettre de lire l'epistre escrite par Leon à
 Flauian, toutesfois qu'il pouuoit obtenir pardon de
 ces fautes, si par apres il n'eust esté si temeraire que
 d'excommunier Leon Archeuesque de la grande
 Rome; & commis vne infinité de crimes, dont les
 plainctes en estoient venues au Concile, où estant
 appellé par trois fois, il s'estoit rendu contumace à
 cause dequoy le Pape Leon, par leur moyen, & de
 toute la sainte Synode, ensemble avec S. Pierre
 Apostre, le demettoit de la dignité Episcopale. Ana-
 tolius Euesque de Cōstantinople dist qu'il estoit de
 mesme aduis, & cōsenoit la cōdamnation de Dio-
 scorus, pour auoir mesprisé la citation, sans faire mé-
 tion aucune de la cēsüre iettée cōtre Leō. Maximus
 d'Antioche dist pareillement qu'il consentoit avec
 Leon de Rome & Anatólius de Cōstantinople, à ce
 que Dioscorus fust priué de sa dignité, parce qu'ou-
 tre plusieurs autres crimes par luy commis il auoit
 esté cōtumace & desobeisāt. Cēt quatre vingt qua-
 tre Euesques dirent par apres leurs opinions, & au-
 euns condamnerent Dioscorus pour sa contumace,
 d'autres conformément aux opinions des trois Pa-
 triarches, & d'autres suiuant l'aduis d'Anatólius:
 d'où s'ensuit que Dioscorus fut demis par le Conci-
 le pour plusieurs crimes par luy commis, sur les-
 quels estant cité il n'auoit voulu comparoir. Si les

Romains depuis ont adiousté entre les causes de la condamnation la censure contre le Pape Leon, & qu'aucuns y ayent opiné, ce n'est toutesfois l'opinion generale du Concile, sur laquelle le iugement a esté rendu: mais ils le prennent ainsi à leur aduantage, comme il leur semble y auoir plus d'apparce, d'autant que la signification de la sentence faicte à Dioscorus ne se retrouue point dans les actes de ce Concile; mais Euagrius la rapporte mot à mot au l. 2. chap. 18. où les causes de la condamnation sont recitées, sans parler aucunement de la censure contre Leon: & los paroles d'Euagrius sont telles, *De his per litteras à Concilio referebatur ad Martianum: & abdicatio per idem Concilium missa fuit Dioscoro, quæ ita se habet: Scito te, tum quod diuinos Ecclesie Canones contempseris, tum quod Sancto huic, & Generali Concilio minime obtemperaueris, tum propter alia multa crimina, præter ea quæ commississe deprehensus es, tum quod tertio vocatus à Sancto hoc, & celebri Concilio, vt illis quæ sunt tibi obiecta responderes, non veneris: Scito inquam te propter ista omnia à Sancto & Generali Concilio, tertio Idus istius mēsis Octobris Episcopatu abdicatum esse, & ab omni iure Ecclesiastico penitus abalienatum. Quibus verbis in commentarios relatis misissique &c.* Les Parisiens adioustent encor, pour monstrer que le Concile de Calcedoine tient l'opinion toute contraire à celle que l'Avreur luy attribue, qu'en la premiere actiō les Senateurs & Euesques, assemblez en la presence de l'Empereur, & de l'Imperatrice (seant l'Empereur & le Senat au milieu de l'Eglise, & à main gauche les Legatz du Pape, avec Anatolius & les Euesques de son parti; & à la main droicte Dioscorus,

Alexandrin, Iuuenal Hierosolimitain, avec leurs Euesques) les Legats du Pape vindrent au milieu du Concile, & dirent qu'ils auoient commandement du Pape, qui est le chef de toutes les Eglises, d'empescher que Dioscorus n'eust seance au Concile, & pource requeroient qu'il sortist de l'assemblée, ou qu'euls mesmes s'en iroient. Les Iuges, & le Senat demandants ce qu'ils auoient à dire contre Dioscorus, vn des Legats respondit, qu'il auoit assemblé vn Concile sans l'authorité du siege Apostolic: vn autre dist, qu'ils ne pouuoient contreuenir aus commandements du Pape: & le troisieme dist qu'ils ne pouuoient supporter vne telle iniure, que celuy qui doibt estre iugé, fust assis. Les Iuges commanderent à Dioscorus, & à tous les autres aussi de se seoir chascun en son lieu: Et en la derniere action tous les Peres, & les Iuges encore seants, les Legatz du Pape demanderent permission de parler, ce qu'ayant obtenu remonstrent, que le iour precedent depuis que l'assemblée fut leuée on auoit fait quelques actions au Concile, lesquelles ils estimoient estre contre les Canons & la discipline Ecclesiastique, à cause dequoy ils requeroient qu'elles fussent releües: Ce que les Iuges ayant commandé de faire, on vint à lire vn Canon contenant, que les Peres anciens auoient octroyé de grands priuileges au siege de l'Ancienne Rome, pour raison de l'Empire de ceste Cité, au moyen dequoy le second Concile de Constantinople en a donné de pareils au Siege de Constantinople, appelée la nouvelle Rome, estimant qu'une cité decorée de l'Empire, & du Senat, deuboit auoir des priuileges pareils à ceuls de

la vieille Rome, & pareille autorité aux choses Ecclesiastiques, & estre la seconde apres elle: le Canon leu avec les soubscriptiōs, vn des Legatz dist qu'on auoit procedé par fraude avec les Saincts Euesques, veu que sans leur faire entendre la teneur des Canons, desquels on faisoit mention, on les auoit cōtrains de signer: à quoy les Euesques repliquerent haultement, qu'aucun n'auoit esté forcé de ce faire, & sur ceste contention, les Iuges ordonnerent, que toutes les deux parties produiroient les Canons. Le sixiesme Canon du Concile de Nice fut leu par les Romains, & par les Constantinopolitains aussi, dont la lecture fut trouuée differente, parce qu'en celuy que leurent les Romains, ces paroles y estoient de plus au commencement, *quod Ecclesia Romana semper habuit primatum*, lesquelles ne se trouuoient aux autres exemplaires: par apres ayant esté leu vn Canon du Concile de Constantinople, sur ce les Euesques entrerent en vne longue dispute: & finalement les Iuges leur ayants demandé ce qu'il leur sembloit, ils respondirent que ce qui auoit esté ordonné estoit iuste, & raisonnable: Et lors vn des Legatz de Rome protesta de nullité; & demanda que ce decret fut cassé, & reuocé, sinon qu'on luy baillast acte de sa protestation. Partant le Lecteur iugera, quelle opinion auoit le Concile de la Superiorité du Pape.

Au Concile Romain de Simmachus, les Parisiens ne nient pas, que les Papes de Rome n'ayent tenu, qu'ils ne pouuoient estre iugez par aucun, & que les Conciles prouinciaux tenus par eux dans Rome, ne l'ayent ainsi confirmé: mais ils disent

bien, que iamais aucun Concile Romain, ny ce V.
 ny aultre n'ont spécialement déclaré, que le Pape ne
 puisse estre iugé par vn Concile general: & quand
 ils disent qu'il ne peut estre iugé par aucun, ils en-
 tendent par aucun, qui n'ayt autorité generale en
 l'Eglise; d'autant que le Pape ayant autorité gene-
 rale, il n'est pas raisonnable qu'il soit iugé par vn
 qui n'a qu'une autorité particuliere; & oultre ce
 ils respondent aussi à l'histoire de Leon III. sus-alle-
 guée. Mais ie suis contrainct de mettre icy vn petit
 mot du mien: Paul Aemile au 3. liure de son histoire
 en fait recit, & toutesfois ne dict point qu'il se
 soit assemblé vn grand Concile d'Euesques, com-
 me L'AVTEVR luy fait dire: ains en premier lieu
 il dict simplement, que Charles renuoya à Rome
 Leon, avec plusieurs Euesques & gentils-hommes
 Seculiers, & séjourna ailleurs pour affaires publi-
 ques, puis s'en alla à Rome, & là ouit les plaintes
 qu'on faisoit contre le Pape, lesquelles meurement
 examinées, il en demanda aux Euesques leurs ad-
 uis; qui respondirent, qu'il estoit raisonnable, &
 plus seant que le pape se iugeast soy mesmes; ce qui
 fût fort agreable à Charles, pour s'exempter par ce
 moyen de donner ce iugement. Que L'AVTEVR
 relise le passage, & il verra qu'il ne parle en façon
 quelconque de Concile, & que c'estoit plustost vne
 assemblée du Conseil Imperial, où assistoient les
 Seculiers & Euesques; & que les Euesques favori-
 soient la cause du pape. Qu'il se souuienne encor
 de ce qu'il a cy dessus obiecté contre le Decret de
 Constance, qu'il n'y eust point d'enquête prece-
 dente: il ne fault pas qu'il face vn grand fondement

sur ce que quelques Euesques dirent, qu'ils auoient esté appellez pour vn faict particulier, & recherchés inopinément, que peut-estre apres auoir recogneu l'innocence du Pape, ils parlerent ainsi aigrement: mais non pas (comme dict Gerfon) au preiudice des Conciles generaux, qui representent l'Eglise vniuerselle, & ont vne autorité vniuerselle. Je prie le Lecteur de remarquer l'artifice de nostre AUTEVR, qui dict, que le Concile Romain V. tenu sous Simmachus approuua comme son propre decret ceste sentēce d'Ennodius, *Aliorum hominum causas, &c.* Or on ne trouuera point en tout ce Concile, qu'elle soit particulièrement approuuée, ny mesmes qu'il en soit faicte aucune mention: mais le Concile dict bien qu'on apporta vn petit liure faict par Ennodius contre ceux qui auoient murmuré contre le quatriesme synode, lequel estant leu, le Concile dist qu'il seroit receu de tous *integerrimè, synodaliter*, & inferé entre les actions quatriesme & cinquieme du quatriesme synode, & obserué comme les autres Decretz des actions Synodales, parce qu'il estoit escrit, & confirmé par autorité Synodale; & le Pape Simmachus respondit qu'il le consentoit, & entendoit qu'il fust mis entre les decretz Apostolics, & tenu pour tel. Les Parisiens remarquent en cest endroiēt, que par ces mots, *Decreta Synodalia*, ou *actiones Synodales*, ou biē *Decreta Apostolica*, on n'entend pas vn Canon, qui determine quelque article comme de *fide*: Car toutes les Epistres d'un Pape enregistrees, sont appellees Decrets d'un tel Pape: & qui prendra le liure des Conciles, verra ceste inscription à chasque Pape, *Decreta PP. N.* puis son *electio*,

la vie, & ses epistres. Et mesmement aux Conciles on void que les actions contiennent plusieurs discours, mesme faicts à dessein, & par fois des Epistres de diuerses personnes, toutes lesquelles choses ne sont pas *de fide*, aussi nul ne les reçoit pour telles. Il n'y a personne qui die que les Epistres des Papes soient *de fide*, principalement celles qui sont auant Siricius; ny aussi tout ce qu'on voit à present dans les narrés des actes des Conciles d'Ephese, Chalcedoine, & autres suiuaus. On reçoit les determinations des Conciles, qui aux anciens contiennent tout au plus vne, ou deux feuilles, là où les actions en contiendront quarante, ou cinquante. Et pour le regard des Decretales des Papes, la plus-part ne sont point de choses qui concernent la foy: en vne grand' Epistre on n'y trouuera quelquefois qu'un seul article, comme en celle de sainct Leon à Flavian, qui est fort celebre & tressaincte. Partant il y a grande difference de dire, que la proposition d'Ennodius ait esté approuuée, car cela signifieroit, qu'elle auroit esté receuë pour article de foy; ou de dire que le liure d'Ennodius ait esté approuué: car on entend par là seulement, que c'est vn bõ liure, & composé à bonne fin, mais non pas que tout le contenu en iceluy soit *de fide*: & pour confirmer ceste response, il faudroit dire à l'AVTEVR, que ce liure est fort ample & contient plus de deux cens propositions, entre lesquelles est celle que l'AVTEVR allegue, & luy demander s'il entend que toutes soient *de fide*; on luy en montrera quelqu'une, qui n'en sera pas, & s'il ne les reçoit toutes pour estre *de fide*, pourquoy vouldra-il que celle-cy en soit & non

les autres ? Il a cuidé fuir ceste obiection en disant, qu'une seule sentence d'Ennodius fut approuvée: mais pour dire vray tout le liure fut approuvé, & ceste sentence aussi, non pas toutesfois plus que les autres: de sorte qu'elle ne sera pas plus *de fide*, que le liure entier.

Quelques-vns remarquent encor, que ce quatriesme Concile, appellé *Palmare*, fut assemblé pour cognoistre de ce qu'on imposoit au Pape Simmachus, non touchant le gouvernement de l'Eglise, ains sa propre personne seulement, comme d'adulteres, &c. suivant ce que rapporte le Cardinal Baronius, dont Ennodius fut d'advis que semblables crimes seroient remis au iugement de Dieu, ce que Gerson aussi approuve, & tous ceux qui le suivent: Qu'il soit ainsi, lon voit par les mesmes actes du cinquiesme Concile, où le liure d'Ennodius fut approuvé, que le Pape Simmachus remercia les Peres de l'auoir deffendu: & dist en apres, qu'il ordonnoit pour l'aduenir, que non seulement le Prelat du Siege Apostolique, mais aussi tous les Euesques des Chrestiens, sans faire pour cela nouveaux decretz, ne pourroient estre reprins par leurs subiects, sinon où ils auroient erré en chose de la foy: ny estre pareuls accusez pour chose quelconque, sinon d'injustice. Or la sentence d'Ennodius est trop generale, car il semble par icelle, que le Pape ne peut estre subiect au iugement des hommes, mesme en cas d'heresie, puis qu'il dict absolument, qu'il est reserué en tous cas au iugement de Dieu. Et partant le Pape Simmachus fist sagement, lequel apres auoir octroyé à tous les Euesques ce mesme priuilege, se-

lon les anciens Canons, excepta le fait d'heresie & d'iniustice. Et pour n'vser de tant de paroles, le liure d'Ennodius, inseré és Decretz Apostoliques, commence ainsi, *In nomine Patris, & Filij, & Spiritus sancti, præfatio Ennodij, &c. & infra. Compositus est autem aduersus eos, qui contra Synodos scribere præsumperant, vt nec de Apostolica sedis Præsule, aut quouis alio Episcopo talia à quoquam præsumantur, qualia de Papa Symmacho præsumpta fuerunt.* C'est pourquoy les Parisiens disent, que ce lieu sert à prouuer la doctrine de Gerson, laquelle ne luy est nullement contraire. On peut bien croire que L'AVTEVR, comme tresdocte qu'il est, a cognu la foiblesse de l'argument, & pour ce n'a voulu faire mention de l'histoire, ny du Synode Palmare, ny de l'approbation de tout le liure d'Ennodius, ny encor du priuilege de Symachus pareillement octroyé à tous les Euesques, ny mesmes tirer aucune conclusion du lieu sus-allegué. Quant au huitiesme Concile, où L'AVTEVR viét à lire le texte de la septiesme action, il eust mieulx fait d'adiouster encor, de qui il a prins les paroles qu'il a leuës, d'autant qu'elles sont du Pape Adrian, prononcées en vn Synode Romain, & releües ensemble avec plusieurs autres choses, sur lesquelles neantmoins ne fut rien arresté par le Concile: mais lisons nous-mesmes les Canons qui furent faicts en ce huitiesme Concile, & nous y trouuerons ce qui s'ensuit, *Porro si Synodus vniuersalis fuerit congregata, & facta fuerit etiam de Sancta Romanorum Ecclesia quavis ambiguitas, & controuersia; oportet venerabiliter, & cum conuenienti reuerentia de proposita questione sciscitari, & solutionem accipere, aut proficere, & profectum.*

facere, non tamen audacter sententiam dicere contra summos senioris Romæ Pontifices, de sorte qu'ils approuvent le iugement qui n'est point temeraire.

Suit apres vne autre preuue du Concile de Latran sous Alexandre III. au chap. *licet, de electione*, où ayant à faire vn Decret de la forme d'esslire le Pape, il dict, qu'il fault en ceste eslection vser d'vne particuliere diligence; d'autant que si on vient à faillir, on ne pourra par apres recourir à aucun Superieur: parce dict l'AVTEVR qu'il n'y a aucun en terre qui soit Superieur au Pape; y adioustant du sien ces parolles, qui sont trop significatiues: le chapitre du Concile ne dict autre chose, sinon, qu'on ne pourra recourir au Superieur: il suffisoit de rapporter les seules parolles du Concile, & n'y rien adiouster du sien, pour luy donner mesme authorité, principalement en vn point douteus & controuersé. Ce passage toutesfois faict contre nostre AVTEVR, parce qu'il a dict tant de fois cy dessus, que celuy qui est *Papa dubius* est subiect au Concile, & plus encor, celuy qui s'y est intrus. Or quand il est dict, que s'il y a faulte en l'election, il n'y a aucun Superieur à qui on puisse recourir, il ne s'ensuit pas pourtant que le Concile ne soit Superieur: car tant par la commune opinion de tous, que par la sienne mesme, s'il suruient quelque difficulté en l'Electiō, la cognoissance & iugement en appartient tousiours au Concile: Donques ce chap. *licet* veult dire, qu'actuellement & de faict il n'y a aucun Superieur, parce que le Concile n'est pas tousiours assés: d'où l'on voit que l'AVTEVR, contre l'intention du Concile, a adiousté ces termes, *parce qu'il n'y a en*

terre aucun Supérieur au Pape: car quand il y a eu erreur, ou que lon doute d'auoir erré en l'election, luy-mesme assure qu'il y a en terre vn Supérieur au Pape, sçauoir le Concile.

Pour le regard du Concile de Latran Monsieur le Cardinal Bellarmin au second liure de *auct. Concil.* c. 13. dict qu'il a expressément terminé ceste controuerse: mais parce qu'aucuns doutent s'il fut General, la question demeure encor entiere entre les Catholiques: & il dict au chap. 17. (ie ne sçay si c'est pour contredire, ou pour confirmer le mesme) qu'il est en doute si ce Concile a vuidé ce point comme Decret de *fide Catholica*. De sorte qu'il semble chose superflue d'alleguer contre Gerson vne doctrine, qui par l'opinion mesme de celuy qui l'allegue reçoit tant d'incertitudes, & qu'on doute de l'autorité de ce Concile, & encor de sa determination. Toutesfois Dominique Sotus en parle fort clairement, l. 6. de *Iust. & iur.* q. 1. & 6. où il dispute contre les Monts de Pieté, qui sont certainement approués en ce Concile, comme lon void par ces paroles, *Sacro approbante Concilio declaramus, & diffinimus, montes pietatis, &c.* Et est commandé sur peine d'excommunication *lata sententia*, qu'aucun ne soit si hardy d'aller au contraire, ny par parolles, ny par escrit: & voyant Sotus combien cela estoit contre son aduis, qui les condamne, respond que tous les actes de ce Concile, ne sont point receus, ny mis en vsage. Mais les Theologiens de Paris disent bien dauantage, qu'en ce Concile n'assistèrent iamais cent Euesques: & particulierement en l'vnzième Session, dont L' A V T E V R faict icy mention, y

comprins ceuls qui suiuent la Cour, & les titulaires sans Diocese, ne se trouuerent que 64. Euesques, qui pour la plus part estoient des lieux circumuofins de Rome. Ils adioustent encore, qu'on ne peut appeller determination du Concile tout ce qui est dict par incident en vn decret hors du principal, qu'on entend determiner. Or la Bulle dont nous parlons, entend ieulement de casser la pragmatique, & cecy est la substance du Decret: mais par apres on respond à ceuls qui la vouloient defendre par l'autorité du Concile de Basle, & dict-on que ce Concile fut transferé par Eugenius, partant qu'il ne peut auoir aucune force, d'autant que le Pape seul a pouuoir de transferer les Conciles, comme estant pardessus iceuls: Ce qui n'est pas de la substance de ceste Bulle, ains est la solution d'vne raison contraire, & par consequent n'est point vne determination: à cause dequoy monsieur le Cardinal Bellarmin au second lieu sus-allegué, a réuocé ce qu'il auoit dict au premier, que ce Concile auoit expressément determiné ce poinct; adioustant par apres qu'il est en doute si c'est vne determination. La commune opinion de tous les Theologiens est, que les raisons qui sont rapportées en vne determination, ne sont pas pourtant déterminées. Et seroit fort estrange, qu'en faisant vn Decret touchant quelque chose particuliere, comme est la reuocation de la pragmatique, qui n'est article de foy, on determinast par incident vn article de foy, en sorte que ce qui n'est qu'accessoire seroit necessairement de la foy, & le principal non.

Les Parisiens disent plus, que pour prouuer l'au-

thorité du Pape sur les Conciles, on rapporte en ce lieu plusieurs histoires, iusques au nombre de plus de quinze, & finalement le liure d'Airarus de *Synodis*, au moyen dequoy il faudroit dire, que toutes ces histoires seroient de fide: & neantmoins ils montrent clairement que quelques-vnes de ces histoires fidelement rapportées se trouueront contraires; mais il seroit trop long de coter icy tant de particularitez. Quelques-vns encor respondent que la Bulle ne dict pas, que le Pape ayt autorité par dessus les Conciles, mais qu'elle dict bien, qu'il appert par les Saintes Escritures, par le dire des Saints Peres & Papes Romains, par les Canons & Conciles, que le Pape a autorité par dessus les Conciles Generaux: de sorte que cela ne s'entend point estre veritable, sinon *quatenus inde constat*. Il faut d'oc en premier lieu en faire apparoir, & voir le sens de l'Escriture, & les auctoritez des Peres, puis que le Concile ne l'asseure point de foy-mesme; ains seulement en-tant qu'il en appert par les escritures, & autres auctoritez alleguées.

Vn autre Docteur propose vne difficulté beaucoup plus grande; qu'au commencement de ceste Bulle du Concile il est dict, que Iesus-Christ, *Petrum, eiusque successores Vicarios suos, instituit, quibus ex libri Regum testimonio, ita obedire necesse est, vt qui non obedierit, morte moriatur*. Si cela estoit vn article de foy, ce seroit chose fort rigoureuse, que la desobeissance faicte au Pape fust punie de mort: le monde ne l'a iamais creü, & peut-estre ne le croira iamais. Puis le mesme Docteur adiouste, qu'il ne peut comprendre comment tant d'années deuant qu'il y eust

y eust aucun Pape, il ait esté parlé de luy au liure des Roys: & dict par apres qu'il a leu tous les quatre liures des Roys, sans y auoir trouué cela. Mais laissons à part l'autorité de ce Concile, puis que les Docteurs qui suivent l'aduis de Gerson, ne l'approuuent pas: Ioinct que chascune des responſes que nous y auons fait est de soy suffisante pour résoudre toutes obiections au contraire. Sur la fin

L' AUTEUR pour vne forte machine ameine vne raison fondée sur la parole de Dieu, disant ainsi,

Mais voyons si la raison fondée sur la parole de Dieu ne rendra pas mesme tesmoignage de la verité. La sainte Eglise n'est pas semblable à la Repub. de Venise, ny à celle de Genes, qui donne à son Duc telle puissance qu'il luy plaist, & partant on peut dire que la Repub. est pardessus le Prince. Elle n'est pas semblable aussi à vn Royaume terrien, où les peuples cedent & transportent toute leur authorité au Monarque, & en certains cas peuuent se liberer de la domination Royale, & se remettre sous l'administration des Magistrats inferieurs; comme firent les Romains, quand ils abolirent la puissance Royale, & se soubsmirent au gouvernement des Consuls. Car l'Eglise de Iesus-Christ est vn Royaume tres-parfaict, & vne Monarchie absolue, qui ne depend point des peuples, & ne prend point son origine d'eux, ains depend seulement de la volonté diuine, suivant ce que dict nostre Seigneur au Pseu-me second: Ego autem constitutus sum Rex ab eo super Sion montem sanctum eius. Et le saint Ange au premier chapitre de saint Luc dict à la Vierge, dabit ei Dominus sedem Dauid patris eius, & regnabit in domo Iacob in æternum, & regni eius non erit finis. Et le semblable se void en infinis autres lieux. Nostre

Sauueur monstre aussi que ce Royaume ne depend point des hommes, quand il dict; Non vos me elegistis, sed ego elegi vos, en saint Iean 15. chap. Et nous le confesserons ainsi, quand nous dirons ce qui est en l' Apocalypse 5. chap. Fecisti nos Deo nostro Regnum. Et c'est pourquoy ce Royaume en l'Ecriture Sainte dans saint Mathieu 24. chap. est comparé à vne famille. Quis est seruus, & prudens, quem constituit dominus super familiam suam? Car le Pere de famille ne depend pas de sa famille, ny ne prend d'elle son autorité. Ce qu'estant tres-veritable s'ensuit necessairement, que le vicaire General de Iesus-Christ ne depend pas de l'Eglise, ains seulement de nostre Sauueur, duquel il tient toute son autorité; comme nous voyons encor aux Royaumes temporels, où les Vice-roys prennent leur autorité du roy seul, & nō du Royaume; & ne peuuent estre iugez ou punis par les peuples, ains seulement par le Roy leur maistre. Voila donc comment Gerson s'est abusé, & tous ceux qui le suivent, qui vont contre la doctrine de l'Ecriture Sainte, & des Saints Canons, & contre toute apparence de raison.

Le Lecteur verra icy vn artifice merueilleux, par lequel L' A V T E V R le veult mener de Iesus-Christ Souuerain Pontife eternal, au Souuerain Pontife temporel; & ayant mis pour fondement la relation qui est de la Sainte Eglise à la Maïesté diuine, il veult faire par après la mesme relation au Pape. Or les Parisiens respondent que la Doctrine Catholique tient, que Dieu a appellé l'Eglise à la Foy, & à la Religion Chrestienne, & qu'il luy a donné Iesus-Christ pour chef à iamais, qui premierement comme homme mortel en terre l'a regie par sa presence corporelle; puis monté au Ciel la gouerne par

vne force interieure, & assistance inuisible, iusques à
 la fin du monde. C'est ce que signifie ce passage, *Ego
 autem constitutus sum Rex ab eo, & cestuy-cy, Dabit ei
 dominus sedem, &c. & regnabit in aeternum*, comme
 encor l'autre suiuant *non vos me elegistis, sed ego elegi
 vos*. C'est ce Royaume dont parle l'Apocalipse, &
fecisti nos Deo nostro regnum. C'est Iesus-Christ, ce Pe-
 re de famille, qui est maistre d'icelle, & elle est sa
 fille & sa seruante, laquelle estant composée d'hom-
 mes visibles, il a voulu aussi qu'elle fust regie & gou-
 uernée par vn homme visible, & a ordonné l'au-
 thorité qu'il deuoit auoir, & l'a luy-mesme estably
 auant que l'Eglise fust fondée; & pour l'aduenit
 apres la fondation d'icelle, il a laissé en terre le
 pouuoir d'eslire des successeurs. Maintenant avec
 ceste doctrine (laquelle ie suis certain que L'A-
 T E V R admettra, & aduoüera mesmes que nul n'est
 Catholique qui ne l'admet) ie respons à la raison
 par luy alleguée, que l'Eglise n'est pas vne Republi-
 que, comme Venise ny comme Genes, qui donne à
 sō Duc telle autorité qu'il luy plaist, ny vn Royau-
 me qui puisse changer de forme de gouvernement,
 visiblement ou inuisiblement, parce que nostre
 Seigneur l'a prescrit: qu'elle n'est pas aussi vn Royau-
 me, comme celuy de France, qui ait vn sang Royal,
 & où les Rois succedent par naissance, ou par dis-
 position testamentaire, comme en quelques autres:
 Quant au gouvernement interieur, & purement
 spirituel, il n'est semblable à aucun aultre, parce
 qu'elle a vn Roy sans fin & immortel: pour le gou-
 uernement visible elle a vn ministre, lequel quant à
 autorité est estably par Iesus-Christ, & ne depēd

point de l'Eglise: mais quant à l'application de l'authorité à la persone, il est electif & dependant d'icelle, Doncques tous ces passages qu'il allegue, *Ego autem constitutus sum Rex ab eo: dabit ei Dominus: non vos me. elegistis: Fecisti nos Deo nostro Regnum:* & autres semblables, s'entendent du Royaume inuisible, spirituel, & interieur, où le Pape n'a aucun gouvernement, ains Dieu seul qui cognoist les cœurs, qui peut penetrer dans nos ames, & leur departir des dons & des graces, par le moyen desquelles nous venons à estre faictz citoyens de la Hierusalem celeste. Iesus-Christ est encor ce pere de famille, qui ne depend pas de l'Eglise: & le Pape est vn seruiteur commis sur la famille par le Pere, quant à l'authorité; mais commis par la famille mesme, pour le regard de l'election de la persone: car l'authorité vient de nostre Seigneur, & l'application d'icelle depend de l'Eglise. L'AUTRE fait l'Eglise vne famille dependante du Pere, lequel il confesse estre Iesus-Christ: & ayant posé ce fondement, il conclud que le Pere ne depend pas de la famille, ny ne prend son autorité d'elle; inferant de là, que le Pape ne peut estre subject à l'Eglise: comme si l'on pouuoit tirer vn bon argument du Pere de famille qui est Iesus-Christ, à l'œconome esleu par la famille qui est le Pape. Je m'arreste sur ceste similitude, parce qu'on ne trouue point en l'Euangile que le pere de famille soit prins pour autre que pour Dieu le Pere, ou pour son fils Iesus-Christ, & le ministre pour le seruiteur; & se faut bien garder d'attribuer à persone, ce qui appartient à Dieu seul: & par ainsi cest exemple fait entierement pour Ger-

son, comme aussi celuy du Viceroy, que L'AVTEVR allegue. Si vn Roy de France alloit à la conqueste de la terre Saincte, comme fist S. Louys, & disoit au Royaume, ie vous laisse mon cousin pour Viceroy, avec autorité d'administrer la iustice, mais non pour faire des loix, ny pour assembler les Estats, &c. & si celuy-cy vient à faillir, eslisez-en vn autre, avec pareille autorité, celuy-la tiendroit son pouuoir & autorité du Roy son maistre: mais l'autre seroit sans doute subiect au Royaume, comme estât esleu par iceluy: Et c'est ce que Gerson enseigne en toutes ses œuures, d'où l'on voit veritablement que la raison est de son costé.

Je ne veux pourtant conclure par ces raisons que l'opinion de Gerson touchant la souueraine puissance Ecclesiastique, soit faulse ou veritable, mais seulement que la conclusion de L'AVTEVR (asseurant que Gerson s'est abusé, & tous ceux aussi qui le suiuent, & qu'ils contrarient à la doctrine de l'Escriture sainte, des saints Canons, & de la raison euidente) a bien besoin d'autres preuues que celles qu'il a rapportées. Or il continuë ainsi,

Et si on disoit ce que Gerson mesme auoit accoustumé de dire, qui est escrit en S. Matthieu 18. chap. dic Ecclesiæ, & si Ecclesiam non audierit, sit tibi sicut Ethnicus & publicanus. Je respondray qu'en ce lieu par l'Eglise on doibt entendre le Prelat qui est le chef de l'Eglise, car ainsi l'expose S. Iean Chrysostome en l'homelie sur S. Matth. 61. & le Pape Innocēt III. sur le chap. Nouit de iudiciis: & l'usage mesme generalement obserué en l'Eglise vniuerselle rend la chose claire. Car qui veut deserer vn pecheur à l'Eglise, suiuant ce cōmandement, il n'assemble pas pour cela vn

Coucile, mais il recourt à l'Euesque, ou à son Vicaire.

Il ne suffisoit pas à l'AVTEVR d'auoir disputé contre Gerson, s'il ne venoit encor à impugner ses raisons: mais au lieu de plusieurs qui sont deduictes par Gerson, il se contente d'en rapporter vne seule, tirée de S. Matthieu, *dic Ecclesia*, à laquelle il respōd *Ecclesia, id est Pralato*, & dit ceste exposition estre de S. Iean Chrystostome, encor que les Parisiens assurent du contraire: mais il semble que quand on a accoustumé d'alleguer quelque passage, chacun le met en auant sans l'aller voir de plus pres. L'exposition de S. Chrystost. est telle, *dic Ecclesia, Præsulibus, scilicet, ac præsidentibus*, qui est la mesme chose que dict Gerson, *Ecclesia representatiue*: car ne se pouuant toute assembler, elle est représentée par la congregation des Prelats, & Presidens, & pour ceste raison lon dit que *nomine Ecclesia*, on ne peut entendre vne persone seule: parce qu'en vain seroit adiouste, *Si duo ex vobis consenserint super terram de omni re quamcunque petierint, fiet illis à Patre meo, qui in cælis est. Vbi enim sunt duo, vel tres congregati in nomine meo, ibi sum in medio eorum.* Et pour plus ample confirmation on rapporte ce que dist S. Paul, quand il receut la denunciation contre l'incestueux, *omnino auditur inter vos fornicatio, &c.* & par apres, *Ego quidem absens corpore, præsens autem spiritu, iam iudicauit vt præsens eum qui sic operatus est, in nomine domini nostri Iesu Christi, congregatis vobis, & meo spiritu, cum virtute domini Iesu iradere huiusmodi hominem Sathana*, où l'on remarque que S. Paul estant pour lors à Philippes, ne declaroit point par son breuet, qu'il excommunioit vn tel; mais il mandoit à l'Eglise de le faire,

estant assemblée en esprit: partant il n'est pas repugnant que ces termes de S. Chrysostome, *Præsulibus, & Præsidentibus*, ne puissent estre entendus du Concile general: Ioinct que cy-dessus a esté remarqué qu'en ceste signification *dic Ecclesia*, seroit à dire *dic tibi ipsi*: Quant à l'usage qui enseigne que *dic Ecclesia* se doit entendre *Prælato*, d'autant qu'on a recours à l'Euesque ou à son Vicaire, pour le regard de l'ancienne coustume, i'en ay discouru avec l'authorité de S. Paul: & quant à la nouvelle, il est vray que pour le iourd'huy l'Euesque & le Vicaire excommunient sans prendre aduis ny conseil de persone: & bien souuent mesme le Notaire seul, ou (qui importe bien d'aduantage) vn clerc de simple tonsure député pour estre commissaire en quelque cause particuliere de peu de consequence, par l'authorité qu'il a, comme delegué, excommunie vn Prestre: & Leon X. au Concile de Latran, Session XI. par vn sien decret perpetuel, donne puissance à vn Seculier d'excommunier les Euesques: & ce qui est encore plus à considerer (dit Nauarre au chap. 27. nombre II.) est que si quelqu'vn obtient la censure du Prelat, & que l'impetrant n'ait intention que celuy-là soit excommunié, il ne le sera pas: à quoy adiousté encor le mesme Autheur au chap. 23. nombre 104. que la censure *lata ipso iure* contre celuy qui ne paye pas la pension à iour nommé (comme pour exemple si elle est deuë la veille de Noël, à peine d'excommunication) n'est point encouruë par le defaillât de payer de plusieurs mois & ans apres le terme, si le creancier ne veut: mais si apres plusieurs mois & ans il veut que l'excommunication ait lieu; le

debteur l'aura encouru du iour mesmes auquel il estoit tenu de payer, sçauoir de la veille de Noël; & tel est le stile de la Cout, & l'usage qui s'observe pour le iourd'huy, dequoy ie ne diray rien, sinõ qu'il est tiré d'une interpretatiõ que L'AVTEVR approuue.

9. Là neuuiesme propositiõ est, que l'on n'encourt point le mespris des clefs quand le Pape abuse de sa puissance grieuement, & avec vn grand scandale. *Ceste proposition est veritable de soy, mais fort iniurieuse contre sa Sainteté, & le S. Siege Apostolique; comme si c'estoit sa coustume d'abuser ainsi des clefs du Royaume des cieux. Les heretiques modernes vsent de mesmes artifices, car pour rendre au Monde la puissance du Pape odieuse, ils publient par tout les plus atroces calomnies que la meschanceté de Satan, qui est leur chef, leur puisse suggerer. Et les Venues deuroient auoir en horreur, & punir telle sorte de gens qui defendent leur cause.*

Il est facile icy de defendre Gerson, puis que parlant de ce qui peut aduenir, & qui mesmes est aduenu, il ne fait tort à ceux qui font bien, ains taxe seulement ceux qui font mal. Et partant ceste proposition n'est point iniurieuse cõtre le S. Siege Apostolique, lequel n'erre iamais, encor que la persone qui sied en iceluy vienne à faillir par fragilité humaine.

Ceuls qui ont escrit les vies des Papes (& principalement Platine) en remarquent tant, que prenãt le temps depuis 820. en ça, il sera bien difficile de iuger quel est le plus grand nombre, ou des bons, ou des mauuais. On pourroit dire par la raison de L'AVTEVR que le Canon *si Papa* de Boniface Martyr est fort iniurieux contre la memoire du Pape Gregoire II. & contre le S. Siege Apostolique,

veu qu'il dit, que si le Pape negligé le salut de ses freres, s'il est inutile & paresseux à faire ce qu'il doit, & que par sa faute il traîne vn nôbre infiny de peuples aux abismes d'enfer, personne ne le reprend. Or qui osera dire que S. Boniface ait voulu donner à entendre par là que le S. Siege Apostolique fust coutumier de commettre telles fautes? Doncques il ne s'ensuit pas, & n'est pas veritable qu'il n'y ait que les heretiques qui reprennent les mauuaises actions, car les Docteurs Ecclesiastiques, & les Historiens Catholiques les detestent encores plus: Je ne parleray point de Platine, dans les escrits duquel il n'y a rien si frequent, ains de tous les historiens Alemans, comme Reginus, Luithprandus, Sigibertus, Othon: des François, comme Aimonius, & Addo: & des Italiens aussi de tout temps. Et pour ne s'arrester aux anciens, chacun voit comme François Guichardin en parle, encor qu'on en aye beaucoup retranché. Il y a grande difference entre la façon de parler des heretiques, & celle de Gerson: Ceux-là reprennent la vraye doctrine, & Gerson ne parle que de l'abus. Qui lira saint Bernard de *consideratione ad Eugenium*, ne trouuera rien à reprendre en Gerson, veu mesmes que ses propositions sont *in causa necessaria*: & chacun se pourra estonner icy de ceste contrariété, que la proposition de Gerson est veritable en soy, & neantmoins iniurieuse contre le Sainct Siege Apostolique, comme si c'estoit luy faire iniure que de dire la verité. Il ne peut estre interessé par la verité, si on ne la fonde sur quelque faulseré: Et pareillement qu'elle est veritable en soy, & toutesfois semblable aux artifices des

heretiques modernes, comme si Gerson il y a cent 50. ans auoit peu apprēdre l'artifice des heretiques de ce temps : C'est tout de mesme que si on defendoit de se seruir de l'Escriture sainte, parce que les heretiques s'en seruent.

Or' que la proposition soit bonne de soy, & que neantmoins les Venitiens la deburoient auoir en horreur, ce n'est pas à mon aduis vne bonne doctrine, parce que c'est enseigner d'auoir en horreur la verité, & mesmes vne verité necessaire à la conseruation de la liberté, & de la puissance que Dieu leur a donnée.

Quant à ce que L' AUTEUR dit sur la fin, qu'ils deburoient aussi punir & chastier tels defenseurs, cela est vn peu difficile à comprendre. Je deffends à present l'innocence de Gerson: mais quand L' AUTEUR escriuoit, ie ne scay qui estoient ses defenseurs : d'ailleurs punir ceux qui defendent la verité dite à propos, & en vn cas de necessité, cela ne conuient pas à vn Prince equitable & religieux, & specialement à vne Republique, qui a tousiours fait profession de la verité: on peut bien dire à celuy auquel la verité deplait, *qui male agit, odit lucem*, & l'on pourroit dire, sans se tromper, que la doctrine de L' AUTEUR est fort iniurieuse contre toute l'Eglise & le Clergé, puis qu'il ne veult pas qu'on repre-
ne celuy *qui voudroit rair les thresors de l'Eglise, vsurper son domaine, ou reduire tout le clergé en vne miserable seruitude avec tous ses biens, ou le spolier sans subiect de toutes ses facultez*: ce sont les paroles de Gerson, qui debuient bien estre rapportées par L' AUTEUR en cest endroit.

10. La dixiesme proposition est, que ceux-la n'encourent le mespris des clefs, qui se mettent en defense contre telles sentées par l'aide du bras Seculier, car la loy naturelle nous enseigne de repouller la force par la force. *Voicy vn tres-dangereux enseignement, & duquel peuuent naistre plusieurs causes de scandale: car bien que le commun dire soit veritable, vim vi repellere licet, c'est à dire qu'il soit permis de resister à la violence par la violence; il a toutesfois plusieurs limitations, parce qu'il s'entend d'une force iniuste, & à laquelle on ne peut autrement remedier que par la force: & faut encor que la resistance soit faicte incontinent, oultre les autres circonstances declarées par Siluestre verb. Bellum 2. & par les autres docteurs qui en donnent l'interpretation: & partant si quelques particuliers en vsent sans grande prudence, c'est pour causer beaucoup de desordres. Quand les ministres de iustice prennent quelqu'un, & luy lient les mains, il est certain qu'ils luy font violence, & toutesfois il luy est defendu d'vsfer de violence contre eux, sous pretexte qu'on peut resister à la violence: Semblablement quand on lie les forçats au banc de la gallerie, & sont contraincts à force de coups tirer à l'auiron, qui doute que ce ne soit vsfer de violence en leur endroit? & toutesfois persone ne dira qu'il leur soit permis d'vsfer de mesme violence contre le Comite. Pareillement quand quelqu'un est contrainct par le Supérieur, soit Ecclesiastique, ou Seculier, de restituer à autruy son bien, ou son honneur, ou de garder sa foy & promesse, on ne peut dire que pour cela il doibue resister avec force, & se roidir contre son supérieur. Et pour laisser vn' infinité d'autres exemples, quand quelquesfois les Magistrats, ou les Princes mettent sur le peuple quelques impôts avec contraincte de les payer, ie croy qu'ils ne trouueroient pas*

bon si on persuadoit au peuple de se rebeller sous ombre que vim vi reppellere licet. Et quelle confusion seroit-ce tât aux maisons prinées, qu'aux Citez & Royaumes, si on pouuoit en toutes occurrences repoulsier la force par la force mesme, en disant que la raison naturelle le permet ainsi? Or pour le regard de la force, dont vsent les Prelats, lors que par censures ils contraignent les subiects d'obeir, il est certain qu'il est deffendu d'y resister avec la force: car si celui qui ne veut ouir l'Eglise, nous doit estre selon le commandement de nostre Seigneur, comme vn Payen & Publicain, à plus forte raison qui se veut opposer contre elle avec force, doit encor estre reputé de pire condition. Quant au recours que l'on peut auoir aux Princes seculiers en matiere de censure, le saint Concile de Trente y a pourueu en la Session 25. chap. 3. deffendant à tous les Princes seculiers de n'empescher les Prelats de ietter des censures, & ne commander la renouation de celles qui auront esté iettees, comme estant chose hors de leur charge. Finalement si nous venons au fact dont est à present question, il n'est à propos de dire que vim vi reppellere licet, veu que la foree dont vsent nostre saint Pere contre la Republique de Venise, est vne force paternelle, & iuste, conforme à l'Ecriture, & aux saints Canons, & pratiquée de tout temps par les Prelats de la sainte Eglise: & le plus prompt remede, sans recourir à la force, ny au secours des Princes, est l'obeissance, & l'humilité, sans laquelle tout autre remede est vain, & inutile.

Si ce qui est dit en la dixiesme proposition, que fuiuant la loy naturelle on peut resister à la force de telles pretenduës sentences par la force mesme, est vne doctrine dangereuse, il sera vray de dire que monsieur le Cardinal Bellarmin a enseigné vne dā-

gereuse doctrine en son liure de *Romano Pontifice*, par nous allegué, où il soustient disertement ceste maxime, comme font aussi les Cardinaux Turrecremata & Caietan par luy citez avec Dominique Sotus, & François Victoria, & infinis autres auteurs modernes, qui la confirment tous d'une mesme opinion : & tant s'en faut que d'icelle puissent naistre plusieurs causes de scandale, que cela prouviendroit plustost de son contraire, attendu que ce seroit vn moyen pour introduire la tyrannie en l'Eglise, qui comme estant vn crime public, est beaucoup plus dangereux que la resistance : Il est encore aussi peu vray de dire que ceste mesme doctrine causeroit vne grande confusion, tant aux maisons priuées qu'aux citez, parcé que chacū se pourroit deffendre contre les ministres de iustice & les comites des galeres, & contre le Prince qui contraindroit au payement des imposts : car de deux qui plaident ensemble, l'un & l'autre ne peut auoir le bon droit de son costé ; ains est necessaire que quand celuy qui vse de force, en vse legitiment, la resistance qui luy est faite soit iniuste : & au cōtraire, quād la resistance est legitime, que la force soit contre droit. L'AVTEVR sçait bien (encor qu'il le dissimule) que quand la loy dit *vim vi repellere licet*, cela s'entend de *vi iniuste illata*, partant ce qu'il tire de là generalement, disant que si à toute force on pouuoit opposer la force mesme, n'est pas veritable : car ni la loy, ni Gerson, ni aucun autre ne dit point que *omnem vim vi repellere licet* : Par ainsi la consequence des ministres de iustice est faulse, comme pareillement celle du Comite, & du Prince qui exige raisonnablement les imposts, & du Magi-

frat qui condamne à restituer le bien, ou l'honneur
 d'autrui, & à tenir la foy promise, parce que telles
 forces sont legitimes. Et pour l'induction qu'il fait
 de la force dont vse l'Ecclesiastique, quand il s'en-
 tretmet de faire restituer le bien ou l'honneur d'au-
 trui, ou de garder les promesses, c'est hors de pro-
 pos, puis que ce sont choses appartenantes au Secu-
 lier, esquelles l'Ecclesiastic ne se doit ingerer, sinon
in foro penitentiali. Quant à ce qu'il dit par apres, que
 pour le regard de la force dont vsent les Prelats,
 lors que par censures ils cōtraignent les subjects à
 leur obeir, il est certain qu'il est defendu d'y resister
 avec force, pource que si celuy qui ne veut obeir à
 l'Eglise, doit estre tenu pour vn Payen & Publicain,
 celuy-la est encor pire qui s'y oppose avec la force:
 Je demande s'il parle icy generalement de toutes
 les censures, y comprenant aussi celles qui sont nul-
 les, ou seulement de celles qui sont valables. S'il en-
 tend parler de toutes, & qu'il tienne que celuy qui
 resiste aux censures qui sont nulles, soit pire qu'un
 payen, c'est vne doctrine absurde, faulce, erronée, &
 contraire à la loy naturelle, & à la doctrine des Car-
 dinauls susnommez, & à la sienne mesme. Mais s'il
 entend seulement de celles qui sont valables, la do-
 ctrine est tres-bonne, & ne contrarie point à celle
 de Gerson, ains est confirmée par luy mesme, car
 Gerson en sa proposition parle des censures preten-
 dues; qui ne sont iuridiques, ains pleines de violéce;
 en sorte que si quelque congregation en prononce
 de telles, on ne doit estimer qu'elle soit assemblée
 au nom de Iesus-Christ, ny que Iesus-Christ y pre-
 side; & qui leur est desobeissant est bon Chrestien:

Ainsi l'enseignent les Canons alleguez par Gratian
 II. *quest.* 3. Or il est tousiours veritable que l'Eglise
 de Dieu ne peut iamais errer; qu'on deibt tenir
 pour Payen celuy qui ne luy adhere, & pour pire
 encor celuy qui luy resiste; car la resistance ne sera
 iamais legitime contre son commandement, atten-
 du que tout ce qu'elle commande vient de Iesus-
 Christ. Mais si par l'Eglise on entend vne puissance
 qui soit subiecte à errer, & laquelle mesmement on
 recognoisse estre telle, non seulement par raison,
 mais aussi par les erreurs frequents qu'elle com-
 met, en ce cas s'il y a de l'abus en son commande-
 ment, celuy qui y resiste vse legitimement de la for-
 ce, & n'offense point Dieu: d'autant qu'il ne con-
 trevient pas à l'Eglise, ains seulement à l'erreur hu-
 main, qui est hors la doctrine de l'Eglise. Mais
 L'AUTREVR ayant recognu que la proposition
 estoit veritable pour le regard des césures valables,
 sous ombre qu'elle semble estre vniuerselle, l'a
 voulu estendre aussi à celles qui sont nulles: artifice
 desormais assez cognu, & fort commun en tous les
 discours. Doncques ceste proposition est vraye, au
 cas que l'assaillant vse de force non legitime; &
 L'AUTREVR mesme se tient ainsi: car la voulant re-
 straindre, il y met trois limitatiōs: la premiere, qu'il
 faut que la force soit iniuste: l'autre, qu'il n'y ait au-
 tre remede que par la force mesme: & la troisieme,
 que la resistance y soit faicte incōtinent: Surquoy il
 fault encor dire vn mot, afin que nous ne soyons
 trompez comme de coustume, par l'ambiguité des
 paroles. Car, incōtinent, ne signifie pas *quid indiui-*
sibile, mais s'entend selon le subiect qui se presente.

Par exemple, si on a surprins vne forteresse à vn Prince, il pourra la reprendre incontinent, encor qu'il employe vn an à dresser son armée, ou qu'il soit necessité de faire des loix & autres affaires, où il cōsumera plusieurs années. Il faut encore que nous prenions garde à l'ambiguité de ceste seconde limitation (s'il n'y a autre remede): car s'il entend vn remede legitime, on luy accorde, & par ainsi la limitation sera dans la mesme proposition de Gerson: car quiconque dit, que *vim vi repellere licet*, il adiousté ou y supplée *cum moderamine inculpate tutelæ*. Mais s'il entend vn remede qui soit preiudiciable à la persone offensée, on trouuera bien contre toutes les forces iniustes d'autres remedes que d'y resister, c'est d'endurer & prendre tout en patience: mais persone n'est obligé d'vser de ce remede; au contraire qui en vseroit, il pecheroit bien souuent: comme quand le remede tourneroit non à son propre preiudice seulement, mais aussi à l'interest d'autrui. Que le Lecteur considere ceste captieuse ambiguité, par laquelle L'AVTEVR tasche de le seduire. Il dit premierement, que la proposition est veritable avec ceste limitation (pourueu qu'il n'y ait point d'autre remede): & apres vn long discours, il adiousté que la Republique de Venise a la remede en main, qui est l'obeissance, sans recourir à la force, ny au secours des autres Princes. C'est tresbien dit: cecy est le remede, mais fort preiudiciable, non tant à la liberté qu'elle tient de Dieu, qu'à la vie, aux biens & à l'honneur de ses subiects. C'est pourquoy elle n'en doibt vsar, & si elle le faisoit, elle pecheroit grandement pour raison de l'interest d'autrui.

Que

si tout autre remede est inutile, comme dit L' A V T E V R, c'est à Dieu d'en disposer, & l'euencement le fera cognoistre: sur quoy ie prieray L' A V T E V R ne donner son iugement deuant le temps, afin qu'on ne luy reproche, *mibi autem pro minimo est, vt à vobis iudicet, aut ab humano die.* Or' que la force dont vse aujourd'huy le Pape, soit iuste & paternelle, comme dit L' A V T E V R, c'est le point qui est principalement en controverse, & où il se falloit arrester, non pas le passer legerement, comme il fait avec vne simple affirmation.

Mais ie ne peus cognoistre à quelle escriture L' A V T E V R dit que sa doctrine est conforme: Ce n'est pas au 13. chap. de l'epistre aux Romains, ny au 3. de celle à Timothée, moins encor au 2. de la premiere de S. Pierre, ny au 22. de S. Marc, ny aux douze Canons qui traictent de ceste matiere II. *quest. 3.* Que de tout temps l'Eglise en ait vse, nous n'en voyõs rien, sinõ plus de mille ans apres nostre salut: Il est vray que plusieurs Papes ont depuis interdit quelques Republiques & Royaumes, mais on leur a tousiours bien resisté lors qu'ils ont abusé de leur puissance legitime. Il ne se faut arrester à l'opinion que la posterité a conceu des actions de ce temps-la, car il arriue souuent qu'elle prouient de la passion de ceuls qui en escriuent, & Dieu par ses iugemens sectets permet quelquefois que la iuste cause succombe au iugement des hommes. Mais la resistance que fist le Roy Philippes le Bel à Boniface VIII. & Louys XII. à Iule II. semblable à celle dont la Republique vse pour le iourd'huy est fort louée par Louys Richeome Prouincial des Iesui-

ftes en son Apologie chap. 25. & proposée pour exē-
 ple, digne d'imitation. Voire mesme au chap. 24. il
 dit, que quand quelque Pape viendra à offenser vn
 Roy de France, comme firent ceuls-la, les Iesuites
 feront en telle occurrence, ce que firent lors les
 François, qui s'vnirent tous avec leur Roy pour la
 deffense de sa Majesté. A la verité ie ne sçay com-
 ment ie doibs respondre à la derniere partie, où
 L'AVTEVR dit que la Republique a d'autres re-
 medes que la resistance: car ces parolles de prime fa-
 ce me donnoient grande esperance de voir incon-
 tinent tout ce trouble appaisé: mais venu à l'expli-
 cation de son dire, ie suis demeuré grandement
 estonné, voyant que ce remede n'estoit autre, sinon
 de se rendre à celuy qui nous viendroit assaillir avec
 armes pour raur nostre bien, & luy donner tout ce
 qu'il demande. L'obeissance est entre les termes
 que nous disons ambigus, & qui sous vn beau pre-
 texte nous pourroit bien tromper. Elle semble estre
 chose sainte, comme elle est en effect, lors qu'on la
 rend à vn iuste & honnesté commandement: mais
 estant rapportée à vn commandement tyran-
 nique ou abusif, elle n'est pas bonne, & alors la des-
 fense naturelle tient son lieu. Dieu a donné la liber-
 té à la Republique de Venise, & commandé de la
 conseruer, & garentir ses subjects de tout oultrage
 & opprobre: Si quelqu'un luy commandoit de re-
 uoquer quelques loix necessaires à cest effect, & ne
 point defendre la vie, les biens, & l'honneur de ses
 subjects, sinon contre ceux qu'il luy plairoit, & que
 elle le fist ainsi, ce seroit obeir en apparence, mais en
 effect commettre vne extrême desobeissance en-

uers Dieu. Or elle a tousiours obey à la puissance Ecclesiastique, en ce qui est de iustice, l'a tousiours reueré, faucrisé, & augmenté, comme nous esperôs qu'elle continuera Dieu aydant, qui luy donnera ceste grace de faire tousiours de mesme: & qui aussi par sa toute puissance conuertira ce trouble en trāquilité, au contentement d'elle & du S. Siége Apostolique. Il ne faut obmettre icy l'interpretation que donne L'AVTEVR au decret du S. Concile, en la Session 25. chap. 3. fort esloignée du vray sens. Le Concile defend aux Magistrats Seculiers d'empescher l'Ecclesiastic d'excommunier quelqu'un, ny faire reuoquer la censure qui est iettée lous pretexte que le cōtenu en ce decret n'y auroit esté obserué: & L'AVTEVR dit ainsi, *Le Saint Concile de Trente y a pourueu, defendant par expres aux Princes Seculiers de n'empescher les Ecclesiastiques de setter censures, ny leur commander de reuoquer celles qui sont desia fulminées, qui n'est pas le sens du Concile: car en premier lieu il supprime ces parolles suiuanes, sous pretexte que le contenu en ce decret n'auroit esté obserué, ce qui n'empesche pas, comme il est dit cy-dessus, qu'on ne le puisse faire pour autre subject. Secondement le Concile defend à tous Magistrats Seculiers, & nostre AVTEVR dit, aux Princes Seculiers: Mais tout Iuriconsulte dira qu'en matiere odieuse le Prince n'est compris sous le nom de Magistrat. En 3. lieu le Concile parle de la defense & commandement iudiciaire, & nostre AVTEVR le rapporte à la resistance naturelle, laquelle luy-mesmes au lieu sus-allegué ch. 29. du 2. l. de Romano Pontifice, a nié estre acte de Iurisdiction: Doncques alleguer ce lieu du Con-*

cile sur le fait dont est question, c'est luy donner trois faulſes interpretations.

II. L'vnziesme proposition est, qu'on n'encourt point le meſpris des clefs, quand quelque Iuriſconſulte, ou Theologien dit en ſa conſcience qu'il ne faut craindre telles ſentences, meſmement ſi on y procede avec grande prudence, & qu'on en ſoit deuëment informé, de crainte qu'il n'y ait du ſcandale pour le regard des plus imbeciles, qui eſtiment que le Pape ſoit vu Dieu, & qu'il aye toute poiſſance au ciel & en la terre, &c. Ceſte proposition pour parler modeſtement eſt ſans conſideration: car ſi Gerſon euſt dit pour le moins qu'ès choſes douteuſes vn ignorant ſe peut rapporter au iugement d'vn Theologien ou d'vn Iuriſconſulte qui ſoit reputé docte & homme de bien, mais de ſ'en remettre indifferemment à vn Theologien, ou Iuriſconſulte quel qu'il ſoit, & principalement quand il s'agit de l'obeiſſance deuë au Pape, c'eſt vne tres-grande temerité, d'autant qu'il eſt certain qu'ès choſes douteuſes il faut obeir au ſuperieur, & n'aller iamais au contraire, ſi ce n'eſt qu'on voye clairement qu'il commande choſe qui ſoit directement contre Dieu: En apres combien voit-on de Theologiens & de Iuriſconſultes, qui par ignorance, ou par malice ſe peuuent tromper? & ſi l'vn enſeigne d'vne façon, & l'autre d'vne autre, auquel ſ'en peut-on rapporter? Les Princes Seculiers ne permettroient en façon quelconque que celuy qui ſeroit condamné par eux ſ'excuſaſt d'obeir à la ſentence ſoubs ombre qu'vn Theologien ou Iuriſconſulte luy auroit dit en ſa conſcience qu'il n'eſt tenu d'y obeyr: combien moins d'oc cela ſe doit-il toller en cas de l'obeiſſance qui eſt deuë au Vicair de Ieſus-Chriſt, auquel par droit diuin tous les Chreſtiens ſont ſubiectz & tenus d'obeyr?

L'AVTEVR en ceſte vnziesme proposition fait vne modeſte inuectiue contre Gerſon, deſirant qu'il

eust dit pour le moins qu'és choses douteuses vn ignorant se peut rapporter au iugement d'vn Theologien ou d'vn Iurifconsulte, qui ait reputation d'estre fort docte & homme de bien, comme si quelqu'vn alloit au Conseil pour chose qu'il tienne toute asseurée: car pour ignorante que soit vne personne, elle ne consultera pas de ce qui ne luy est pas douteus.

L'AVTEVR ne se contient pas d'aduantage d'as les bornes de la modestie, comme il promettoit à l'entrée, & dit que c'est vne grande temerité de soutenir qu'on peut se rapporter à vn Theologien ou Iurifconsulte quel qu'il soit, comme si en la traduction il y auoit *quel qu'il soit*, ou au Latin, *cuiuslibet*: Mais Gerson dit au Latin *aliquis*, & la traduction, *quelque*: Car en disant quel qu'il soit, il semble qu'on veuille signifier indifferemmēt docte ou ignorant, homme de bien ou meschant; ce qui toutesfois ne se doibt ainsi, entēdre: car qui va demāder conseil à quelqu'vn, il s'adresse tousiours à vn hōme suffisāt & capable, principalement au fait qu'il veut consulter. Gerson aussi le declare par expres quād il dit, *quelque Iurifconsulte ou Theologien en sa conscience, &c.* Et ce mot de conscience, (principalemēt dans Gerson) comprend suffisance & preud'homme, ainsi que lon peut voir en vn sien traitté de ceste matiere. Pattant quand Gerson dit qu'il se rapporte à la conscience d'vn Iurifconsulte ou d'vn Theologien, il entend parler d'vn qui soit estimē suffisamment docte, & hōme de bien: ce qui ne doibt estre trouuē mauuais par L'AVTEVR, car entre les modernes mesmes les plus estimez tiennent ceste opinion,

mais il suffira d'alleguer Nauarre sur le chap. *cum contingat, de rescrip. Rom. 2. num. 30.* où il dit formellement, *Nono infertur Canonicos Ecclesie B. securissime potuisse, ac debuisse communicare prefato E. in diuinis, ea ratione, qua qui vnus doctoris eruditione, ac animi pietate celebris auctoritate ductus fecerit aliquid, excusatur, etiã si forte id non esset iustum, & alij contrarium tenerent.* Il cite à ce propos plusieurs docteurs, & adiouste, *quod etiam ad excusationem à violatione censurarum procedere speciatim, satis fatentur.* Surquoy il en allegue encor plusieurs autres: mais i'adiousteray dauantage que ces parolles, quand quelque Theologien ou Iuriconsulte, &c. doibuent auoir vn effect singulier ou collectif, selõ la consequence de la matiere: de sorte qu'en vn cas le conseil d'vn seul suffira, & en vn autre on recherchera le Conseil de deux, trois, & quatre, & peut estre aulcunefois de cent. Mais sur le different qui se presente (encor que la matiere soit facile & claire) la Republique est allée au Conseil à plusieurs docteurs d'Italie & d'ailleurs, de sorte qu'il n'est besoin d'insister d'auantage sur ce mot *aliquis*. L' A V T E U R pour replique dit, que quand il s'agit de l'obeissance deuë au Pape, on ne doibt recourir au Conseil, parce qu'en choses douteuses il faut obeïr au superieur, qui est vne raison pour dire qu'il ne faut iamais pour chose que ce soit recourir au Conseil, d'autãt qu'en vn cas douteux, il faut tousiours prendre la plus seure partie, & qui la prendra ne pourra iamais faillir; donc il n'est iamais besoin de Conseil.

Or il se faut garder icy d'estre deceu par l'ambiguité de ce mot, *doubteux*, car comme nous auons

monstré ailleurs il s'entend en deux sortes, sçauoir que le doute est auant qu'on soit bien instruit & informé de la chose, ou qu'après vne exacte recherche & consultation elle demeure encor douteuse. Au premier cas ie dy que c'est peché d'obeyr au supérieur, parce qu'on se met en danger de contreuenir à la Loy de Dieu: mais au second i'aduouie qu'en vn fait douteux, l'on doibt obeyr au supérieur, ce qui n'empesche pas qu'õ n'en prene aduis, ains presuppose qu'on l'ait desia fait. D'abõdant les raisons suiuantés, par lesquelles L' A V T E V R prouue son dire, ont le mesme default, puis qu'il dit, *Combien y a-il de Iuriconsultes, qui par ignorance, ou par malice se peuent tromper? ce qui n'aduiet pas seulement au cas d'obeissance deuë à nostre Sainct Pere, ains aussi en tous autres doutes, & par ainsi il ne faudroit iamais aller au Conseil: il adiouste par apres, si l'vn enseigne d'une façon, & l'autre d'une autre, auquel s'en peut-on rapporter? Or il peut arriuer en toutes matieres que l'vn conseille d'une façon, & l'autre d'une autre, auquel donc s'en doit-on remettre? toutes raisons qui portēt plus en la conclusiõ qu'en la proposition sont captieuses. A cecy les Theologiens, qui ont escrit de la conscience, respondent, que si quelqu'vn erre apres auoir fait tout ce qui luy a esté possible pour s'instruire, il sera excusé, puis qu'il ne peut surmonter son ignorance. Partant si vn Iuriconsulte ou vn Theologien avec lequel i'auray cõferé me deçoit par ignorance ou par malice, & que i'aye eu iuste cause de croire qu'il estoit homme de bien & sçauant, ie seray excusé: Et si l'vn m'enseigne tout au contraire de l'autre, ie suiuray celuy que*

l'estimeray plus excellent, où ie me tiendray à ce que ie croyois auparauant, iusques à ce que ie fois plus à plain esclaircy, & que ma conscience soit mieuls assurée.

Mais ie ne pèus comprendre à quel propos l'AVTEVR dit que les Princes Seculiers ne permettroiēt iamais que celuy qu'ils auroient condamné s'excusast d'obeir à leur sentence, soubs pretexte qu'un Jurisconsulte ou Theologien luy auroit dit en sa conscience qu'il n'est tenu d'y satisfaire, & qu'on doit beaucoup moins receuoir vne telle excuse, lors qu'il s'agist de l'obeissance deuë au Vicaire de Iesus-Christ.

Il faut icy auant toutes choses remarquer, que Gerson ne dit pas generalement qu'un Chrestien n'encourt iamais le mespris des clefs quand un Jurisconsulte ou un Theologien luy aura dit en sa conscience qu'on ne doit obeir à la sentence, ains seulement quand le cas est douteux, & tellemēt douteux qu'il ne s'en peut resoudre de soy-mesme: partant si ce que le Prelat commande est clair de soy ou facile à entendre, comme s'il commandoit de fuir le blaspheme ou l'adultere, il n'y a point de doute qu'il ne luy faille obeyr: mais c'est autre chose quād un Estat est interdit pour cause que chacun scait estre iniuste, comme maintenāt nous presupposons & auons ailleurs bien prouué estre celle cy pour laquelle on a mis l'Estat de Venise en interditiō: car en ce cas il n'est besoin de conseil, attendu qu'il est tout certain que persone n'y doit obeir. Mais parlant des cas douteux seulement, ie dy, que l'argument que l'AVTEVR veut tirer des senten-

ces des Princes seculiers à celles du Prelat Ecclesiastique, n'est à pari ny à *minori*; parce que l'escriture sainte, qui a parlé de l'une & de l'autre puisſâce, n'a pas dit le meſme de toutes les deux. Car parlant de l'obeyſſance deuë aux Prelats en l'Epistre aux Hebreux elle dict, Obeyſſez à vos Prelats, parce qu'ils veillent pour vos âmes afin d'en redre cõpte: & pour celle qui est deuë aux Princes Seculiers, elle dit en l'Epistre aux Romains, Il est necessaire d'estre subiects, nõ pour le courroux ſeulement, mais aussi pour la conscience. Mon Prelat n'a rien à me cõmander, ſinon en ce qui touche le salut de mon ame, pour laquelle il veille: mais encor qu'il veille pour mon ame, ie ne dois pourtant dormir, ains veiller de mon costé tant que ie pourray, car Iesus-Christ me le commande ainsi, & c'est à moy de prendre garde que le Prelat n'aye ſoing d'autre chose que de l'ame, ou qu'il ne dorme pas lors que l'on pense qu'il veille: & si ma vigilance ne ſuffit, ie prieray mon prochain, que i'estimeray plus vigilant, de m'aider & veiller avec moy: de sorte que quand ie seray en doute si mon Prelat veille ou dort, i'auray recours au Conseil. Mais le Prince veille tousiours pour rendre la iustice, comme Ministre de Dieu, où il ne se traite des choses qui concernent le salut de l'ame, ains des temporelles ſeulement: & partant ie ne veilleray ny ne m'en travailleray point, mais luy redray obeyſſance, premierement *propter iram*, puis *propter conscientiam*. Il est bien vray que si le Prince peruertissant l'ordre me commandoit chose qui touchast le salut de mon ame, comme de croire ou de ne croire pas quelque article de foy, i'y pẽserois,

& l'esplucherois de pres selon la Loy de Dieu, & si ie doubtois que cela fust preiudiciable à mon ame, i'irois au Conseil vers les Theologiens, & le Prince me le deuroit permettre; sinon à son refus, ie dirois *obedire oportet Deo, magis quam hominibus*: au contraire s'il me commande de demeurer dans la ville, de ne transporter dehors marchandise ny chose quelconque, de contribuer aux fraïs publics ou payer les imposts, de garder les murailles de la ville, & en somme tout ce qui tend à conseruer & maintenir la tranquillité & le repos du public avec l'assurance de son Estat qui empesche les troubles & autres nouveutez qui peuent causer du scandale ou de l'esmotion (choses qui regardent le public, & ou le particulier ne doit interposer son iugement, ains seulement suiure celuy de son Prince) ne s'agissant en tout cela du salut de mon ame, ains de choses purement & simplement temporelles, ie suis tenu d'y obeir sans consulter dauantage, *& propter iram, & propter conscientiam.*

Le soing du repos public appartient au Prince seul, le subject n'y a que voir, siñ pour executer ce qui luy est commandé, c'est poutquoy il n'a que faire d'y penser: Le salut de l'ame d'un chascun ne touche pas seulement au Prelat, mais aussi au subject, comme partie principale, au moyen dequoy chascun y doit penser pour son interest particulier. Et par là on voit clairement la difference qu'il y a entre les commandemens des Prelats & ceux des Princes, parce qu'il faut obeyr à ceux-cy, encor que on n'en sçache la cause; & pour le regard de ceux-là, il y faut bien aduiser. quand le Prince commãde,

c'est pour chose qui luy touche, & dont Dieu l'a chargé, & non pas moy, si ce n'est *passim*: Mais quād le Prelat commande c'est pour chose qui me regarde plus que luy-mesme, & partant ie suis tenu d'y penser plus que luy. Quant au Prince, ie suis obligé de luy obeyr absolument és choses temporelles, sans considerer s'il y vat de mon interest particulier ou non, parce qu'il est necessaire de preferer le public au particulier: mais ie ne doibs obeyr à mon Prelat, si ce qu'il commande est contre le salut de mon ame, encor que cela luy soit grandement profitable.

L'erreur qui est en cecy prouiet de ce qu'on veut donner au Prelat vn pouuoir sur les choses temporelles, & changer le ministere Ecclesiastique en vne iurisdiction Seculiere: car dieu a cōmis au Prince la charge du repos public, avec pouuoir d'imposer des peines tēporelles, pour crainte desquelles il lui faut estre sujet, qui est ce qu'il dit, *propter iram*: & outre ce le commandement de Dieu enioinct de luy obeyr, qui est *propter conscientiam*. Quant au ministere Ecclesiastique, dieu a chargé le Prelat d'auoir soin des ames, sans y appliquer directement aucunes peines temporelles, & partant il n'a pas commandé de luy obeyr *propter iram*: là où au contraire S. Paul parlant de la puissance temporelle, dit, *non enim sine causa gladium portat*, & pour le ministere Ecclesiastique *exerectur per gladium spiritus, quod est verbum Dei*.

Donc la conclusion de L'AUTEUR, que tous les Chrestiens *iure diuino* sont subjects, & doibuent obeyssance au Vicaire de Iesus-Christ, se doit en-

tendre pour le regard des choses spirituelles, & qui concernent le salut des ames, aux cas de conscience, & quand il commande conformément à la loy de Dieu. Car pour les choses temporelles les Princes Souuerains ne sont subjects qu'à Dieu seul, duquel ils tiennent immediatement leur puissance & authorité. Venons maintenant à ce qui suit.

Que si les plus foibles d'esprit tiennent que le Pape soit vn Dieu, & qu'il ait toute puissance au ciel & en la terre, ceste foiblesse est beaucoup plus agreable à Dieu tout puissant que n'est la force de ceux qui s'estimans sages taschent d'aneantir l'authorité du Vicair de Iesus-Christ, comme font pour le jourd'huy tous les heretiques. Ce n'est pas merueille que le Pape soit estimé vn Dieu en terre, puis que le Psalmiste dit de tous les Princes, ego dixi, dij estis: Il n'est encor inconuenient que l'on die que le Pape a toute puissance au ciel, & en la terre, puis que Iesus-Christ a dit, quodcūque ligaueris super terram, erit ligatum & in cœlis, ce que les bons & scauans Catholiques entendent sainement. En somme ie croy que ie peus dire avec verité, que la puissance du Pape est si grande, que peu de gens la peuuent comprendre, parce qu'il peut faire tout ce qui est necessaire pour la conduicte des ames en Paradis, & peut oster tous les empeschemens que le monde ou le diable avec leur force & astuce y peuuent apporter: à raison dequoy S. Cyrille, allegué par S. Thomas en son opuscule de Primatu Petri, dit que comme Iesus-Christ a eu de Dieu son Pere toute puissance sur toute l'Eglise, ainsi il l'a donnée à saint Pierre, & à ses successeurs.

Gerson dit seulement qu'il faut instruire les imbeciles & les scrupuleux, qui estiment que le Pape soit vn Dieu, & qu'il aye toute puissance au ciel &

en la terre: & L' A V T E V R respond que leur foiblesse est plus agreable à Dieu que n'est la force des heretiques, qui se reputās sages, mesprisēt l'authorité du Vicaire de Iesus-Christ: C'est tout de mesme que si quelqu'un blasmoit l'avarice, & vn autre voulant luy contredire vinst à repliquer que c'est chose plus agreable deuant Dieu d'estre auare du sien que de le despencer en luxe & superfluitez; comme s'il n'y auoit pas vn milieu entre ces extremitez, qui est la liberalité. Pour bien parler il faudroit dire que c'est chose moins desplaisante à Dieu d'estre auare, que prodigue, & neantmoins que tous les deux luy desplaisent. l'aduoie que c'est vn grand peché de nier la vraye authorité donnée par Iesus-Christ à son Vicaire; mais ie dy pareillement, que l'ignorance de ceux qui luy en attribuent plus qu'il ne faut, n'est à loüer. La verité est tousiours agreable à Dieu, & l'ignorance qu'on ne peut vaincre n'est pas bonne, mais est excusable: Tant y a que c'est vne grande contradiction de dire que chose aucune faulse puisse plaire à Dieu. L' A V T E V R qui se plaist à parler proprement, pouuoit dire que ceste foiblesse d'esprit desplait moins à Dieu que la force des heretiques, & seroit loüé de parler ainsi; parce qu'il donneroit à entendre ce qui est vray, que ny l'une ny l'autre de ces extremitez ne luy est agreable. Ie prie L' A V T E V R ne trouuer mauuais si on dit qu'il est vtile & necessaire d'enseigner les ignorans, afin qu'ils n'attribuent au Pape plus que son authorité legitime: car S. Gregoire dit le mesme 2. quest. 7. & en rend la raison, *Admonendi sunt subditi ne plusquam expedit sint subiecti, ne cum student plusquam necesse est*

hominibus subiecti, compellantur etiam eorum vitia venerari. Ce saint personnage pouuoit-il plus expressement confirmer la doctrine de Gerson? Cestuy-cy dit qu'on doit instruire les consciences scrupuleuses de ceux qui croyent que le Pape soit vn Dieu: & S. Gregoire dit qu'il faut admonester les peuples de ne se rendre plus subiects qu'il ne faut; & qui est plus à remarquer, en rēd ceste raison: de crainte qu'ils ne soiēt contraincts honorer les vices de ceux ausquels ils se rendent subiects, plus que leur deuoit ne requiert. A quoy on peut adiouster sans crainte de faillir, que la coustume des hommes est d'imiter tout ce qu'on honore, & par là conclurre qu'il est tres-vtile d'arracher ces faulses impressions de leurs esprits. Quant à ce que L'AVTEVR adiouste, que ce n'est pas merueille que le Pape soit estimé vn Dieu, parce que tous les Princes sont appelez Dieux, ie responds qu'en cela il n'y peut auoir aucun inconuenient, pourueu que nous ne soyons abusez par ceste ambiguité: car si on vouloit inferer de ceste proposition là qui est bonne, *ergo Papa, & Deus idem constituunt Tribunal; ergo Papa, & Dei idem est consistorium*, ce seroit luy donner vne diuinité, que Gerson n'approuue pas.

Outre ce L'AVTEVR ne trouue pas encore estrange de dire que le Pape a toute puissance au ciel & en la terre, parce qu'il est escrit, *quodcūque ligaueris super terram, erit ligatum & in cœlis*: & toutesfois chacun ne trouueroit pas ceste conclusion bonne, parce que la puissance appartient à la faculté active, & *quodcūque* à la matiere. Si ie dy que le Curé fait tous les mariages, il ne s'ensuit pas qu'il ayé toute puissance sur

les mariages. En disant aussi *quodcúmque ligaueris super terram, erit ligatum & in cælis*, il ne s'ensuit pas, *ergo quocúmque modo ligaueris*, & c'est ce que Gersó improuue, & croy aussi que c'est ce que L'AVTEVR a voulu designer, quand il a dit que cela estoit sainement entendu par tous les bons & doctes Catholiques. Partant ceste proposition, que le Pape a toute puissance au Ciel & en la terre, est absolument faulse: & luy donnant son vray sens, il est certain que les puissances que le Pape n'a pas ny au Ciel, ny en la terre, sont beaucoup plus que celles qu'il y a: d'oc si entre les Logiciens vne proposition est renduë faulse par vne seule instance contraire, celle qui a plus de faulses que de vrayes instances, est entiere-ment faulse. L'AVTEVR dit par apres, qu'il estime pouuoir dire en verité, que la puissance du Pape est si grande, que peu de gens la peuuent comprendre, ce que ie croy aussi: Car le vray n'est qu'vn, & le fauls est infiny; & plusieurs luy en attribuent moins qu'il ne faut, & d'autres plus: C'est pourquoy le nombre est si petit de ceux, qui luy rendent ce qui luy est deu. Monsieur le Cardinal Bellarmin faiçt vn grand discours en son traicté de *Romano Pontifice*, limitant l'authorité du Pape, & rapportant plusieurs choses que le Pape ne peut faire: & ce qu'il a dict maintenant eust esté en vain, s'il n'y eust adiousté l'exces de la puissance, qui est, que le Pape peut faire tout ce qui est nécessaire pour la conduicte des ames en Paradis, & oster tous les obstacles, que le Monde & le Diable par leur force & cautelle y pourroient opposer, qui est vne proposition fort plausible, & neantmoins faulse:

Car pour conduire au Ciel l'ame d'une creature, qui est dans le ventre de sa mere qui ne la peut enfanter viue, il seroit besoin en quelque façon de luy faire auoir la Grace: donc le Pape le peut faire? cela est faux, car il ne peut instituer vn Sacrement à cest effect, ny permettre l'incision du ventre de la mere, & par consequent il ne peut faire ce qui est necessaire pour mettre ceste ame en Paradis: pareillement si quelqu'un estant en peché mortel deuiet actuellement insensé, il ne peut estre sauué s'il ne retourne en son bon sens, & s'il n'a repentance de son peché: le Pape le pourra-il faire deuenir sage? ie croy que non; & toutesfois cela est necessaire pour son salut. Dauantage il n'y a rien si necessaire pour le salut que les mouuements internes de l'Esprit: & neantmoins saint Thomas nie que le Pape aye aucune puissance sur iceux. En somme il y a infinies choses necessaires pour conduire les ames en Paradis, sur lesquelles ie monstrey que le Pape n'a point de puissance; & pleust à Dieu qu'il en eust, & (comme dict L'AUTEUR) qu'il peust oster tous les empeschemens que le Monde & le Diable par leur astuce y peuuent apporter, car nous n'aurions plus de Turcs, ny d'heretiques. Il y a aussi vne infinité d'empeschemens, que les ennemis du Royaume de nostre Sauueur opposent tous les iours, auxquels le Pape ne peut apporter autre remède, que de faire ceste priere *Et ne nos inducas in tentationem.* Nostre Dieu non seulement n'a pas voulu donner la puissance d'oster les empeschemens que le Monde & le Diable nous opposent, ains a iugé tres-vtile à l'Eglise de les laisser. Le Lecteur maintenant peut iuger

juger, avec combien de raison Gerson admoneste que les simples & ignorans soient instruits, puis que nous voyons icy quatre propositions notoïrement faulses prononcées par vn tres-sçauant homme pour estendre la puissance donnée de Dieu outre les bornes qu'il y a prescrites. Nous expedierons sommairement la douzième proposition, puis que l'objection aussi est sommaire. L'AVTEUR dict,

La douzième proposition est, que ceux-la entretiennent le mespris des clefs, qui au lieu de s'opposer à l'abus des clefs, se diuisent entre eux, & s'empeschent l'un l'autre. La verité est, qu'on doit tenter toutes voyes humbles & fauorables, pour traiter avec le Pape, lors qu'estant mal informé il prononce des sentences iniustes; mais si l'humble submission n'y profite de rien, il se fault tout d'une main esuertuer à vne virile & courageuse liberté. Ceste proposition estoit fort à propos du temps de Gerson, auquel y auoit vn schisme de trois Papes, où chascun d'eux fulminoit des censures contre les partisans des autres. Alors c'estoit bien fait aux fideles de s'vnir ensemble pour oster le Schisme, & peu de gens se soucioient de ces censures, car il estoit incertain lequel d'entre euls estoit le Vicaire de Iesus-Christ, & nonobstant toutes excommunications, ils s'employeroient à remettre l'union en l'Eglise. Mais à present, que par la grace de Dieu nous n'auons qu'un seul Pape, qui est vray & legitime, ceste proposition est hors de propos, & ne sert à autre fin, qu'à susciter vn nouveau schisme, & mettre diuision entre les membres & le chef.

Si l'AVTEUR pense que Gerson aye escrit ce traité au temps du Schisme, qu'il relise la huitième proposition, & il verra clairement qu'il a esté escrit depuis le Concile de Constance, & lors qu'il

n'y auoit qu'un seul Pape: mais s'il a quelque autre artifice secret, on ne le scauroit deuiner, encore qu'on s'en doute; Car il n'est vray semblable, qu'il n'aye pris garde au temps que ce traicté fut escrit. Or il n'y a point d'apparence que ceste proposition ait esté escrite par Gerson, pour l'accommoder à ce qui estoit passé: Au contraire il appert qu'elle ne se peut rapporter au temps du Schisme, lequel parauanture Gerson preuoioit pouuoir aduenir. Car elle ne parle en façon quelconque de l'vniõ de l'Eglise, mais seulement d'oster les abus. Dauantage quand le Pape n'est pas recogneu pour vray & legitime, on ne luy doibt pas tel hõneur & reuerẽce que Gerson conseille de rendre en toute douceur & humilité, qui est chose seulement deuë à celuy qui est receu pour vray Pape. Et sans nous arrester plus lõguemẽt sur ce point, le lecteur lisant le traicté de Gerson, & ce que L'AUTEVR objecte, & considerant si hors du temps de schisme il y peut auoir abus des clefs, & que ceux qui deburoient s'y opposer, sont tous diuisez entre eux, & s'empeschẽt les vns les autres, ou par imprudence, ou par malice; aucuns fauorifants les abus, & les autres s'estudians de les oster, il verra dequoy principalement il parle, & si l'objection y vient à propos.

Quant à ce qu'il dict sur la fin, que ceste proposition ne peut seruir à autre effect, qu'à exciter vn nouveau Schisme, cela ne se peut dire; si on ne dict quant & quant, que la doctrine de saint Gregoire au Canon *Admonendi* sus-allegué, est faulse, & propre à susciter vn Schisme, puis qu'elle enseigne qu'il faut admonester le peuple de ne se rendre point

plus subiect qu'il ne doibt, de crainte qu'il ne soit contrainct d'honorer les vices de ceux ausquels il se soubmet plus que le deuoir ne commande. Ceste douzième proposition sert plustost à oster les abus de l'Eglise de Dieu; ce que tous les fideles depuis tant de siecles desirent si ardemment: Elle sert encor à maintenir la sainte Eglise en paix & tranquillité; comme aussi à empescher les schismes & diuisions: parce que plusieurs Prouinces & Royaumes se sont par le passé separez de l'Eglise Romaine, non pour autre subiect, qu'à cause que les Papes ont voulu entreprendre sur le temporel. Au demeurant nous deuous tenir pour certain que nostre saint Pere le Pape Paul V. a vne tres-bonne intention de vouloir remedier aux abus de long temps introduicts, qui regnent encores pour le iourd'huy, dont la violence est si grande, qu'il ne fault, s'esmerveiller, s'ils ont attiré plusieurs personnes de bonne conscience, contre leur propre inclination, à faire ce qu'ils auoient volonté de faire.

RESPONSE AV SECOND
 TRACTÉ DE GERSON
 INTITVLE'

L'Examen de ceste proposition *Sententia*

• *Pastoris etiam iniusta, est timenda.*

A V second Traicté de Gerson est rapporté qu'un certain commissaire Apostolique insera en son proces verbal ceste proposition suivante, Nos sentences pour

M ij

iniustes qu'elles soient, doibuent estre redoubtees & obseruees. Sur ceste assertion il fait vn iugement diuisé en plusieurs propositions qui s'ensuiuent.

La premiere, que ceste assertion est faulse. La seconde qu'elle est impossible. La troisieme qu'elle est erronée, quant aux coustumes. La quatriesme qu'elle est suspecte d'heresic. La cinquiesme qu'elle rend son auteur suspect en la foy, & partant doibt estre appellé en iugement, afin d'interpreter ou retracter son dire; & s'il demeure obstiné, faudra l'enuoyer au bras Seculier.

Voila en somme le iugement de Gerson, lequel on verra par le discours suiuant estre par trop rigoureux. Ce Commissaire, soit vray ou supposé, non content d'auoir dict que les sentences bien qu'iniustes doibuent estre redoubtees suiuant le dire de saint Gregoie, adiousta en oultre qu'elles doibuent estre obseruees. Il se pouuoit bien passer d'y adiouster ces parolles, mais elles ne meritent toutesfois vne si seuerere reprehension comme est celle de Gerson, qui a prins en mauuaise part ce qui se pouuoit favorablement interpreter.

Or il reprend en ce commissaire deux choses, desquelles nous traiterons sommairement. La premiere, pource qu'il a dict indistinctement que ses sentences, bien qu'iniustes, doibuent estre redoubtees, parce qu'il semble vouloir inferer de là, que toutes les sentences iniustes soient à craindre, ce qui n'est pas, ains seulement celles qui sont iniustes, ayans neantmoins d'ailleurs force & valeur, comme on voit dans Gratian 2. quest. 3. per totum. On respond à cecy, que le dire du Commissaire doibt estre interpreté comme celuy de saint Gregoie, & des saints Canons; & qu'encor que saint Gregoie die indistinctement que la sentence du Pasteur iuste ou iniuste est à crain-

dre, il ne s'ensuit pas pourtant qu'il faille craindre toutes les sentences du Pasteur, mais seulement celles qui ne sont point nulles, bien qu'elles soient iniustes. Par ainsi il ne faut conclure par les parolles du Commissaire, que toutes sentences soient à craindre, mais seulement celles qui ne sont notoirement nulles, bien qu'elles soyent iniustes. En somme, il n'y a pas plus à calomnier aux paroles du Commissaire, qu'en celles de S. Gregoire.

Le second Traicté de Gerson contient plusieurs choses qui font clairement apparoir de l'equité qui est en la cause de la Republique de Venise, ensemble de la nullité des censures fulminées contre icelle; & L'AUTEUR en ceste response les dissimule toutes, & se met à disputer contre Gerson, & à montrer que de ceste assertion faicte par vn Commissaire du Pape noz sentences bien qu'iniustes doibuent estre gardees & redoubtees, on peut tirer vn bon sens: & par ainsi, que Gerson s'est montré trop seuer censeur en son endroiect, prenant en mauuaise part ce qui pouuoit estre fauorablement interpreté: & ne se souuiét plus qu'en sa respõse, au premier traicté, il a non seulement prins les parolles de Gerson à la rigueur; mais aussi quand Gerson s'est interpreté aus choses ambiguës, il n'a pas laissé d'insister au contraire de son intention, en supprimant le vray sens que Gerson y apportoit, & impugnant celuy qu'il reiectoit: Et lors qu'il a esté contrainct de confesser que la doctrine de Gerson estoit entierement veritable, il a inuenté qu'elle estoit iniurieuse, comme il se void en la neuuesime proposition: ou bien faisant vne transposition des temps, il a simulé de croire que le Traicté de Gerson estoit escrit deuant

le Concile de Constance, lequel neantmoins a esté fait apres, comme pareillement ce second, veu qu'en iceluy il fait mention de ce Concile, & de la Regence du fils de Charles V I. Roy de France, qui fut l'an 1418. ce que j'ay voulu dire en passant, pour monstret que ces deux Traictez ont esté composez pendant le Pontificat de Martin V. seul recognu pour vray Pape; & par consequent L'AVTEVR avec ses subterfuges accoustumez, disant, que la doctrine de Gerson est seulement pour le temps du Schisme, ne pourra par ce moyen euitter la force des argumens. Or Gerson ne nie pas que l'assertiõ du Commissaire ne puisse auoir quelque bon sens, puis qu'il dict, qu'il le fault contraindre d'interpreter son dire, ou de le retracter: mais il nie que ceste assertion soit veritable, en la forme qu'il l'a faite. Car c'est chose tres-certaine, que qui examine vne assertion qui est proposee comme vne These generale sans presupposition d'aucun cas particulier, il l'examine selon le sens formel des parolles; mais venant à l'hypothese, il la considere selon le sens que luy donne le cas particulier; & partant nostre AVTEVR la prend bien en toutes les deux sortes: Car premierement la prenant comme These, il dict, qu'il ne s'ensuit pas de là, qu'on doibue craindre toutes les sentences iniustes, comme Gerson assure, mais que cela se doibt seulement entendre de celles, qui bien qu'elles soient iniustes, ne sont pas toutesfois nulles, pource qu'autrement on en pourroit autant dire de l'opinion de saint Gregoire, qui enseigne que la sentence du Pasteur iuste, ou iniuste est à craindre, veu qu'il parle sans

aucune distinction ; & toutesfois il s'entend de la sentence iniuste, qui est valable. En somme L' AUTEUR conclud qu'on pourroit aussi bien calomnier les parolles de saint Gregoire, comme celles du Commissaire: il suffisoit de dire qu'on leur pourroit donner la mesme interpretation, sans parler de calomnie au fait de saint Gregoire, chose qui ne semble pas bien seante. Quand L' AUTEUR dist que le passage de saint Gregoire est subiect à la mesme interpretation, cela s'entend ou comme il est escrit dans saint Gregoire, ou comme il est dans Gratian, ou absoluëment comme il est en la bouche de qui en veult mal vser: En le prenant comme il est escrit dans saint Gregoire, ie dy qu'il ne se doit entendre ainsi, d'autant qu'il parle generalement de la sentence iniuste, sans distinguer si elle est nulle ou valable: mais ce mot *timenda* signifie *non per contemptum spernenda*: & chascun tient que *omnis sententia etiam iniusta etiam nulla*, aussi bien que *sententia Pastoris, non est contemnenda*: Voicy les parolles de saint Gregoire, *Is autem qui sub manu Pastoris est, ligari timeat, vel iniuste, nec Pastoris sui iudicium temere reprehendat, ne si iniuste ligatus est, ex ipsa tumida reprehensionis superbia, culpa, qua non erat, fiat.* & adiuste, *Sed quia hac breuiter per excessum diximus, ad dispositionem ordinis redeamus.* Or S. Gregoire oppose *timere* à *temere*, *tumide*, & *superbe reprehendere*, & en ceste sorte *omnis sententia etiam iniusta, & nulla, timenda*. Mais en ce sens, au lieu de *timere*, on ne pouuoit pas dire *obseruare*, comme fait le Commissaire; puis qu'une sentence du Superieur, qui commande de faire chose qui est peché, est à

craindre, selon S. Gregoire, & neantmoins ne doit en aucune façon estre obseruee: & L'AUTEUR pouoit voir ceste interpretation dans Gerson, lors qu'il dict que le dire de S. Gregoire se peut prendre en bonne part, mais non celuy du Commissaire, qui adiouste, qu'elle doit aussi estre obseruee. Dauantage si L'AUTEUR veut traicter de ce passage comme il est contenu aux decretz, qu'il entende s'il luy plaist ce qu'en dict le Compilateur apres le Canon, *si Episcopus §. pramissis auctoritatibus, Gregorius non dicit sententiam iniuste latam esse seruandam, sed timendam, sicut & Urbanus, timenda est ergo, id est non ex superbia contemnenda.* Si Gratian viuoit aujourd'huy, & qu'il entreprinst de defendre Gerson, il ne le pourroit mieuls faire, qu'en disant ce qu'il a dict il y a plus de quatre cens ans. Que si L'AUTEUR veut prendre le dire de S. Gregoire absoluement, il ne le peut rapporter à celuy du Commissaire, parce que *timere* a tout vn autre sens que *obseruare*: d'ailleurs tout homme docte & qui veut bien escrire n'alleque iamais vn passage sans l'auoir veu en la source, & diligemment examiné pour le bien entendre; & ne le tire iamais hors de son vray sens. D'où l'on voit clairement combien il y a de difference entre la maniere de parler de S. Gregoire, qui est sainte & modeste, & celle du Commissaire qui est absurde: Venons maintenant à la seconde partie.

Gerson reprend en second lieu le Commissaire, de ce qu'il a dict que ses sentences, bien qu'iniustes, sont à craindre, & doibuent estre obseruees; parce que c'est autre chose de craindre, & autre d'observer: On peut craindre la meschanceté d'un Tyran, mais non l'observer. Et qui dira qu'il

faulle obseruer vne meschanceté, il dir a faulx & sera en er-
 reur. On respond à cecy que le Commissaire (à ce qu'on peut
 croire) ne parloit point du commandement de quelque cho-
 se iniuste, ains seulement de la sentence d'excommunica-
 tion, en-tant que c'est vne peine qui priue l'homme de la
 participation des Sacremens & de la communion des fi-
 delles: & en ce sens on peut fort bien dire qu'on doit crain-
 dre & obseruer la sentence d'excommunication iniuste,
 parce que ce ne sont pas deux choses diuerses, de craindre
 & obseruer l'excommunication: car qui la craint, s'abstient
 de la participation des Sacremens, & de la communion
 des fidelles, & par ainsi il l'observe: & qui ne l'observe pas,
 ains conuerse avec les fidelles, & participe aux Sacremens,
 il ne la craint pas. De sorte que Gerson a prins l'equi-
 uoque entre la sentence qui commande quelque chose, & cel-
 le qui priue de quelque chose; & ayant fondé son dis-
 cours sur cest equiuoque, ce n'est pas de merueille s'il est
 fondé en l'air.

Pour deffendre l'assertion du commissaire en
 l'hypothese, il dit premierement que le Commis-
 saire (entant que l'on peut croire) ne parloit pas
 d'un commandement iniuste, mais seulement de la
 sentence d'excommunication, entant que c'est vne
 peine: & apres auoir monstré la difference, il cōclud
 que Gerson a prins l'equiuoque entre la sentence
 qui commande quelque chose, & celle qui priue de
 quelque chose: & qu'ayant ainsi fondé son discours
 sur vn equiuoque, ce n'est pas merueille si son fon-
 dement est en l'air. Le Lecteur remarquera cest ar-
 tifice, comment nostre AUTEUR ne sçachant pas
 de quoy parloit le Commissaire, coniecture neant-
 moins qu'il ne parloit pas du commandement de

chose iniuste, ains seulement de la sentence d'excommunication, qui est vne peine : & puis conclud assurement que Gerson a prins l'equiuoque : Tout au contraire Gerson n'a point pris l'equiuoque : mais par la verité du fait, comme nous monstrerōs, il sçauoit fort bien qu'on parloit d'un commandement d'une chose iniuste, & l'a specificé en ce petit liure. C'est plustost L' A V T E V R qui iette luy-mesme vn fondement en l'air ; car presupposant vne chose dont il n'appert pas, il condamne Gerson assurement d'auoir prins l'equiuoque ; comme si ces termes (*entant que l'on peut croire*) signifioient que la chose fut certainement ainsi : mais ayant reconnu en partie sa faulte, il se reprend incontinent, & dit :

Mais posons le cas que le Commissaire aye parlé de la sentence qui commande quelque chose sur peine d'excommunication ; encores n'a-il point mal parlé en ceste sorte. Car ou vne telle sentence commande quelque chose qu'on ne peut doubter qu'elle ne soit bonne, comme de rendre le bien d'autrui, ou qui est tout notoirement mauuaise, comme de desrober ou blasphemier, ou vne autre de laquelle on peut doubter si elle est bonne ou mauuaise, comme d'aller à la guerre, laquelle on doute si elle est iuste ou iniuste : Si elle commande vne chose euidemment bonne, il la faut garder & craindre, c'est à dire, il la faut observer en y obeissant, crainte d'encourir l'excommunication : & il peut aduenir qu'une telle sentence sera iniuste pour le default des trois monitoires qui doibuent preceder : & toutes fois elle sera valable, parce qu'elle commande vne chose iuste & raisonnable : & a esté prononcée par celuy qui a puissance de ce faire, y ayant eu pour le moins vn monitoire precedent. Que si la sentence est douteuse, & commande chose qui ne

soit manifestement bõne, ny mauuaise aussi, il la faut en ce cas obseruer & craindre, d'autant qu'en vn cas douteux le subiect doit suiure le iugement du superieur & non le sien propre, comme a esté monstré cy dessus; & c'est la commune opinion des Sainctz Peres. Mais si elle commande quelque chose qui soit notoirement peché, alors il ne la faut obseruer ny craindre: & de dire qu'il luy faille obeïr, c'est erreur: & en ce cas les cinq propositions de Gerson seroient veritables: car sans doute c'est vne faulseté, de dire qu'une sentence qui enioinct de pecher doibue estre obseruée, & est mesmes impossible qu'une telle sentence oblige persone à la garder: C'est pareillement vne sentence erronée, non seulement quant aux coustumes, parce qu'elle montre le chemin à mal faire, mais aussi quant à la foy: car qui dit qu'il soit permis de mal faire, est heretique: & s'il ne se repent, doibt estre liuré à la iustice Seculiere, pour estre puny selon son demerite. Et par ainsi on ne doibt pas obseruer telles sentences, & moins encor les craindre: car nostre Sauueur dit, *Nolite timere eos qui occidunt corpus,* & l'on doibt plustost mourir que d'obeïr à vne telle loy. Quant à ce quatriesme membre que Gerson met en auant, il ne se retrouue point, sçauoir, qu'on doibt ou qu'on peut bien craindre vne sentence, & non pas l'obseruer; parlant de la crainte, qui nous induict à l'obseruation; car on peut bien auoir vne terreur naturelle du Tyran qui commande choses iniques. Le Commissaire tout esfois n'a point encores failly en tout cecy, car il a tousiours parlé de la sentence iniuste, mais qui est valable; non pas telle que celle qui commande de pecher, qui est notoirement nulle.

Voilà doncques comment tout le discours de Gerson est fondé en l'air: & celuy qui l'a traduit & mis en lumiere, pour enseigner les Venitiens de mespriser la sentence iuste

Orvalable de nostre Sainct Pere, a bien monstré qu'il auoit plus de malice & de meschanceté que de iugement.

Pour l'exposition de l'opinion de Gerson & de la verité, outre les choses susdites, qu'il y a des sentences qu'on doit craindre & non garder, il est necessaire d'apporter la mesme distinction de L'AVTEVR, qui dit, ou que la sentence commande chose qui est notoirement bonne, ou notoirement mauuaise, ou bien douteuse: au premier cas, si ce qui est commandé est tellemét iuste qu'on n'en puisse doubter, nous sommes d'accord avec L'AVTEVR qu'il y fault obeir: pour le troisieme, s'il y a quelque doute à cause de l'équiuoque, nous distinguerons premierement, comme nous auons fait auparauant, ce mot (douteux) sçauoir si c'est auant qu'auoir examiné & pris aduis de la chose douteuse, ou bien apres: Au premier cas on n'est point obligé de l'observer, mais bien d'en demander conseil; & apres l'auoir fait, s'il y reste encore du doute, nous aduoüions qu'il faut suivre la volonté du superieur, & non la sienne.

Le Lecteur m'excusera, si tant de fois ie repete ceste doctrine, puis que L'AVTEVR met si souuent en jeu ses equiuoques, & pour faire qu'estans surpris on se laisse aller aux passions d'autruy. Quant au second cas, s'il est commandé de faire quelque chose mauuaise sur peine d'excommunication, & ce dans certain temps, lequel expité on encourt la censure: Ie dy que ceste sentence a deus chefs, par l'un desquels est commandé d'obeir dans certain temps: & par l'autre on defend la communion, au cas qu'il n'y soit obey dans le tēps prefix. Pour le regard du 1.

ie tiens avec l'AVTEVR que c'est peché de craindre ceste sentēce, & que qui la craint, il peche: & c'est ici qu'il faut dire, *Nolite timere eos qui occidunt corpus.* mais quant au second, qui defend la communion, le subiect n'y est pas tenu: toutesfois s'il le veult faire (pourueu qu'il ne contreuienne à quelque autre commandement) il ne pecheroit pas. C'est ce que Gerson dit icy, & que L'AVTEVR peut auoir leu en ces termes, *D'autant que les consciences craintiuues les peuent craindre en quelques cas, encor que pour cela on ne les doibue obseruer:* Partant il y a grand' difference de dire qu'on les doibt obseruer & qu'on les doibt craindre. Gerson entend que obseruer la sentence d'excommunication, c'est accomplir entierement le cōtenu en icelle, pour ne l'encourir; ou bien pour en estre absoult si on l'a encouruë. Il entend pareillement que la craindre c'est s'abstenir de la communion. Or qui obserue vne sentence portant vn commandement iniuste il peche, & qui la craint il ne peche pas, encor qu'il ne soit tenu de la craindre: Il y a donc grande difference de dire *nos sentences, bien qu'iniustes, doibuent estre redoubtées,* car cela signifie qu'il se fault abstenir de la communion pour reuerence d'icelles; & le commissaire en parlant ainsi, n'auroit failly en autre chose, sinon qu'il debuait dire qu'elles peuent, & non pas qu'elles doibuent estre redoubtées; mais en disant qu'elles doibuent estre gardées, il a fait vne faute beaucoup plus grande, parce qu'elles ne doibuent ny ne peuent estre gardées sans peché, bien qu'on les puisse craindre encor qu'on n'y soit pas obligé. Et cecy est le quatriesme membre, expressément declaré par

Gerſon, que L'AVTEVR ne peut trouver, & qui toutesfois ſe trouuera dans S. Gregoire, & dans Gratian, par tous ceux qui conſiderent les choſes ſans affection de contredire:

En après L'AVTEVR, qui auparauant ne ſcauoit pas certainement dequoy parloit le Commiſſaire, dit aſſeurément qu'il n'a point encore failly, d'autant qu'il a touſiours parlé de la ſentence iniuſte, mais au ſurplusvalable, ce que n'eſt pas celle qui commande de pecher. Or ie ſuis icy contrainct de faire vne petite diſgreſſion pour expoſer le fait, qui eſt le vray ſubject de ce dernier traitté.

Premièrement du temps du Concile de Conſtance, enuiron l'an 1399. Charles VI. Roy de France, aſſembla vn Concile Prouincial de tous les Prelats & Vniuerſitez de ſon Royaume; où entre autres choſes fut arreſté qu'on ne receuroit point les Bulles de la Cour de Rome pour le regard des reſeruations, & graces exſpectatiues, mais que les benefices electifs ſeroient conferez par eſlection, & les collatiōs des autres ſe feroient par les ordinaires: lequel decret pour eſtre gardé, & mis à execution, fut renouvelé par pluſieurs fois dans les vingt-ans enſuiuā, tant par autres ordonnances des Prelats du Royaume que par iteratifs Arreſts de la Cour de Parlement, nonobſtant tous les empeschemens que la Cour Romaine y apportoit avec ſes exécutoires & Commiſſaires.

Or que Gerſon parle d'vn Commiſſaire venu en France pour vn ſemblable fait, cela ſe iuſtifie clairement par la ſeconde propoſition, où ſe void auſſi que ce fut durant le Pontificat de Martin V. que Gerſo

escriuit: parce qu'il dit que le Roy depuis vingt ans
 en ça auoit assemblé le Concile des Prelats, lequel
 selō Guaguin fut assemblé en la mesme année 1399.
 Et en la troisieme proposition quand Gerson par-
 le du Fils du Roy Charles VI. il vse de ces mots, *A*
son fils legitime à present Regent, lequel print ce tiltre
 l'an 1418. comme tesmoigne François de Bellefo-
 rest: de sorte qu'on peut tirer de tout cecy que Ger-
 son composa ce traicté depuis l'année 1418. & deuāt
 l'année 1422. en laquelle Charles VI. mourut. Par-
 tant si Martin V. fut esleu en l'an 1417. il est certain
 que ce liure fut escrit durant son Pontificat, outre
 ce que Gerson en la quatrieme proposition parle
 du Concile de Constance, comme precedent. Il fal-
 loit donc que le Commissaire du Pape commandast
 d'executer quelque reserue contre les ordonnan-
 ces de ces assemblées; ce qui estoit (par l'aduis de
 Gerson) commander vne chose iniuste, & qui con-
 tenoit vne erreur intollerable contre la iustice pu-
 blique, & tendoit selon son opinion à vne vsurpa-
 tion indeuë: à quoy si nostre AVTEVR eust bien ad-
 uisé, il n'auroit pas dit que le Commissaire parloit
 d'vne sentēce iniuste, mais valable, puis qu'il appert
 clairement par la quatrieme proposition, que la
 sentence de ce Commissaire estoit contre les de-
 crets & Arrests sus-mentionnez; au moyen dequoy
 Gerson ne tient pas qu'elle soit valable. dauantage
 si le Commissaire estoit homme de conscience, il
 ne pouuoit tenir les sentences pour iniustes, mais
 voulant estre obey en quelque maniere que ce fust,
 afin de s'exempter de la difficulté qu'il eust peu
 auoir de faire apparoir de la iustice de son commā.

dément, il inféra dans son procès verbal qu'il falloit observer ses sentēces iustes ou iniustes : car s'il eust distingué la sentence iniuste en celle qui est valable & celle qui est nulle, on se fust arresté à débattre la validité d'icelle. C'est pourquoy il vſa de termes ambigus & generaux, taschant de persuader qu'il estoit nécessaire d'observer toutes ses sentēces, afin que par ce moyen il peut mettre à execution celle dōt il estoit chargé, comme font aujourd'huy quelques vns au fait dont il s'agit icy, qui se desiant de ne pouuoir faire apparoir de la iustice des commandemens faits par le Pape à la Republique, disent qu'il luy faut obeir encore qu'il commande chose iniuste. Au surplus, ie suis fort estonné que s'agissant icy de chose qui consiste simplement en fait, L'AVTEVR neantmoins parle contre l'histoire. Et voilà comment tout le discours de Gerson est fondé en l'air, comme si aux huit propositions suiuantes il parloit d'autre chose que de son subject, & en sortoit hors mal à propos. L'AVTEVR poursuit ainsi,

Gerson adionste à ce discours quelques propositions, pour monſtrer ce que peut & doit faire le Roy tres-Chrestien pour la defense de la liberté de l'Eglise Gallicane, desquelles propositions il n'est besoin de discourir en ce lieu, pour plusieurs raisons. Premièrement, parce que tout leur fondement est en ce principe, que le Concile est par-dessus le Pape, qui estoit la seule raison pour laquelle Gerson ne vouloit pas que le Pape peust changer les Canons anciens, sur lesquels l'Eglise Gallicane fondeoit pour lors sa liberté, voyant que ces Canons ayants esté faits par les Conciles, n'estoient subiects à la puissance & volonté du Pape: mais maintenant que ce principe est déclaré faulx, nous ne voyōs

pas que les Venitiens le puissent tenir pour véritable. En second lieu, parce que depuis le temps de Gerson au Concile de Latran sous le Pape Leon X. il fut derogé à la pragmatique sanction que l'Eglise Gallicane defendoit, & furent faicts les Concordats entre le Pape & le Roy tres-Chrestien, dont à present on n'allegue plus la liberte de l'Eglise Gallicane contre le Pape : ains au contraire le Roy tres-Chrestien, & tous les Euesques de France sont en bõne paix, & vnion avec leur Mere, qui est l'Eglise Romaine, & avec leur Pere, qui est le Pape, Vicair de Iesus Christ, & successeur de S. Pierre. Tiercement parce que la liberte Gallicane, de laquelle escrit Gerson, n'a que voir avec la liberte que pretend auionrd huy la Republique de Venise, veu que celle-la fondeit la sienne sur les anciens Canons, & celle-cy est contraire aux Canons, tant anciens que modernes.

Gerfon s'estant proposé de monstrier ce que le Roy tres-Chrestien debuoit faire pour la defense de la liberte de l'Eglise Gallicane en telles occurrées que celle du Commissaire, l'exemptant des reserues expectatiues, & autres abus qui se commettoient lors en Cour de Rome, met en auant huit propositions telles, que L' A V T E V R a prudemmēt iugé qu'il valoit mieuls les supprimer, que les impugner; voyant bien que de les vonloir refuter, ce seroit peut estre les confirmer, & establir quant & quant ce qu'il a cy deuant improuué, que les Princes peuuent & doibuēt s'opposer aus commandemens des Prelats lors qu'ils sont iniustes & abusifs.

Or il s'excuse de toucher ces huit propositions, pour trois raisons : la premiere, parce qu'elles sont fondees sur ce Principe, que le Concile est par des-

sus le Pape, & pretend auoir monstré cy dessus que
 cela est faulx: il pouuoit toutefois adiouster, que
 nonobstant cela, les Vniuersitez de France tiennent
 & croyent le contraire, & alléguer le tesmoignage
 de Nauarre, & d'autres Docteurs: La seconde, par-
 ce qu'au Concile de Latran, sous le Pape Leon X.
 il fut derogé à la pragmatique Sanction, & par ainsi
 qu'on ne parle plus auioird'huy des libertés de l'E-
 glise Gallicane. Je croy que L' AUTEUR nous esti-
 me si idiots, & si ignorans de l'histoire, que nous ne
 sçachions pas, qu'autre chose est la liberté de l'E-
 glise Gallicane, dont parle Gerson, & autre chose la
 pragmatique sanction: celle-la est deuant Gerson,
 mais la pragmatique fut establie par le Roy Char-
 les VII. enuiron l'an 1440. long temps apres que ce
 traicté fut escrit, auquel il parle de Charles VI. son
 Pere encore viuant. Mais pourquoy ne dit-il que
 l'vniuersité de Paris se porta pour appellante au fu-
 tur Concile de la cassation de la pragmatique? Il
 presuppose encor que nous ne sçachions pas que
 c'est de la pragmatique, ny du Concordat, ny pareil-
 lement si la pragmatique est abrogée par le Con-
 cordat en tout ou en partie seulement. Mais ce qui
 surpasse toute animosité, c'est qu'il croit que nous
 soyons serrez en vne prison, & n'entendions rien de
 tout ce qui se passe pour le iourd'huy, & que nous
 ignorions encore qu'en France on interiecte tous
 les iours des appellations des Iuges Ecclesiastiques
 aus Cours de Parlemens, *tanquam ab abusu*, dont el-
 les prennent cognoissance. Nostre AUTEUR vraye-
 ment vouldroit bien que nous fussions tels, & que
 nous n'eussions cognoissance aucune des choses du

monde, sinon de ce qui est vtile aux Ecclesiastiques, & que reduits en vne extrême ignorance nous les eussions en grande admiration, faisant estat d'eux comme de quelques oracles.

La troisieme raison pour laquelle il n'a voulu toucher les huit propositions de Gerson, est (dit-il) parce que la liberté Gallicane de laquelle parle Gerson estoit fondée sur les Canons anciens, & la Venitienne est contraire, tant aux anciens qu'aux modernes. Je ne veux point entrer en debat de la verité de son dire: Mais la France n'est pas située au Iappon, en sorte qu'il faille attendre les aduis d'un an, pour sçavoir comme ce Royaume se gouverne. Tous les historiens François font mention des libertez de l'Eglise Gallicane, lesquelles toutes recueillies en vn volume ont esté imprimées à Paris l'an 1594. d'où j'en rapporteray icy quelques-vnes, en laissant sur ce le iugemēt au Lecteur: Ce volume oultre plusieurs autres particularitez porte expressément ce qui s'ensuit:

Les Papes ne peuuent rien commander ny ordonner, soit en general ou en particulier, de ce qui concerne les choses temporeles, es pays & terres de l'obeissancē & souveraineté du Roy tres-Chrestien, & s'ils y commandent, ou statuent quelque chose, les subiects du Roy, encor qu'ils fussent clerics, ne sont tenus leur obeir pour ce regard.

Encore que le Pape soit reconnu pour Suzerain es choses spirituelles, toutesfois en France la puissance absolue & infinie n'a point de lien, ains est retenue & bornée par les Canons, & reigles des anciens Conciles, receus en ce Royaume: Et in hoc maxime consistit libertas Ecclesiæ Gallicanæ.

Les Roys tres-Chrestiens ont de tout temps, selon les occurrences & necessité de leurs pais assemblé, ou fait assembler Synodes, ou Conciles Prouvinciaux, & Nationaux, esquels entre autres choses importantes à la conservation de leur estat, on y a pareillement traité des affaires concernant l'ordre & discipline Ecclesiastique de leurs Pays, dont ils ont eulz mesmes fait faire en ces Conciles des Reigles, Chapitres, Loix, ordonnances, & pragmatiques sanctions sous leur nom & authorité, & s'en lisent encores pour le iourd' huy plusieurs és recueils des Decretz, receus par l'Eglise vniuerselle, & aucunes approuuees par Conciles generaux.

Le Pape n'enuoye point en France des Legatz à laterre avec faculté de reformer, iuger, conserer, dispenser, & telles autres qui ont accoustumé d'estre specifiées par les Bulles de leur pouuoir, sinon à la postulation du Roy tres-Chrestien, ou de son consentement. Et le Legat n'vse de ses facultez, qu'apres auoir baillé promesse au Roy par-escrit, & sur son seing, & iuré par ses saints ordres de n'vser desdites facultez és Royaumes, pays, terres & Seigneuries de sa subiection, sinon tant & si longuement qu'il plaira à sa Maiesté, & qu'incontinent que ledit Legat sera aduertty de sa volonte au contraire, il s'en desistera & cessera. Pareillement qu'il n'vsera desdites facultez, sinon pour le regard de celles, dont il aura consentement du Roy, & conformement à iceluy, sans entreprendre ny faire chose preiudiciable aux saints Decrets, Conciles generaux, franchises, libertez & priuileges de l'Eglise Gallicane, & des Vniuersitez & études publics du Royaume. Et à ceste fin les facultez de tels Legats sont presentées à la Cour de Parlement, où elles sont veüs, examinées, verifiées, publiées & registrées sous telles modifications que la Cour

void estre à faire pour le bien du Royaume, suivant lesquelles modifications se iugent tous les differens & proces qui suruiennent pour raison de ce, & non autrement.

Les Prelats de l'Eglise Gallicane encore qu'ils soient mandez par le Pape pour quelque cause que ce soit ne peuvent sortir hors du Royaume sans commandement ou licence, & congé du Roy.

Les clauses inserées en la Bulle de Cena domini, & notamment celles du temps du Pape Iule II. & depuis n'ont lieu en France en ce qui concerne les libertez & priuileges de l'Eglise Gallicane, & les droicts du Roy ou du Royaume.

Le Pape ne peut iuger ny deleguer pour cognoistre de ce qui concerne les droicts, préeminences & priuileges de la courõne de Frãce, & ses appartenãces; & le Roy ne plaide iamais de ses droicts & pretensions qu'en sa Cour propre.

L'Eglise Gallicane a tousiours tenu, que combien que par la veigle Ecclesiastique, ou (comme dit S. Cyrille escriuant au Pape Celestin) par l'ancienne coustume de toutes les Eglises, les Conciles generauls ne se doiuent assembler ny tenir sans le Pape claué non errante reconnu pour chef & premier de toute l'Eglise militante & pere commun de tous les Chrestiens, & qu'il ne s'y doibue rien conclurre ny arrester sans luy & sans son authorité: toutes-fois on ne l'a iamais tenu ny estimé estre par dessus le Concile vniuersel, ains au contraire on a tousiours creu qu'il est tenu aux Decrets & Arrests d'iceluy, comme aux commandemens de l'Eglise espouse de nostre Seigneur Iesus-Christ, qui est principalement representée par ceste assemblée generale.

Les Bulles ou lettres Apostoliques de citation executoriales, fulminatoires, ou autres ne s'executent en France

sans Pareatis du Roy, ou de ses officiers, & l'execution qui s'en peut faire apres la permission se fait par le iuge Royal ordinaire de l'autorité du Roy, & non pas auctoritate Apostolica pour couter distraction & meslange de iurisdiction.

Le Pape ne peut creer pensions sur les benefices de ce Royaume qui ont charge d'ames, ny sur autres, ores que ce fust du consentement des beneficiers, sinon conformément aux saincts Decrets conciliaires & sanctions Canoniques au profit des resignans quand ils ont resigné à ceste charge expresse, ou bien pour accorder les parties qui plaident vn benefice litigieus.

Les libertez de l'Eglise Gallicane se sont conseruées en obseruant soigneusement que toutes les bulles & expeditions venans de Cour de Rome fussent venüs, pour scauoir si en icelles y auoit aucune chose qui portast preiudice en quelque sorte que ce fust aux droicts & libertez de l'Eglise Gallicane, & à l'auctorité du Roy, dont se trouue encores expresse ordonnance du Roy Louys XI. suivie par les predecesseurs de l'Empereur Charles V. lors vassauls de la couronne de France, & par luy-mesme en vn sien Edict fait à Madril l'an 1543. & practiqué en Espagne, & autres pays de son obeissance, avec plus de rigueur & moins de respect qu'en ce Royaume.

Se sont conseruées aussi par appellations interiectées au futur Concile, dont se trouuent plusieurs exemples, mesmes és derniers temps, comme de celles qui ont esté interiectées par l'vniuersité de Paris des Papes Boniface VIII. Benoist XI. Pie II. Leon X. & autres.

Si la briefueté que ie me suis proposé en ceste Apologie me le permettoit, j'apporterois encor icy les Arrests des Cours de Parlemens en matiere de

crimes, par lesquels a esté iugé qu'en France tous Clercs de quelque ordre que ce soit, non seulement peuent estre apprehendez par les Magistrats Se- culiers, & renuoyez pardeuant le iuge Ecclesiasti- que pour delicts communs, mais aussi peuent estre iugez par le Seculier en cas de crimes enormes & priuilegiez: & mesmes quād quelqu'un pour delict commun aura esté par deux fois renuoyé pardeuant son iuge Ecclesiastique, la troisiésme fois, comme estant estimé incorrigible est iugé par le Seculier: On en voit infinis arrests dans tous les Iuriscon- sultes de France, & notamment dans les arrests de Papon l. 1. r. 5. Arr. 4. 9. 30. 31. 33. 34. 44. 45. 46. 47.

Or chascun peut cognoistre par ce qui a esté re- presenté cy-dessus, que ce que dit L' AUTEUR est tres-veritable, sçauoir que la liberté de l'Eglise Gal- licane est fondée sur les anciens Canons, enco- res qu'il s'abuse de dire qu'elle ait ce seul fonde- ment, car elle est aussi fondée sur la loy naturelle, & sur la raison & l'equité. On peut voir aus- si que L' AUTEUR n'est pas veritable en ce qu'il dit qu'à present on ne parle plus en France de liberté de l'Eglise Gallicane, car au contraire, comme ce florissant & tres-puissant Royaume l'a conseruée par le passé, il la conserue encor aujourd'huy plus soigneusement que iamais. Et faisant comparaison de ceste liberté avec celle que la Republique de Venise recognoist tenir de Dieu, & laquelle elle entend maintenir & conseruer avec toutes ses forces, on trouuera qu'il n'y a aucune differēce, sinon pour la diuersité des raisons, & se verra encore que la Re- publique se priue volontairemēt de plusieurs sien-

nes libertez naturelles dont elle pourroit vser. pour
tesmoigner plus de respect enuers le saint Siege: au
moyen dequoy il sera facile à vn chascun de co-
gnoistre combien est faulse la conclusion derniere
que fait L'AVTEVR, que la liberté que pretend la
Republique est contraire tant aux anciens Canons
qu'aux modernes.

*Ephes. 3. Ei autem, qui potens est omnia facere superabun-
danter quam petimus, aut intelligimus secundum virtute-
tem qua operatur in nobis, ipsi gloria in Ecclesia, & in
Christo Iesu in omnes generationes saculi seculorū. Amen.*

*Extrait du privilege donné à Venise par le Con-
seil des dix.*

GLI Eccellentissimi Signori Capi dell' Eccello Confe-
glio di X. infrascritti, hauuta fede dalli Signori Refor-
matori dello Studio di Padoua, per relatione ad essi fatta
dalli Reuerendi Theologi a ciò deputati, & dal Circ. Segre-
tario del Senato Giacomo Vicco con giuramento, che nell'
Apologia per Gio. Gerson alle opposizioni dell' Illustrissimo
Signor Cardinal Bellarminio del Padre Maestro Paulo di
Venetia dell' Ordine de i Serui, da essi diligentemente vedu-
ta & ben considerata non si troua cosa alcuna contraria alla
Santa fede Cattolica, Principi, ò buoni costumi, & è degna
di stampa, concedono licenza, che possi esser stampata in
questa Città. Dat. Die 5. Septembris 1606.

D. LORENZO LOREDAN.

D. ZVAN DA LEZE.

D. GIROLAMO DI PRIVLI.

Capi dell' Illustrissi-
mo Conseglio di X.

Illustrissimi Consilij X. Secretarius
Ioannes Baptista Padauinus.

1606. A. 5. di Settembre.

Registrato nell' officio contra la Bialtema à carte 158.

GIO. FRANCESCO PINARDO Segretario.